

নব-নারায়ণ

পৌরাণিক নাটক

নাট্য-মন্দিরে প্রথম অভিনীত
উদ্বোধন রজনী — ১লা ডিসেম্বর, ১৯২৬

ক্ষীরোদপ্রসাদ বিহাৰিনোদ

গুরুদাস চট্টোপাধ্যায় এণ্ড সন্স
২০৩-২০১ কলকাতা স্ট্রীট - কলিকাতা - ৬

পরম ভক্তিভাজন—

পূজ্যপাদ শ্রীমৎ শিবানন্দ

স্বামীজীর করকমলে—

নিবেদন

নানা কারণে স্বর্গীয় পিতৃদেবের এই জনপ্রিয় নাটকটির ষষ্ঠ সংস্করণ মুদ্রণে বিলম্ব হইল, সেজন্য নাট্যানুরাগী সুধীরদের নিকট আমি ক্ষমা প্রার্থনা করিতেছি।

এই নাটক প্রণয়নের একটি ইতিহাস আছে—সেইজন্য আমার এই নিবেদন লেখার ধৃষ্টতা। নাট্যকার মহাভাবত হইতে পাঁচটি চরিত্র বাছিয়া লইয়াছিলেন ও ঐ পাঁচটি চরিত্রের নাটকীয় ব্যক্তিত্ব ও ঘাত-প্রতিঘাতের উপর কেন্দ্র করিয়া নিজের মনোমত নাটক লিখিবার ইচ্ছা করিয়াছিলেন। চরিত্রগুলি এই :—ভীষ্ম, দ্রোণ, কৃপ, কর্ণ ও কুম্ভ। ১৯১২-১৩ সালে ৮কাশীধামে তিনি “ভীষ্ম” নাটক লেখা শেষ করেন, এবং তাহা নাট্যাধিদেবের নিকট বিশেষ সমাদর লাভ করে। তাহার পর তিনি “দ্রোণ” ও “কৃপ” লেখা আরম্ভ করেন। কিছু কিছু অংশ লেখার পর মহাভারতের “কর্ণ” চরিত্রের বৈশিষ্ট্য ও মাধুর্য্য তাঁহাকে অভিভূত করায় তিনি “কর্ণ” লেখা আরম্ভ করেন। কিন্তু বিভিন্ন রঙ্গালয়ের তাগিদে “কিন্নরী” প্রভৃতি ২৩ খানি নাটক লিখিবার জন্য “কর্ণ” লেখা বন্ধ হয়। পরে যখন পুনরায় লেখা আরম্ভ করেন তখন নবগঠিত “আর্ট থিয়েটার লিমিটেড” কর্তৃক সুপ্রসিদ্ধ নাট্যকার স্বর্গীয় অপরেশচন্দ্রের “কর্ণার্জুন” নাটক অভিনয় আয়োজন সংবাদে “কর্ণ” লেখা বন্ধ করিয়া “আলমগীর” প্রভৃতি অন্যান্য নাটক লিখিতে বাধ্য হইলেন, কারণ “কর্ণ” অভিনয় করিবার জন্য অন্যান্য রঙ্গালয়ের চাহিদা কমিয়া যায়।

পরে তিনি বুঝিয়াছিলেন যে—নিজের মনোমত নাটক লিখিতে হইলে রঙ্গালয়ের অধ্যক্ষের মুখ চাহিয়া বা তদ্রূপ অভিনেতা ও

অভিনেত্রীর দিকে লক্ষ্য করিয়া লিখিতে 'গেলে চলিবে না। অথচ এইরূপ সর্বপ্রকার প্রভাবমুক্ত হইয়া একখানি নিজ মনোমত ষথার্থ নাটক লিখিবার ইচ্ছা তাঁহার প্রবল হইয়া উঠিয়াছিল।

এই সময় তাঁহার সোদরপ্রতিম অকৃত্রিম স্বহৃদ নিমত্তিতার নাট্য-কলা ও সাহিত্যানুরাগী জমিদার শ্রীযুক্ত মহেন্দ্রনারায়ণ চৌধুরী ~~সহকারী~~ সাগ্রহ অনুরোধে ও আত্মকূল্যে ১৯২৪ সালে তিনি পুনরায় একাগ্রভাবে "কর্ণ" লেখা আরম্ভ করেন।

গ্রন্থকার ১৭।১০।২৪ তারিখে শ্রীযুক্ত মহেন্দ্রনারায়ণকে যে পত্র লিখিয়াছিলেন—তাহা হইতে কিছু অংশ উদ্ধৃত করিয়া দিলাম, তাহা হইতেই নাট্যরসিকগণ নাট্যকারের নিজের উক্তিহেই "কর্ণ" নাটক লেখার ইতিহাস বুঝিতে পারিবেন।

"প্রিয় মহেন্দ্র ভাই, * * * তোমার কথাটাত সেই দৃশ্যগুলি লিখিতে আরম্ভ করিয়াছি। তৃতীয় অঙ্ক সম্বন্ধে শেষ করিয়া পাঠাইতেছি * * * অসম পুস্তক শেষ না করিয়া এখন কোথাও যাইতে পারিতেছি না। আমি এখানে নিজের মনোমত করিয়া এ পুস্তক লিখিতেছি। অভিনয় হউক বা না হউক কাহারো কোন suggestion লইতে ইচ্ছা নাই। এই পুস্তকই মনে হইতেছে আমার শেষ। দেহ স্বাভাবিক ভাবেই দিন দিন দুর্বল হইতেছে। এখন বিশেষ দুর্বল।

"কর্ণ" সম্বন্ধে বহুদিন হইতে যে একটা ধারণা পোষণ করিয়া আসিতেছিলাম, সেইটাই পরিস্ফুট রূপে প্রকাশ করিবার বাসনা। এক দৈব-নির্গৃহীত পূর্ণ শক্তিধর মহাপুরুষের জীবনকাহিনী। পয়সার জন্ত তাহা কুণ্ঠিত করিতে ইচ্ছা নাই। কতকগুলি অর্কাটানের মতের তলায় নিজের চিরপোষিত কল্পনাকে বিধ্বস্ত করিতে পারিব না। কেহ না লয় তুমি কাছে রাখিও, তোমার ষ্টেজে (বাড়ীর) নিশ্চয়ই তা উপাদেয় হইবে। এই তৃতীয় অঙ্ক পাঠিলেই আমার উদ্দেশ্য বুঝিতে পারিবে। যখন

বই ধরিয়াছি এবার ইহাকে শেষ না করিয়া আমি অন্য বই লিখিতেছি না । কর্ণের মত আমিও এখন নিজেকে দৈব-নিগূহীত বোধ করিতেছি । সুতরাং ভাই, তার চরিত্র রহস্যই আমার এখন প্রিয় বোধ হইতেছে । * * ইতি ।”

১৯২৫ সালে “কর্ণ” লেখা শেষ হয় । ইতিপূর্বে স্বনামধন্য প্রথিত-যশা নট-নাট্যাচার্য্য শ্রীযুক্ত শিশিরকুমার ভাদুড়ী মহাশয়ও এই নাটক রচনায় ও অভিনয়ে আগ্রহ প্রকাশ করিলে, শ্রীযুক্ত মহেন্দ্রনারায়ণের সৌজনে শ্রীযুক্ত শিশিরকুমারের প্রযোজনা, অধ্যক্ষতা ও নাম-ভূমিকা-অভিনয় “নর-নারায়ণ” নামে ইহা ১লা ডিসেম্বর ১৯২৬ তারিখে “নাট্যমন্দির লিমিটেড্” কর্তৃক সর্বপ্রথম অভিনীত হয় ।

পরে নাট্যকার “কর্ণ” নাটকের প্রথম দৃশ্য মাত্র লেখেন কিন্তু শ্রীযুক্ত মহেন্দ্রনারায়ণের আকস্মিক মৃত্যুতে শোকাহত ও নিরুৎসাহ হইয়া এবং নিজের স্বাস্থ্যও ভাঙ্গিয়া পড়ায় লেখা বন্ধ করেন । মৃত্যুর ১১ দিন পূর্বে (জুলাই, ১৯২৭) তিনি বলিয়াছেন, “কর্ণ চরিত্র যতই উপলব্ধি করিতেছি ততই অনুভব করিতেছি যে “কর্ণ” চরিত্র এপারে লিখিবার নহে ।” ইহাই নাটক সম্বন্ধে তাঁহার শেষ কথা ।

আর এক কথা. কলিকাতা বিশ্ববিদ্যালয় এই নাটকখানিকে একাধিকবার বি, এ, পরীক্ষায় বঙ্গভাষার অতিরিক্ত পাঠ্যতালিকাভুক্ত করিয়া গুণ-গ্রাহিতার পরিচয় দিয়াছেন । সেজন্য কর্তৃপক্ষের নিকট কৃতজ্ঞতা জানাইতেছি ।

নিবেদক

শ্রীসতীনাথ বন্দ্যোপাধ্যায়

মহালয়া—১১।১০।৫০

প্রথম অভিনয়

নাট্যমন্দির লিমিটেড কর্তৃক

বৃহস্পতি, ১৫ই অগ্রহায়ণ ১৩৩৩ সাল

উদ্যোক্তা

প্রযোজক, শিক্ষক ও নাট্যাচার্য্য ...	শিশিরকুমার ভাট্টা
মঞ্চ-মালাকার ...	শ্রীরমেন্দ্রনাথ চট্টোপাধ্যায়
রক্ষমক্ষাধ্যক্ষ ...	শ্রীহরিগোপাল মুখোপাধ্যায়
সঙ্গীত-শিক্ষক ...	শ্রীকৃষ্ণচন্দ্র দে (অঙ্কগায়ক)
নৃত্য-সঙ্গীত ...	শ্রীব্রজবল্লভ পাল


অভিনেতা

শ্রীকৃষ্ণ ...	বিশ্বনাথ ভাট্টা
সূর্য ও সাত্যকি ...	শ্রীজয়নারায়ণ মুখোপাধ্যায়
ইন্দ্র ও বিদুর ...	শ্রীঅয়স্কান্ত বকসী
পরশুরাম ও অর্জুন ...	শ্রীমনোরঞ্জন ভট্টাচার্য্য
অকুতব্রণ ...	শ্রীবিভূতিভূষণ গোস্বামী
সঙ্কয় ...	শ্রীমিহিরকুমার নন্দী
দ্রোণাচার্য্য ...	শ্রীঅমলচন্দ্র মুখোপাধ্যায়
কৃপাচার্য্য ...	শ্রীজিতেন্দ্রনাথ ব্রহ্ম
ভীষ্ম ও তাপস ...	শ্রীশাতলচন্দ্র পাল
ধৃতরাষ্ট্র ...	শ্রীরামময় চক্রবর্তী

যুধিষ্ঠির	...	যোগেশচন্দ্র চৌধুরী
ভীম	...	শ্রীঅমিতাভ বসু (এমেচার)
নকুল	...	শ্রীঅমলেন্দু লাহিড়ী
সহদেব	...	শ্রীশৈলেন্দ্রনারায়ণ চৌধুরী
অভিমহু্য	...	শ্রীহেমচন্দ্র মুখোপাধ্যায়
দুর্যোধন	...	শ্রীগোপালদাস ভট্টাচার্য
দুঃশাসন	...	শ্রীসুহাসকুমার সরকার
শকুনি	...	শ্রীনৃপেশনাথ রাথ
কর্ণ	...	শিশিরকুমার ভাট্টা
বৃষকেতু	...	শ্রীধীরেন্দ্রনাথ দাস
যটোৎকচ	...	শ্রীচিত্তরঞ্জন গোস্বামী
বৈতালিক	...	শ্রীকৃষ্ণচন্দ্র দে (অঙ্কগায়ক)

অভিনেত্রী

গায়কী	...	শ্রীমতী হরিসুন্দরী (ব্র্যাকী)
দ্রোপদী	...	শ্রীমতী চারুশীলা
পদ্মাবতী	...	শ্রীমতী কৃষ্ণভামিনী
অস্তি ও শ্রীকৃষ্ণ-বেশী চারিণী	...	শ্রীমতী উষাবতী (পটল)



নাটোল্লিখিত ব্যক্তিগণ

পুরুষ

শ্রীকৃষ্ণ,

পরশুরাম, তাপস, অকৃতব্রণ, সাত্যকি,
ভীষ্ম, দ্রোণাচার্য্য, কৃপাচার্য্য, অশ্বখামা, সঞ্জয়, বিছুর, ধৃতরাষ্ট্র,
শকুনি, দুর্গোদধন, দুঃশাসন, বিকর্ণ, যুধিষ্ঠির, ভীম,
অর্জুন, নকুল, মহদেব, কর্ণ, ঘটোৎকচ,
অভিমন্যু, বৈতালিক, প্রতিহারী প্রভৃতি

স্ত্রী

গান্ধারী, দ্রৌপদী, পদ্মাবতী,
অস্তি, চারুণীগণ ইত্যাদি

[অভিনয় মৌক্যার্থে পুস্তকের কোন কোন অংশ
পরিবর্তিত ও পরিবর্জিত হয়]

প্রস্তাবনা

ওই যে বিরাট আকাশ পুলক

ওই যে তারার আবরণ—

কোথায় তাদের কনক কিরণ

কাহারে করিছে অন্বেষণ ?

ওই যে ব্যাকুল সিন্ধু—

সঞ্চিত ওই, সঞ্চিত ওই, সঞ্চিত নাদ-বিন্দু—

কাহার সূচনা, কাহার রচনা,

কাহার অনাদি সম্বোধন ?

দৈব কিম্বা পুরুষকার—

বিশ্বরাজা কোন্ রাজার ?

কাহার বিরাট, কাহার স্বরাট,

কাহার প্রকাশ—সঙ্গোপন ?

দৈব কিম্বা পুরুষকার—

নিদান, বিধান কোন্ রাজার,

কর্ম-সাক্ষী বিজয়-লক্ষ্মী

কোন্ মহানে করে বরণ ?

নর-নারায়ণ

জুচনা

আশ্রম-সান্নিধ্য

তাপস

তাপস । তোমার বধের ব্যবস্থা না ক'রে আমি জলগ্রহণ ক'রব না
—দুরাত্মা গো-বধকারী রাক্ষস ! (চতুর্দিকে অন্বেষণ)

তাপস-কণ্ঠা অস্তির প্রবেশ ও তাপসের হস্তধারণ

ছাড়্—হাত ছাড়্—হাত ছেড়ে দে, অস্তি !

অস্তি । এমন ধারা পাগলের মত কোথায় ছুটে চ'লেছেন ?

তাপস । ত্রিভুবন ! এ পৃথিবীতে না পাই স্বর্গে যাব, স্বর্গে না পাই
রসাতলে প্রবেশ ক'রব । সে গো-বধকারী দুরাত্মাকে শাস্তি না দিয়ে
আমি আর আশ্রমে ফিরবো না । ছাড়্ অস্তি, হাত ছাড়্ ।

অস্তি । এরূপ অসম্ভব কথা কইবেন না বাবা, সে কি আপনার
অভিশাপ নেবার জন্ত পথের মাঝে মাথা পেতে দাঁড়িয়ে থাকবে ? গো-
বধ ক'রেই আপনার অভিসম্পাতের ভয়ে সে পালিয়েছে । সে চোর—

কর্ণের প্রবেশ

কর্ণ । না দেবি, সে চোর নয় ।

অস্তি । বাবা—বাবা ! (কর্ণকে বিস্মিত নেত্রে দেখিল)

তাপস । দেহধারী অংশুমালী সম
 স্বতেজে স্বরূপে সুপ্রকাশ
 কে আপনি পুরুষ প্রধান ?
 কর্ণ । নহি অংশুমালী,
 তাঁহার সেবক আমি দ্বিজ ।
 কর্ণ মোর নাম, হস্তিনা নগরবাসী ।
 বনমধ্যে পদশকু করিয়া শ্রবণ
 দূর হ'তে নিষ্ফেপিছু শব্দভেদী বাণ ।
 না ছিল গোচর, দ্বিজবর,
 এ অরণ্য মধ্যে ছিল তোমার আশ্রম ।
 মৃগলমে বধিয়াছি ধেনু ।

অস্তি । চ'লে এসো পিতা ।
 সহজাত কবচ কুণ্ডল,
 জ্যোতির্ময় সূঠাম সুন্দর দেহধারী,
 সত্যবাদী, নির্ভীক, দেবতারূপী নর ।
 অনুরোধ পিতা, ক্ষমা কর ভ্রম তার ।

কর্ণ । সংহর সংহর ক্রোধ ঋষি ! একমাত্র
 ধেনু গেছে, প্রতিশ্রুতি করিতেছি,
 পরিবর্তে তার—রত্ন স্বর্ণ দিব
 ভারে ভার, সহস্র সহস্র দিব ধেনু ।

তাপস । (গভীরভাবে) কি বলিলে নাম—কর্ণ ?

কর্ণ । 'বহুসেন' পিতৃদত্ত নাম—
 লোক মুখে কর্ণ নামে প্রসিদ্ধি আমার ।
 হস্তিনা-নিবাসী আমি ।

তাপস । হস্তিনা-নিবাসী তুমি ?

- অস্তি । শুনিয়াছি, সে শু বছদূরে—
শতাধিক যোজন অন্তর ।
হস্তিনা ত্যাজিয়া ভদ্র, ঘটাতে আপদ,
কি হেতু এ সূদূর দক্ষিণে ?
- কর্ণ । ভগবান রামের নিকটে
শিথিতে এসেছি ধনুর্বেদ ।
- অস্তি । তুমি কি রাজার পুত্র ?
- কর্ণ । নহি ।
- তাপস । রাজার আত্মীয়-পুত্র ?
- কর্ণ । নহি ।
- তাপস । তবে ?
- কর্ণ । ইহার অধিক প্রশ্ন ক'র না ব্রাহ্মণ !
হ'লেও সমর্থ, আমি দিব না উত্তর ।
বলিবার—সমস্তই বলিয়াছি আমি ।
প্রাণভয়ে করি নাই সত্যের গোপন ।
অভিশাপ—সত্য যদি তোমার বিচারে,
প্রাপ্তিব্যোগ্য হই আমি—
অভিশাপ ভয়ে নহি ভীত ।
- তাপস । নাহি জানি কি উদ্দেশ্য করিতে সাধন,
বিশ্বের বিধাতা, জীবন্ত চলন্ত এই
কাঞ্চন-মন্দির ধরাতলে চূর্ণ হ'তে
ক'রেছে প্রেরণ । মনে লয়, এই বিশ্ব
মাঝে কোন শ্রেষ্ঠ ধনুর্দবে
পরাজিত করিতে সমরে
গোপনে বিচিত্র বিদ্যা শিখিয়াছ তুমি ।

মনে লয়, সর্বদা সর্বথা সন্ধে তার—
 রক্ষিরূপে দেহধারী ভ্রমে নারায়ণ ।
 শুন, হে নিভান্ত ভাগ্যহীন,
 নিয়তি-প্রেরিত কর্ম সর্ব শিক্ষা আজ
 তব করিল নিফল ! মনে মনে যারে
 তুমি রণাঙ্গনে প্রতিযোদ্ধা করিয়াছ
 স্থির, কাল তব পূর্ণ হবে যবে
 সেই মহাবীর সনে দৈরথ সমরে
 তোমার রথের চক্র গ্রাসিবে মেদিনী ।
 যেই প্রমত্ততা বশে তুমি
 আজি মোর হোম-ধেনু ক'রেছ বিনাশ,
 সেই প্রমত্ততা, মৃত্যু-আজ্ঞা শিরে লয়ে,
 তোমাতে ঘেঁরিবে সেই দিন ।
 কণ্ঠ্যার সদৃশ গাভী, নৃত্যশীলা,
 আসিতে নিকটে তোমার নিষ্ঠুর বাণে
 ছিন্নকণ্ঠ—প্রাণহীন যেই মত
 মুক্ত আঁখি পড়িল ছুতলে, রে নিষ্ঠুর !
 তুমিও তেমনি—ছিন্নকণ্ঠ, মুক্ত-আঁখি—
 নির্ধম মেদিনী-কোলে লইবে আশ্রয় ।
 আয় অস্তি, চলে আয় !
 অভাগ্যের মুখ নিরীক্ষণে
 নিজেরে ক'র না ভাগ্যহীনা ।

উভয়ের গ্রহান

কর্ণ ।

তীব্র অভিশাপ !

অঙ্গশিক্ষা পূর্ণ সেই দিনে

সেই দিনে লভিলাম মৃত্যু-আশীর্বাদ ।
 ভাল—ভাল । নিয়তি-প্রেরিত কর্ম যদি,
 যত্বপি আমার নাশ অভিপ্রায় তার,
 অভিমান করি কার 'পরে ?
 কিন্তু মোহাচ্ছন্ন যত্বপি ব্রাহ্মণ ?
 গাভী-শোকে আত্মহারা—অভিশপ্ত ক'রে
 থাকে মোরে ? বিন্দুমাত্র ক্ষতি নাহি হবে !
 মোহাচ্ছন্ন দ্বিজ তাতে নাহিক সংশয় ।
 প্রতিদ্বন্দ্বী মোর ধনঞ্জয়—
 সমরে পাড়িতে তারে
 এত ক্রেশে আয়ত্ত ক'রেছি ধনুর্বেদ ।
 মূর্খ ব্রাহ্মণের এই শাপের প্রলাপে
 সেই শিক্ষা হইবে নিষ্ফল ?
 বলে কিনা—নারায়ণ নরদেহ-ধারী !
 দেহরক্ষী গাণ্ডীবীর ! সর্বত্রগ,
 অনির্দেশ্য, কূটস্থ অচল যেই ব্রহ্ম—
 আচ্ছাদন ক'রে আছে অনন্ত ভুবন,
 বলে কিনা—
 সে পশেছে চৌদপোয়া পঞ্জর-পিঞ্জরে ।
 মূর্খ—মুগ্ধ—ক্ষিপ্ত সে ব্রাহ্মণ ।

এহান

(নেপথ্যে) পরশুরাম । কর্ণ, কর্ণ !

কর্ণ ও পরশুরামের উভয় দিক দিয়া প্রবেশ

রাম । এই যে, এই যে, তুমি এসেছ, তোমার অশ্বেষণে হারীতকে
 বহুপূর্বে পাঠিয়েছি । বালকটাকে বড়ই কষ্ট দিয়েছি ।

কর্ণ । কি জন্ত, গুরুদেব, তাকে আমার অশেষে পাঠিয়েছিলেন ?

রাম । শুধু তাকে ? অকৃতব্রণ পর্যন্ত তোমার অনুসরণে গিয়েছিল । সমস্ত দিন আমার উদ্দেশে কেটে গেছে !

কর্ণ । কেন গুরুদেব ?

রাম । কেন, এই স্থানে পদচারণ ক'রতে ক'রতে শোন । প্রকৃষ্ট শব্দজ্ঞান এক ব্রাহ্মণ ভিন্ন আর কারও হ'তে পারে না । কেন না, ব্রাহ্মণ নিত্য শব্দ-ব্রহ্মের উপাসক । ক্ষত্রিয় বাহুর অধিকারী—জ্যোতিব্রহ্ম তার উপাস্ত । এইজন্ত কোন ক্ষত্রিয় এই শব্দভেদী বাণ-শিক্ষায় সুফল লাভ করেনি । ত্রেতাযুগে রাজা দশরথ এই বাণ-প্রয়োগ শিক্ষা ক'রেছিলেন । তার ফলে হস্তী মনে ক'রে তিনি একটি তাপস-কুমারকে হত্যা ক'রেছিলেন । ইঁা বৎস, তাপস-কুমার । তার পিতা মাতা ছিলেন অন্ধ । বালক তাঁদের সেবার জন্ত, কুণ্ড নিয়ে নদী থেকে জল আনতে গিয়েছিল । ঘোরারণ্য, তাতে রাত্রিকাল । বালকের ভাগ্যদোষে কোনও কারণে সেই কুণ্ডে আঘাত লেগে গস্তীর শব্দ হয়েছিল । সেই শব্দ হস্তীর ধ্বনি মনে ক'রে রাজার বাণপ্রয়োগ । ফলে সেই ননীৰ মত কোমল বালকের মৃত্যু । পুত্রশোকে অন্ধ মুনিদম্পতি অচিরে দেহত্যাগ ক'রলেন । তাদের অভিশাপে রাজা দশরথেরও পুত্রবিরহে শোচনীয় মৃত্যু । তা হ'লে বোঝ, বৎস, শব্দতত্ত্ব জানা না থাকলে, এ বাণ থেকে কত অনর্থ উৎপন্ন হ'তে পারে । একি কর্ণ, একথা শুনে তোমার মুখ মলিন হ'ল কেন ? তোমার ভয় কি ? তুমি ভার্গব । ইঁা—মুখ প্রফুল্ল কর । প্রকৃত শব্দজ্ঞান এখনো লাভ করনি যদি মনে কর, এ বাণ প্রয়োগ ক'র না । সৰ্ব্বশ্রেষ্ঠ অধিকারী বুঝে আমি গদানন্দনকে এই অস্ত্রবিদ্যা শেখাতে চেয়েছিলুম । ভীষ্ম শিক্ষা করেন নি । ব'লেছিলেন, “আমি ক্ষত্রিয়, বাহুর উপরই আমার সৰ্ব্বদা নির্ভর । ও শব্দতত্ত্ব সম্যক্রূপে জানা আমাদের সাধ্য নয় । কি জানি কোন দিন শব্দ শুনে বাণ ছুঁতে গিয়ে বস্ত্র জঙ্কর পরিবর্তে গো-বধ ক'রে

ফেলরো।” একি বৎস, তুমি এসব কথা শুনে বিচলিত হ’চ্ছ কেন ? তোমার ভয় কি ? তুমি ভার্গব ।

কর্ণ । হারীতের ক্রেশের কথা শুনেই আমার মনে কষ্ট হ’চ্ছে । তার উপর আর্ষ্য অকৃতব্রণকে ক্রেশ দিলেন কেন প্রভু ?

রাম । শুধু তোমার জন্ম বৎস, তোমার জন্ম । মমতা বশে তোমাকে এই অতি গুরু অস্ত্রবিদ্যা শিক্ষা দিয়েছি । দিয়েই কিন্তু মনে হঠাৎ একটা শঙ্কা জেগে উঠল ! তুমি যে বালক ! তোমাকে একটু সাবধান ক’রে দেওয়া তো হ’ল না । তাই তোমাকে আমার প্রয়োজন হ’ল । আশ্রম থেকে বেরিয়ে দেখি, তুমি আশ্রমে নেই । তাই তোমার অন্তর্গত হারীতকে প্রেরণ করেছিলুম । দ’লেছিলুম, যে অবস্থায় তোমাকে পাবে, আমার কাছে নিয়ে আসবে । কেন না, একথা তাকে ব’লতে পারিনি !

কর্ণ । হাঁ গুরুদেব, আমি আপনার অভয় চরণতলে ফিরে এসেছি ।

রাম । বেশ ক’রেছ । তুমি রামের সগোত্র—ভার্গব । ধনুর্কোদের সমস্ত জ্ঞান তোমাকে দিয়ে আমি ভাণ্ডার শেষ ক’রেছি । কর্ণ, সহজাত কবচ-কুণ্ডলধারী তুমি—ধরাতলে সূর্যের সচল প্রতিমূর্তি ! পূর্বে হ’তেই তুমি দেবতারও অজেয়—তার উপর এই শিক্ষা ! ভার্গব ! এ ভুবনে তোমার তুল্য বীর আর হয়নি, হবে না, হ’তে পারে না ।

কর্ণ । আমি কি এখন ইচ্ছা ক’রলে সমাগরা ধরণীর অধীশ্বর হ’তে পারি ?

রাম । একথা আবার জিজ্ঞাসা ক’রতে হয় ভার্গব—এত কথা শোনবার পর ? (কর্ণ বার বার রামকে প্রণাম করিল) নাও, ব’স দেখি—এইখানে একটু ব’স । আমি আজ বড় ক্লান্ত হ’য়েছি । তোমার জাহ্নুতে মাথা দিয়ে একটু শয়ন করি ।

কর্ণের উপবেশন ও তাহার জানুতে মস্তক রাখিয়া রামের শয়ন

রাম । জান না ভার্গব—কি উদ্বেগে গেছে মোর
দিন ! চিরকাল বিচার-বিহীন আমি ।
মনে পড়ে, পিতৃবধে ল'তে প্রতিশোধ
একাধিক বিংশ বার কি নিশ্চয় ভাবে
নিঃস্বত্রিয়া ক'রেছি ধরণী ।

কি নিশ্চয় ভাবে করিয়াছি—হে ভার্গব,
কত ক্ষুদ্র—দুঃখপোষ্য বালক সংহার ।
সম্মুখে দাঁড়িয়ে যত মত্ত-দৃষ্টি মাতা,
নিম্নদৃষ্টি স্তব্ধীভূত যতেক দেবতা ।

যুহুর্ন্ত স্বরণে এখনো প্রচণ্ড তেজে
তীব্র প্রতিক্রিয়া তার ছুটে আসে এ মর্শে
করিতে ভস্মরাশি । শুনিতোছ প্রিয়তম ?

কর্ণ । শুনিতোছ গুরু !

রাম । এই ধরাতলে আসিয়াছিলাম আমি
দেবত্ব লইয়া । কর্ণ ! শুনিতোছ ?

কর্ণ । ব'লে যান প্রভু !

রাম । এই মন্দির ভিতরে (বক্ষে হস্ত দিয়া) বৈকুণ্ঠপতির
ছিল ষষ্ঠ অধিষ্ঠান ! বিচার অভাবে
সে দেবত্ব দিচ্ছি ডালি সুকোমল
রাঘব রামের পদতলে । বিষ্ণুলোক-
পথ তার ফলে—চির জীবনের তরে
নিরুদ্ধ আয়ার ! তারপর—কত ক্ষুদ্র
ভ্রম, অস্থির ক্রন্দনে—ভীষ্মসনে—রণ,
কত ক্ষুদ্র—সর্বশেষে—ক্ষুদ্র (নিদ্রিত হইলেন)

কর্ণ । ষাক, গুরু ঘুমিয়ে পড়েছেন । আর কিছুক্ষণ কথাবার্তা কইলে হয় ত সত্য গোপন রাখতে পারতুম না । কোনও প্রকারে আজকের রাত্রিটা কাটাতে পারলে হয় । প্রভাত হ'তে না হ'তে গুরু-দক্ষিণা দিয়ে এ স্থান ত্যাগ ! উঃ—উঃ ! (মুখে বিষম ষড়্ধা প্রকাশ)
একি ভীষণ কীট ! শত বৃশ্চিকের এক সঙ্গে দংশন ! উঃ ! হে ভাস্কর,
ধৈর্য্য দাও—গুরুর নিদ্রাভঙ্গ না হয়—ধৈর্য্য—ধৈর্য্য ।

রাম । উঃ ! (উত্থান ও গলদেশে হস্ত দিয়া রক্ত পরিদর্শন) একি ?

কর্ণ । রক্ত !

রাম । কার রক্ত ?

কর্ণ । আমার ।

রাম । আঃ ! আমি অশুচি হলাম । তোমার রক্ত আমার গলায়
কি ক'রে এলো !—তুমি কি কৰ্ম্ম ক'রেছ ? বলতে সঙ্কোচ কেন ?

কর্ণ । আমার জানু থেকে বেরিয়েছে ।

রাম । বুঝতে পারলুম না ! ভয় ত্যাগ ক'রে শীঘ্র বল ।

কর্ণ । আপনার যেমন নিদ্রা এসেছে, অমনি এক ভীষণ কীট কোথা
থেকে কেমন ক'রে আমার জানুর নিচে এসে আমাকে দংশন ক'রতে
আরম্ভ ক'রল । প্রভু, এরূপ যাতনা আমি জীবনে আর কখন পাইনি !
মনে হ'তে লাগল, যেন শত সহস্র বৃশ্চিক এক সঙ্গে দংশন ক'রছে ; কিন্তু
পাছে আপনার নিদ্রার ব্যাঘাত হয়, এই জন্ত আমি অচঞ্চল
হ'য়ে সমস্ত যাতনা সহ্য ক'রেছি । সেই কীট আমার জানুর
মাংস ভেদ ক'রে আপনার গলদেশ আক্রমণ ক'রেছে—ওই গুরু,
সেই কীট ।

রাম । এ যে বজ্রকীট ! (পদতলে কীট দলন) এই ভীষণ কীটের
দংশন তুমি নীরবে সহ্য ক'রেছ ! ষার দংষ্ট্রার স্পর্শ-মাত্র আমি পাগলের
মত লাঞ্ছিত উঠেছি !—তুমি কে !

কর্ণ । আমি আপনার দাসানুদাস শিষ্য ।

রাম । (সক্রোধে) তা নয়, তুমি কি ?

কর্ণ । প্রশ্নের অর্থ বুঝতে পারছি না যে প্রভু ।

রাম । বুঝতে পারছ না মুখ ? তুমি ঐ কীট দংশনে যে কষ্ট সহ ক'রেছ, ব্রাহ্মণ কখনও সেরূপ দেহের কষ্ট সহ ক'রতে পারে না, ক্ষত্রিয়ের মত তোমার সহিষ্ণুতা দেখছি । এখনি তুমি আমাকে সত্য পরিচয় প্রদান কর । (কর্ণ নতজানু হইলেন) ও কি ক'রছ ? শীঘ্র আমাকে সত্য পরিচয় প্রদান কর । ব্রাহ্মণ তুমি কখন হ'তে পার না । কে তুমি ? ভূমি ত্যাগ ক'রে ওঠ—বল ।

কর্ণ । ব্রাহ্মণ ! আমি সূতপুত্র ।

রাম । অকৃতব্রণ ।

কর্ণ । প্রসন্ন হ'ন, প্রসন্ন হ'ন । আমি অপ্রলোভে আপনার শিষ্য হ'য়েছি । বেদ বিদ্যা-দাতা গুরু পিতার তুল্য । এই জন্তু আপনার নিকটে আমি ভৃগুবংশ-জাত ব'লে পরিচয় দিয়েছি ।

রাম । মিথ্যাবাদী !

কর্ণ । হে ভার্গব ! প্রসন্ন হয়ে একবার চিন্তা ক'রে দেখুন, শাস্ত্র-মতে আমি মিথ্যা কইনি ।

রাম । মিথ্যা—মিথ্যা—শাস্ত্রকে ক'রেছ প্রতারণা ।

আরও মিথ্যা—হীন—প্রতারণা ! সত্যের এ

তুচ্ছ আবরণে অস্তরের সর্ব কথা

করিয়া গোপন, সরল-বিশ্বাসী দেখে

মোরে মিথ্যাবাক্য হ'তে হীন—

এ বৃদ্ধে ক'রেছ প্রতারণা । রে অভাগ্য,

বুঝিতে নারিহু এ অপূর্ব তোমার সৃজনে—

কি উদ্দেশ্য ছিল বিধাতার ।

সহজাত কবচ-কুণ্ডল,
 বিমল আদিত্য-জ্যোতি-মুখে,
 নয়নে গায়ত্রী-দীপ্তি, বুদ্ধির জননী—
 দেবতার আকাজক্ষিত সৌন্দর্য্য-সম্পদ
 দেহে ধরে জীবন প্রারম্ভ পথে—
 সর্বভাগ্য দিলি বিসর্জন !

কর্ণ ! রক্ষা কর হে গুরু ভার্গব,
 করুণায় কব সিক্ত কঠোর নয়ন ।
 রাম । করুণা—করুণা ? এই দেখ হতভাগ্য,
 ক্ষীণ কঠোরতা আবরণে কত অশ্রু
 রেখেছি সঞ্চিত । সূতপুত্র ! সূতপুত্র
 পরিচয়ে চাও শিক্ষা করুণা আমার ?
 ‘সূত’ যে তোমার হাতে শ্রেষ্ঠ পরিচয় !
 ‘চণ্ডাল’ বলিয়া যদি—শিক্ষা আশে
 দাঁড়াইতে সম্মুখে আমার,—মায়াবশে
 বুঝি আমি—সর্বস্ব দিতাম ঢেলে
 চণ্ডাল-মন্দনে । দাঁড়াও—প্রস্তুত হও ।

কর্ণ । ক্ষমা নাই ? অভিশাপ দিতে হবে গুরু ?

রাম । তব কৰ্ম দিতেছে তোমারে অভিশাপ ।

কর্ণ । কর ক্ষমা, সূতপুত্র জন্ম সঙ্গে হীন—
 তা হতে হীনতা গুরু দিয়োনা আমারে ।

রাম । এখনো—এখনো প্রতারণা ?
 ওরে মিথ্যাবাদী ! বৃদ্ধ রাম দৃষ্টিহীন
 নহে । সূতপুত্র কভু নহ তুমি ।

কর্ণ । সূতপুত্র, সূতপুত্র আমি । সূতকন্যা রাধা

মোর মাতা, মহারাজ পাণ্ডুর সারথি—

স্বতশ্রেষ্ঠ অধিরথ জনক আমার ।

স্বদেশে 'রাধেয়' নামে পরিচয় মম ।

রাম । কোথা হে অকৃতব্রণ ?

অকৃতব্রণের প্রবেশ

শীঘ্র আনো জলপূর্ণ কমণ্ডলু ।

অকৃত । একি গুরু ! রক্তাক্ত কি হেতু বস্ত্র তব ?

একি—একি ! রক্তচিহ্ন কেন কণ্ঠদেশে ?

রাম । উত্তরের সময় নাই—অগ্রে আনো—

শীঘ্র আনো কমণ্ডলু ।

অকৃতব্রণের প্রস্থান

কর্ণ । আর মিথ্যা বলি নাই ।

হে ব্রহ্মজ্ঞ, হে ঋষি মহান্ !

সত্য—সত্য—যথাব্রহ্ম, সূতপুত্র আমি ।

অকৃতব্রণের কমণ্ডলু হস্তে পুনঃ প্রবেশ

রাম । হস্তে অগ্রে দাঁও জল—শুচি হই আমি ।

মস্তকে জল স্পর্শ করিয়া কমণ্ডলু গ্রহণ ও অকৃতব্রণকে প্রস্থানের

ইঙ্গিত—তাহার প্রস্থান

সূতপুত্র তুমি ?

কর্ণ । সত্য—সত্য—যেই মত তোমারে সন্মুখে

দেখি গুরু, এই মত—সত্য—সত্য !

রাম । ভাল, সত্যই—সত্যই যদি

সূতপুত্রের শোণিতে

অশুচি হইয়া থাকি আমি,
এ পাপ না স্পর্শিবে তোমারে ।
নহে, দ্বিজ-পুত্র জ্ঞানে জগৎ কল্যাণে,
যে গুহ্যস্ত শিক্ষা দানে, প্রয়োগ সংহারে,
তোমারে ক'রেছি আমি অজেয় ধরায়,
রে মুঢ়, সঙ্কট কালে—বিনাশ সময়ে
সে অস্ত্র বিস্মৃত হবে তুমি ।

প্রহান

কর্ণ । আশ্রমে আবদ্ধ রাখ তব অভিশাপ ।
বিষাদে বিপুল হর্ষ—
সত্য—সত্য—যথারক্ষ সূতপুত্র আমি ।

প্রথম অঙ্ক

প্রথম দৃশ্য

হস্তিনা—সভামণ্ডপ

একদিক দিয়া ভীষ্মাদি সহ ধৃতরাষ্ট্র, অন্যদিক দিয়া কর্ণাদি সহ
দুর্যোধনের প্রবেশ। সকলে নিজ নিজ নির্দিষ্ট আসনে
উপবিষ্ট হইলে দ্বারবান সঞ্জয়ের আগমনবার্তা জানাইল ও
ধৃতরাষ্ট্রের অনুজ্ঞাক্রমে সঞ্জয় প্রবেশ করিল

বৈতালিক

গীত

মণিময় আসনে মণিময় মন্দির মাঝে .
মণিকোটি মনোহর কেও পুরুষবর মনোমদ স্বরূপে বিরাজে ।
কমনীয় কণ্ঠে কত যে কান্তমণি
তারকার হারে হারে গাঁথা,
মোহিত দরশে, ধ্যান মগন যুনি
ছন্দে ছন্দে গাহে গাথা ।
বিশ পুলক ল'য়ে পড়িয়াছে ওই পারে—
উছলিত কোটি বিজরাজে ।
“অভীঃ” “অভীঃ” রবে গস্তীর আরাবে
অনাহত হৃন্দুভি বাজে ।

সঞ্জয় । হে কৌরবগণ, আমি পাণ্ডবগণের নিকট হ'তে প্রত্যাগত
হয়েছি । সমস্ত পাণ্ডব সমুদয় কৌরবগণকে বয়ঃক্রম অনুসারে প্রত্যতি-

বাদন ক'রেছেন! তাঁরা বয়োবৃদ্ধগণকে অভিবাদন, বয়স্কগণকে বয়স্শোচিত সম্ভাষণ ও যুবদিগকে প্রতিপূজা ক'রেছেন। মহারাজ যুতরাই তাঁদের যে সকল কথা ব'লতে আমাকে উপদেশ দিয়েছিলেন, আমি ব'লেছি।

ভীষ্ম। এইবার প্রশ্ন কর মহারাজ।

যুত। বৎস দুর্ঘ্যোধন, তুমি প্রশ্ন কর।

দ্রোণ। আপনি প্রধান, আপনি এখানে বর্তমান থাকতে অন্য কেহ সঞ্জয়কে প্রশ্ন ক'রতে অধিকারী নয়।

ভীষ্ম। বিশেষতঃ রাজা যুধিষ্ঠির, যা কিছু বক্তব্য তাঁর, তোমারই কাছে নিবেদন ক'রেছেন।

যুত। ধনঞ্জয় কি ব'লেছেন সঞ্জয়?

দুঃশা। ধনঞ্জয় কেন, সে অনেক বড় বড় কথা ব'লতে পারে।— পিতা, যুধিষ্ঠির কি ব'লেছে—জিজ্ঞাসা করুন।

যুত। হে সঞ্জয়! অদীনসত্ত্ব ধোদ্ধগণের নেতা, দুরাআগণের সংহর্তা মহাত্মা ধনঞ্জয় কি ব'লেছেন? আমি রাজগণ সমক্ষে তাই তোমাকে জিজ্ঞাসা ক'রেছি।

শকুনি। (অনুচ্চস্বরে) হ'য়েছে দুর্ঘ্যোধন—রাত্রিকালে বিদুরের আগমন—রাজার সঙ্গে কথোপকথন—আর অমনি রাজার মস্তিষ্ক আলোড়ন।

দুঃশা। ওই ভক্তবিটেল বিদুর রাজাকে অর্জুন সম্বন্ধে হয় ত কোন একটা গোলমালে কথা শুনিয়ে দিয়েছে।

শকুনি। আবার 'হয় ত' কেন দুঃশাসন, 'নিশ্চয়' বল।

সঞ্জয়। তাঁরই কথা আগে বলব মহারাজ?

বিদুর। সর্বাগ্রে তাঁরই কথা শুনতে রাজার ইচ্ছা হ'য়েছে সঞ্জয়।

সঞ্জয়। মহারাজ, যুদ্ধার্থী নির্ভীক অর্জুন যুধিষ্ঠিরের অল্পমতি অনুসারে কেশবের সম্মুখে আমাকে ব'লেছেন, যে দুর্ভাষী, দুরাত্মা, অতিমূঢ়, আঙ্গুশ্রমতা স্তম্ভপুত্র আমার সঙ্গে যুদ্ধার্থী হ'য়েছে, আর যে সকল

রাজা পাণ্ডবগণের সঙ্গে যুদ্ধ ক'রবার জন্ত আনীত হ'য়েছে, তাদের ও কুরুগণের সমক্ষে দুর্ঘোষন আর তার অমাত্যগণকে বল'বে, 'যদি দুর্ঘোষন রাজা যুদ্ধিরের রাজ্য পরিত্যাগ না করে—'

দুর্ঘোষা । বোঝা গেছে, বোঝা গেছে—তাহলে দুর্ঘোষনের মস্তক—
শকুনি । খণ্ড-বিখণ্ড-চূর্ণ-বিচূর্ণ—ভূপতিত—আর শকুনি পক্ষ-
সঞ্চালনে উর্দ্ধগত ।

দুর্ঘোষা । সে দান্তিক বহুভাষী অর্জুনের কথা আমাদের শোনবার
প্রয়োজন নেই । যুদ্ধির কি বলেছে শুনিয়ে দাও ।

সঞ্জয় । কি বলিব মহারাজ ?

ধৃত । দুর্ঘোষন, বহু বিজ্ঞ তোমার সম্মুখে—

দুর্ঘোষা । দেখেছি—জেনেছি মহারাজ !

ধৃত । বলহে সঞ্জয় তুমি,
কি বলেছে বীর ধনঞ্জয় ।

সঞ্জয় । “অপহৃত রাজ্য যদি হুঁষ্ট
দুর্ঘোষন না করে অর্পণ—মহারাজে,
ভীষ্মে, দ্রোণে, কৃপে করিয়া প্রণাম, আমি
অবতীর্ণ হব রণস্থলে । যুদ্ধ যদি
চায় দুর্ঘোষন, বিন্দুমাত্র ক্ষতি নাই,
হলে যুদ্ধ, আশুকাম হইবে পাণ্ডব ।
কিন্তু যুদ্ধ যেন নাহি চায় দুর্ঘোষন,
জ্ঞাতির সংহারে তার নাহি অভিলাষ ।”

দুর্ঘোষা । (হাস্য) সখা, সখা কি বিরাট বিভীষিকা !

কর্ণ । স্থির হ'য়ে শুন সখা—এ নয় সময়
উত্তরের । সঞ্জয়ের এখনো বক্তব্য আছে ।

ভীষ্ম । বক্তব্যের আর নাহি প্রয়োজন,

শুন দুর্ঘোষন, আমার রহস্য কথা—
 ধনঞ্জয়-বাসুদেব,—মায়াতিমানব ।
 পূর্বদেহে ছই ঋষি নর-নারায়ণ ।
 একআত্মা—দ্বিধাভূত ভিন্ন রূপে ।
 দুষ্কৃতির ধ্বংস তরে, ধর্মের রক্ষণে—
 যুগে যুগে হ'ন তাঁরা অবতার ।
 আমি শুনিয়াছি বেদবিৎ নারদের মুখে—

কর্ণ ।

সেই এক পুরাণের কথা—

নর-নারায়ণ—অশ্রদ্ধেয় মূল্যহীন ।
 সখা দুর্ঘোষন, এ সব প্রলাপবাক্য
 শুনিতে আসিনি সভাস্থলে ।

ভীষ্ম ।

মিথ্যা নহে—বুঝিয়া উত্তর দাও । ওই
 হীনজাতি সূত্রপুত্র, সুবলনন্দন,
 ক্ষুদ্রাশয় নীচ-আত্মা ওই তব ভাই
 দুঃশাসন—হে বৎস, যতপি চল তুমি
 এ তিন সর্কথা ত্যাজ্য উপদেষ্টা মতে—

কর্ণ ।

অন্যায় অযথা তিরস্কার—তব মুখে
 শোভন না হয় পিতামহ ! সত্য বটে
 ক্ষাত্রধর্ম ক'রেছি আশ্রয়, কিন্তু আমি
 স্বধর্ম করিনি পরিহার । সেই রঙ্গস্থলে,
 যে প্রতিজ্ঞা ক'রে আমি দুর্ঘোষনে করিয়াছি
 সখা সঙ্ঘোধন—বল রাজা, এই সব—
 পরম হিতৈষী—এই সব সত্যধর্মী সুবিজ্ঞ প্রবীণে,
 আজিও পর্য্যস্ত ক'রেছি কি কোনদিন
 মনেরও অক্ষর দিয়া অনিষ্ট তোমার ?

দুর্ঘো। কুক্ক হইয়ো না সখা, পিতামহ উনি ।

কর্ণ । একরূপ অগ্রায় কথা, আর যেন কভু,
তব মুখে শুনিতে না পাই পিতামহ !
নিশ্চিন্ত থাকহে সখা,—জেনো স্থির তুমি,
যুদ্ধে আমি বিনাশিব সমস্ত পাণ্ডবে ।

দ্রোণ । মহারাজ, ভরতশ্রেষ্ঠ ভীষ্ম যা ব'লেছেন, তাই আপনি শুনুন,
অন্যের কথায় কান দেবেন না । গাঙ্গেয় যা বল্লেন, আমিও তা
শুনেছি । অর্ধলিঙ্গদের কথা শুনে কার্য্য ক'রবেন না । আমার জ্ঞানের
দিক থেকে আমিও ব'লছি, ধনঞ্জয়ের সমকক্ষ ধনুর্ধর ত্রিভুবনে নাই ।

ভীষ্ম । পাণ্ডবগণকে সংহার ক'রব ব'লে কর্ণ সর্বদা আত্মশ্লাঘা করে
থাকে, কিন্তু আমি ব'লছি পাণ্ডবগণের যে ক্ষমতা, কর্ণে তার ষোড়শ
ভাগের একভাগও নাই ।

কর্ণ । পাণ্ডবানুকূল জরাজীর্ণ গাঙ্গেয়ের মতে ।

ভীষ্ম । তুমি নিশ্চয় জানবে মহারাজ, তোমার দুর্ভাগ্য পুত্রগণের যে
দুর্ঘতি উপস্থিত হবে, সেটা দুর্ঘতি সূতপুত্র কর্ণের কর্ম । মহাত্মা পাণ্ডবগণ
যে সমস্ত দুষ্কর কর্ম ক'রেছে, কর্ণ কি সেরূপ কোনও একটা কর্ম করেছে ?

কর্ণ । প্রয়োজন হয়নি ।

ভীষ্ম । প্রয়োজন হয়নি ? ধনঞ্জয় যখন বিরাট নগরে কর্ণের প্রিয়তম
ভ্রাতাকে বিনষ্ট করেছিল, তখনও কি তার পুরুষোচিত কর্মের প্রয়োজন হয়নি ?

কর্ণ । নারীবেশীর সঙ্গে যুদ্ধ, যেটা পিতামহও ক'রতে পরাভুখ ।

ভীষ্ম । এখন ইনি বৃষের গ্রায় আফালন ক'রছেন । মহারাজ !
কর্ণকে একবার জিজ্ঞাসা কর ঘোষণাত্মক সময়ে গন্ধর্ষগণ যখন তোমার
পুত্রদের হরণ ক'রেছিল, তখন উনি কোথায় ছিলেন ?

কর্ণ । সেইস্থানেই ।

ভীষ্ম । তবে ! তখনও কি দুষ্কর কর্ম করবার প্রয়োজন হয়নি ?

কর্ণ । হয়েছিল পিতামহ । ইচ্ছা হ'য়েছিল
নিমেষে গন্ধর্ষকুল করিতে নির্মূল ।

ভীষ্ম । কি হেতু দমিলে ইচ্ছা ? বলো—বলো—বলো,
বলিতে সঙ্কোচ কেন রাধার নন্দন ?

কর্ণ । সেই সঙ্কে হ'ত হত আর্তনাদকারী
যত কোরব রমণী । শব্দ—শব্দ—চারি
দিক হ'তে ছুটে এলো অসংখ্য শব্দের
বাণি । হাতে গন্ধর্ষ-বিলয়-মুখা বাণ—
সহসা উঠিল, উল্লাস ভেদিয়া নারী-
আর্তনাদ । আবার—আবার—নারীহত্যা ।
এ হ'তে অধিক কথা বলিতে কি হবে
পিতামহ ?—

ভীষ্ম । (চিন্তিতভাবে বসিলেন)

দ্রুত । হে সঞ্জয়, কি বলিল প্রাজ্ঞ যুধিষ্ঠির ?

রূপ । রাজা,—রাজা—প্রশ্নে ক্ষান্ত দিন, আদেশ করুন
পুত্র—পাণ্ডবে গ্ৰাঘ্যাংশ দিতে দান ।
প্রাজ্ঞ-সুসম্মত কার্য্য কর মহামতি ।

দ্রুত । যুধিষ্ঠির যুদ্ধের কিরূপ আয়োজন ক'রেছেন সঞ্জয় ?

সঞ্জয় । সভাস্থলে সকলের সম্মুখে এক কথায় বলি মহারাজ, তিনি
যা উল্লেখ করেছেন তাতে, যদি যুদ্ধ হয়, কোরবকুলের বিনাশ
অপরিহার্য্য । তিনি আপনাকে অনুরোধ ক'রেছেন, পুত্রকে যুদ্ধ থেকে
নিবৃত্ত ক'রতে । বলেছেন, দুর্যোধন একাদশ অক্ষৌহিণীর অধিনায়ক
হ'লেও একমাত্র ধর্ম আমার সহায় । সেই ধর্মকে আশ্রয় ক'রে আমি
সন্ধি ও বিগ্রহ উভয়েই সম্মত আছি । আপনার পুত্রকে বলতে বলেছেন,
হয় আমাকে ইন্দ্রপ্রস্থ-পুরী প্রদান কর, না হয় যুদ্ধে অগ্রসর হও ।

ধৃত । সঞ্জয়, সঞ্জয়, মন্দমতি পুত্র মোর—
শুনে না আমার কথা । বুঝি কুরুবংশ
ধ্বংস হয় একমাত্র তার অপরাধে !

কর্ণ । বৃথা তিরস্কৃত হ'তে সখা, কেন এলে ?
অকাবণ তিরস্কৃত দেখিতে আমারে,
মোরেই বা কি হেতু আনিলে ? বৃথা তর্কে
কালক্ষেপ নীতিজ্ঞের হয় না উচিত ।
বক্তব্য তোমার যদি থাকে, বল রাজা,
সাহস করিয়া বল সবার সম্মুখে ।

দুর্যো । বৃথা ভয়ে ভীত হয়ে আমাকে কেন তিরস্কার করছেন পিতা ?

ধৃত । আত্মীয় স্বজন নাশ— দুর্যোধন, বড় ভয়— বড় ভয় !

দুর্যো । আত্মীয় স্বজন নাশ কার ? আমার নয়— ছন্নমতি হ'য়ে
তারা যদি যুদ্ধ কর'তে চায়, আত্মীয় স্বজন নাশ পাণ্ডবের ।

ধৃত । হিতৈষিগণ তোমাকে যুদ্ধ হ'তে নিবৃত্ত হ'তে বলছেন :

দুর্যো । যারা আমার গ্ৰাঘ্য প্রাপ্য রাজ্য ভয় দেখিয়ে পাণ্ডবগণকে
ফিরিয়ে দিতে বলে, পিতা, হিতৈষী নয় তারা— পাণ্ডবদের চাটুকায় ।
দেবতারা পাণ্ডবগণের সহায়, এই কথা শুনে আপনার যে ভয় হ'য়েছে,
সে ভয় আপনি পরিত্যাগ করুন ।

তারা যদি দৈববলে হয় বলীয়ান—
আমিও সে দৈববলে বলীয়ান পিতা ।
হতাশন সহায় আমার । নিত্য তাঁরে
করি আমি গৃহে আমন্ত্রণ । কেহ নাহি
জানে । চতুর্দিকে বিক্ষিপ্ত হইয়া পিতা,
ভয়ভৃত করিবারে শত্রুর বাহিনী
প্রশান্ত আছেন তিনি আমার ইচ্ছায় ।

ইচ্ছা যদি করি, চক্ষুর নিমেষ মাতে
রসাতলে দিতে পারি সমাগরা ধরা ।
সমুন্নত গিরিশৃঙ্গে করিয়া আস্থান
দর্শক সম্মুখে এখনি আনিতে পারি ।
জলস্তুত্র একুপ বিরাট, মহারাজ,
মুহূর্ত্তে রচিত্তে পারি আমি, যার গর্ভে
প্রবিষ্ট হইয়া বিলীন হইতে পারে
পাণ্ডবের কতশত সপ্ত-অক্ষৌহিনী ।

ধৃত ।

সঞ্জয়—সঞ্জয়, কি ব'লেছে ভীমসেন ?

দুর্যো ।

শুনিবার কিছুমাত্র নাহি প্রয়োজন ।
আত্মশ্লাঘা করা নহে উদ্দেশ্য আমার ।
হীন আত্মশ্লাঘা কখনো করিনি আমি
অর্জুনের মত । আজ বালি মহারাজ,
ভীষ্ম, দ্রোণ, কৃপাচার্য্য—চাহি না সহায়
এই তিনে । তাঁরা সুখে লউন বিশ্রাম ।
এক কর্ণ—ভীষ্ম, দ্রোণ, কৃপের সমান ।
আমি, কর্ণ, ভাই দুঃশাসন—উপদেষ্টা
তীক্ষ্ণ বুদ্ধি মাতুল শকুনি—এই চারি
জনে মিলি', ভুবন করিতে পারি জয় ।
এই চারি মিলি', নিশ্চয় নিশ্চয় পিতা,
সবকু পাণ্ডবগণে করিব সংহার ।
হে সঞ্জয় ! ফিরে যাও বিরাট নগরে,
বলে' এস যুদ্ধিষ্ঠিরে, বিনা যুদ্ধে আমি
স্বচ্যগ্র প্রমাণ ভূমি দিব না পাণ্ডবে !

কর্ণ ও শকুনি সাধুবাদ করিলেন

ধৃত । বিচার—বিচার কর বৎস দুৰ্য্যোধন ।
 দুৰ্য্যো । বিচার বিতর্কে আমি করিয়াছি স্থির—
 সূচ্যগ্র প্রমাণ ভূমি দিব না পাণ্ডবে ।
 কর্ণ । স্বগৃহে করুন অবস্থান হে রাজন
 লয়ে সঙ্গে ভীষ্ম, দ্রোণ, অশ্বথামা, কৃপে ।
 সৈন্য লয়ে একা আমি যাব রণস্থলে ।
 অজ্জুন-বধের ভার লইলাম আমি ।
 ভীষ্ম । ওরে কাল-হত-বুদ্ধি কর্ণ ! ওরে হীন
 সূতপুত্র, আত্মশ্লাঘা কর কা'র কাছে ?
 দুৰ্য্যোধন, দুঃশাসন, দুঃরাঅ্যা শকুনি,
 আর ওই পুত্র মোহে আত্মহারা রাজা—
 হ'তে পারে এরা মুঞ্চ তোমার প্রলাপ-
 বাক্য শুনি । মুঞ্চ না হইবে ভীষ্ম, মুঞ্চ
 নাহি হইবেন শত্রু-গুরু দ্রোণ । আমি
 বুঝিয়াছি কি শক্তির তুমি অধিকারী ।
 তথাপি তোমাতে বলি—বুদ্ধি বুলিয়া !
 বলি শুন, এই মোর শেষ উপদেশ,
 শুনিয়া—তোমার এই মোহাক্ষ বাক্যব-
 গণ মনে নিজাত্মাকে কর সুসংযত ।
 নিজের অকাল মৃত্যু করি আবাহন
 অকালে কোরব কুল নিক্ষেপ ক'র না
 মৃত্যুমুখে । বাণ শু নরকহস্তা ওই
 বাসুদেব পশ্চাতে যাহার, এ জগতে
 কেহ নাই হেন শক্তিধর—পরাজিত
 করে ধনজয়ে ।

কর্ণ ।

শুন রাজা দুর্যোধন,
 প্রতিজ্ঞা করিয়া আমি এই সভাস্থলে
 করিলাম অস্ত্র পরিহার । যতদিন
 জীবিত রবেন পিতামহ, ততদিন
 কেহ না দেখিবে মোরে কোরব সভায়,
 কেহ না দেখিবে দাঁড়াইতে রণাঙ্গনে ।
 যেই দিন সমরে পড়িবেন পিতামহ,
 সেইদিন অস্ত্র পুনঃ করিব গ্রহণ ।
 সেইদিন হ'তে কর্ণের পৌরুষ রাজা,
 দেখিবে জগৎ-বাসী । ক্ষুধা হইয়ো না
 সখা, আশঙ্কার কণা আনিয়ো না মনে ।
 সমরে, অর্জুন-নাশ সঙ্কল্প করিয়া
 আজি হ'তে আমি ব্রতধারী । দেব, নর,
 বিজ, বিজেতর—যে কেহ—যে কেহ প্রার্থী
 আসিয়া আমার বাসে, যে বস্তু করিবে
 ভিক্ষা, থাকিতে আমার দেয়, না করিব
 নিরস্ত তাহারে ।

প্রস্থান করিতে করিতে কিরিয়া

পিতামহ । হীন জাতি
 সূতপুত্র বলে' প্রতিদিন সভাস্থলে
 হেয়জ্ঞানে আগারে করেন তিরস্কার ।
 শুনি, আমি মনে মনে হাসি । আমি জানি
 আমি নহি হেয়, হীন । তিরস্কারে নিত্য
 গর্ভ করি অলুভব, রাধেয় জানিয়া
 আপনারে । তবে সত্য করুন শ্রবণ

সর্ব সভাস্থ মণ্ডলী—

সত্য যদি হই আমি রাধার নন্দন,
সত্য যদি অধিরথ পিতা, বজ্রহস্তে
বাসব দাঁড়ান যদি পুত্রের পশ্চাতে
সুদর্শন ক'রে আচ্ছাদন, বেদ যথা
সত্য, সেই মত সত্য—সত্য—এই সূতপুত্র-
কর-ক্ষিপ্ত বাণের প্রহারে, ওই
তব গাণ্ডীবীর নিশ্চয় বিনাশ ।

এহান

দুর্যো । এ কি করিলেন পিতামহ ?
ভীষ্ম । কোন ভয় নাই
বৎস দুর্যোধন ! গাঙ্গেয় জীবিত আছে,
সে তোমার উপচার ক'রেছে গ্রহণ ।
জীবিত থাকিতে ইচ্ছামৃত্যু দেবব্রত—
কখন পাণ্ডব জয়ী হবে না সংগ্রামে ।

দ্বিতীয় দৃশ্য

পাণ্ডব শিবির

যুধিষ্ঠিরাদি, কৃষ্ণ ও দ্রৌপদী

যুধি । হে মাধব, দূত-মুখে এসেছে উত্তর—
সঙ্কর শুনায়ে গেল মোবে, বিনাযুদ্ধে
স্বচ্যগ্র প্রমাণ ভূমি দিবে না কোঁরব
কৃষ্ণ । আমিও সঙ্কর মুখে শুনেছি রাজন ।

- যুধি । চাহিলাম প্রাপ্য অধিকার, অন্ধ রাজা
 পুত্রমোহে প্রাপ্য রাজ্য দিল না আমারে !
 শাস্তি-অভিলাষে চাহিলাম পঞ্চগ্রাম—
 ভিক্ষকের মত, ক্ষুদ্র পঞ্চ জনাবাস,
 আসিল উত্তর, প্রিয়তম, বিনাযুদ্ধে
 সূচ্যগ্র প্রমাণ ভূমি পাবে না পাওব ।
- কৃষ্ণ । মহারাজ ! এ কথাও শুনিয়াছি সঞ্জয়ের মুখে ।
- যুধি । কি কর্তব্য কৃষ্ণ ? এই মহাভয় হ'তে
 পরিত্রাণ করিতে আমারে, একমাত্র তুমি ।
- কৃষ্ণ । ভয় । আপনার ? নাম
 যুধিষ্ঠির । শত যুদ্ধে, সহস্র বিপদে
 স্মেরু অচলমত স্থিরত্ব যাহার,
 আজ তার কারে ভয়, ধর্মরাজ ?
- যুধি । ভয়, ভয়,
 মহাভয়—মূর্ত্তচিন্তায়, হে কেশব,
 এ হৃদয় মুহমূর্ছঃ হ'তেছে কম্পিত ।
 ক্ষাত্রধর্ম—নষ্ট রাজ্য করিতে উদ্ধার
 পলে পলে আমারে করিছে উত্তেজিত ।
 কিন্তু প্রাণাধিক, সঙ্কে সঙ্কে ফুটে চোখে—
 যেমনি মানসে ভীম-যুদ্ধ করিছে কল্পনা,—
 ফুটে ওঠে ভীম-দৃশ্য লয়ে—নিয়তির
 ঘনতম অস্তরাল হ'তে, ছিন্ন, ভিন্ন,
 বিক্ষিপ্ত প্রান্তরে, বিনষ্ট কৌরবকুল ।
 স্মরণে শিহরে অন্ধ । তাহার ভিতরে
 কত যে বালক—নির্মল, কোমল, শুভ্র,

কন্দ-পুষ্পমত, জাগরিত বিকশিত
 প্রাতে—মুদিত সঙ্ক্যায়—নিষ্ঠুর নিয়তি
 গলে যেন রক্ত-রাগ করবীর মালা ।
 অন্তদিকে কোরব আত্মীয়—পাণ্ডবের
 গুরুজন—চিরহিতাকাজ্ঞী মোর তাঁরা ।
 আছেন মহান্ পিতামহ !

কৃষ্ণ । জানি আমি মহারাজ !

অর্জুন । আছেন আচার্য—

কৃষ্ণ । জানি আমি । সখা ! জানি আমি তোমার
 নিষ্ঠুর বাণে সকলে লুটাবে ধরাতলে ।

যুধি । কি কর্তব্য জনাৰ্দ্দিন ?

কৃষ্ণ । কোরব সভায় আমি যাব মহারাজ ।

যুধি । তুমি যাবে !

কৃষ্ণ । অনন্ত উপায়—

সর্বশেষে কর্তব্য বিধান, যদি পারি,—
 একবার যেতে হবে মোরে হস্তিনায়
 দূতরূপে । আপনার স্বার্থ অব্যাঘাতে
 যত্নপি করিতে পারি শান্তির স্থাপন,
 একবার প্রয়াস করিব আমি ।

যুধি । দুৰ্যোধন হিতকথা তুলিবে কি কানে ?

কৃষ্ণ । না তুলুক, তথাপি যাউব মহারাজ !

যুধি । যত্নপি অনিষ্ট করে ?

কৃষ্ণ । প্রচেষ্টা করিতে পারে । পাপাভিনিবেশ
 তার সবিশেষ জ্ঞাত আছি আমি ।
 তথাপি সঙ্কল্প মোর স্থির ।

- যুধি । তবে যাও ইচ্ছাময়, কিন্তু অভিপ্রেত
নহে মোর । ছন্নমতি দুৰ্য্যোধন—আর
ঘেরিয়া তাহারে চারিধারে ছন্নমতি
যতেক পার্শ্বদ—
- ভীম । আছে ঘণ্য দুঃশাসন—
অতি ঘণ্য কূটবুদ্ধি মাতুল শকুনি—
- অর্জুন । সবার উপর ঘণ্য দুষ্ট-বুদ্ধি দাতা
আত্মশ্লাঘাকারী সেই রাধার নন্দন ।
- ভীম । কমললোচন ! তুমি যে লোচন ভাই,
পাণ্ডবের !
- দ্রৌপদী । (নতমস্তকে) বিশেষতঃ দ্রৌপদীর ।
সভাস্থলে একবস্ত্রা—ভীষ্ম, দ্রোণ, কৃপ,
বাহুলীক, সৌগর্ভ—কত রাজা । আরো দুঃখ—
পঞ্চ-ইন্দ্র তুল্য পঞ্চ স্বামীর সন্মুখে
মুক্তকেশে ধরা—মুক্তচোখে সারা বিশ্ব
অন্ধতায় ভরা—বিশেষতঃ দ্রৌপদীর ।
যদি ইচ্ছা জাগিয়াছে যাওহে মাধব ।
কৃতার্থ হইয়া নিব্বিরে এখানে পুনঃ
কর আগমন । তোমার প্রসাদে ভাই,
কৌরব পাণ্ডব আবার প্রশান্ত চিত্তে
একত্র মিলিয়া পরমানন্দে কাল যেন
করেহে ষাপন । আমাদের ভ্রাতা তুমি,
অর্জুন তোমার প্রিয় সখা ! কি বলিব ?
মঙ্গল নিদান । আশীর্বাদ—সুমঙ্গল
হউক তোমার ।

কৃষ্ণ ।

বলিয়াছি ধর্মরাজ,
 আপনার অক্ষুণ্ণ রাখিয়া স্বার্থ, শাস্তি
 প্রতিষ্ঠার, যথাসাধ্য করিব প্রয়াস ।
 যদিও বিশ্বাস মোর সফল হ'ব না দৌত্যে—
 কিছুতেই কোরব না হইবে সম্মত,
 তথাপি উদ্দেশ্য সিদ্ধ হইবে রাজন !
 জগতের চোখে—হবেন অনিন্দনীয়
 মহারাজ যুধিষ্ঠির ।—দাদা বৃকোদর ?

ভীম ।

ধর্মরাজ-ইচ্ছা পূর্ণ কর প্রিয়তম !

কৃষ্ণ ।

এই মত আপনার ?

ভীম ।

কতু হই নাই,
 ইষ্টসম জ্যেষ্ঠ ভ্রাতৃ-মতের বিরোধী ।
 কর কৃষ্ণ, কর ভাই শাস্তির স্থাপন ।
 সভায় যুদ্ধের কথা তুলি' করিয়ো না
 যেন সঙ্গস্ত কোরবে । কটুক্তি ক'র না
 দুর্ঘোষনে । সাস্তুবাদে তুষ্ট ক'র তারে ।
 সান্তিশয় কোপন স্বভাব, শ্রেয়োদেষ
 পাপ-পরায়ণ, ক্রুরকর্মা, হীনমতি,
 নীচ, শঠ, মিথুর, কর্তৃত্ব-অভিমানী—
 জীবন করিবে ত্যাগ তথাপি কাহারো
 কাছে হইবে না নত । সাস্তুবাদে শাস্ত
 রূপে সন্তুষ্ট করিয়ো তারে । এই মত
 আমার কেশব । শুধুই আমার নয়,
 এই মত—পরম দয়াল অর্জুনের ।

কৃষ্ণ ।

দাদা বৃকোদর, একথা তোমার মুখে ?

ক্রুরকর্মা কুরুগণ সংহার মানসে,
 সর্বদা যাহার মুখে প্রশংসা যুদ্ধের
 আপনি কি সেই বৃকোদর ?
 ভীম প্রাতঃজ্ঞার কথা—পাছে স্বপ্নে হয়
 বিশ্বরণ—এই আশঙ্কায় হৃদয়ে
 করিয়া শয়ন, জাগিয়া আছেন যিনি
 ত্রয়োদশ বৎসর রজনী—আপনি কি
 সেই ভীমসেন—ভীমব্রতধারী !
 অপ্রশাস্ত, সতত দারুণ—নিত্য যার
 মুখ হ'তে অবিপ্রাস্ত হয় বিনির্গত
 সধুম অনলমত ক্রোধের ফুৎকার,
 ক্রোধোচ্ছ্বাসে মদপ্রাবী মাতঙ্গের গায় !
 উন্নত ছুটিতে পথে যার পদাঘাতে
 নির্মূল হইয়া বৃক্ষ পড়ে ভূমিতলে,
 সেই কি আপনি বিশ্বনাশ শক্তিধর
 দ্বিতীয় মারুতি ?

ভীম । (দ্রুতবেগে কিয়ৎক্ষণ গমনাগমন করিয়া উন্নতের মত বক্ষ-
 রক্ত পান ও উরুভঙ্গের অভিনয় করিলেন । পরে ফিরিয়া বলিলেন—)

তথাপি—তথাপি—কৃষ্ণ,
 কর তুমি ধর্মরাজ-আদেশ পালন ।

অর্জুন । ধর্মের রহস্যজ্ঞাতা, মহাত্মা পাণ্ডব-
 শ্রেষ্ঠ রাজা করিলেন যে আজ্ঞা তোমারে,
 কোরব সভায় গিয়া, প্রতি বাক্যে, কার্যে
 সে আদেশ পালন করিয়ো তুমি সখা ।

কৃষ্ণ । বাক্যে, কার্যে, সঙ্গির স্থাপনে

করিব প্রয়াস যথাসাধ্য—যথাশক্তি ।

কিন্তু বিশ্বাস আমার সখা—

অর্জুন । কৃতকার্য হইবে না তুমি । তোমার মধুর সখ্যে—
আমিও তা জানি বাসুদেব ! জানি—জানি,
তথাপি—তথাপি—সখা—আমার সাগ্রহ
অনুরোধ—কৌরবের তথা পাণ্ডবের
সমান আত্মীয় তুমি—আমার সাগ্রহ
অনুরোধ—প্রথমে দেখাবে তুমি মৈত্র ।

কৃষ্ণ । অবশ্য দেখাব মতায়নু ।

অর্জুন । কিন্তু মৈত্রে যদি কার্য সিদ্ধ নাহি হয়,—

কৃষ্ণ । বল সখা ?

অর্জুন । তখন শুনাবে মোর পণ ।

শুনাইবে প্রতি দুরাশ্রয়, শুনাইবে
সভাগত প্রতি মহাত্মায়, কপিধ্বজ-
সারথি-সহায় প্রচণ্ড গাণ্ডীব-ধন্বা
তৃতীয় পাণ্ডব এক প্রাণী রাখিবে না
কৌরবের বংশে দিতে বাঁত ।

কৃষ্ণ । তাই বল, হে গাণ্ডীবী, আগে হ'তে তুমি
যারে বধ্য বলে করিয়াছ জ্ঞান,
জানিও নিশ্চয় অগ্রেই সে হতভাগ্য
হয়েছে নিহত । প্রিয় ভ্রাতঃ চতুর্থ পাণ্ডব !
আছে কিহে তোমার বক্তব্য কিছু ?

নকুল ।

বক্তব্য অনেক

ছিল, জনার্দন, শুনাইতে আপনারে
প্রকাশে—গোপনে । সন্ধি ইচ্ছা কিছুমাত্র

ছিল না আমার । তবে—জ্যেষ্ঠ ইষ্টসম,
বদান্ত, ধর্মের মূর্তি সন্ধির প্রয়াসী ।
বক্তব্য আমার আর্থা, যেভাবে সম্ভব
সর্ববিধ কুশল চেষ্টায় হিতবাক্যে
করিবেন দুর্ঘোষনে সন্ধিতে সম্মত ।

কৃষ্ণ । মাধোর সামান্য ক্রটি করিব না ভ্রাতঃ ।

হে তাত মাত্যকি, সত্বর প্রস্তুত হও,
প্রভাতে যাইব আমি হস্তিনা নগরে ।

সহ । হে পাণ্ডব-সখা, শুনিতে কি ইচ্ছা নাই
আমার কি মত ?

কৃষ্ণ । বল প্রিয় শুনি আমি—

জীবন-মরণ প্রশ্ন, সম-অধিকার
সকলেরি মত দানে । শুনুন সকলে—
বল তুমি । হেঁটমুণ্ডে সখী মোর—দাণ্ড
ভাই, শুনাইয়া তাঁরে বক্তব্য তোমার ।

সহ । যেন, কোনমতে সন্ধি নাহি হয় ! ভিক্ষা,
এইটি আমার একমাত্র—পদমূলে তব জনার্দন !
যতপি কেশব, আপনার কাছে তারা
স্বৈচ্ছায় করিতে আসে সন্ধির প্রস্তাব—
তথাপি, তথাপি যুদ্ধ—যুদ্ধ । হে অরাতি-
নিপাতন কৃষ্ণ ! কৃষ্ণার সে অপমান
রাখিতে পারেন জ্যেষ্ঠ ধর্ম আবরণে,
পারেন ভুলিতে মহামতি ভীমার্জুন,
আমি ভুলিব না । আর চরণে মিনতি,
তুমি যেন ভুলিয়ে না—তুমি ভুলিয়ে না ।

দুঃশ্রাব্য নির্ধুর বাক্যে—যে কোন উপায়ে
উত্তেজিত করি' সেই নীচাত্মা কোরবে
যুদ্ধের সংবাদ লয়ে এস কৃষ্ণ ফিরে ।

সাত্যকি । হে পুরুষোত্তম, যা বলিলা সহদেব,
করজোড়ে আমিও তোমারে তাই বলি ।
দুঃশাসন-বক্ষরক্ত যতদিন প্রভু,
বুকোদর -শ্রীঅধর না করে রঞ্জিত,
যতদিন সেই পাপমতি দুঃখ্যাধন,
উরুভঙ্গে ভূতলে না হয় বিলুপ্তিত,
আমারো না হবে শান্তি-- নিদ্রা নাহি হবে,
এ জীবন রবে প্রভু মরণে জড়িত ।

দ্রৌপদী । করিতে সন্ধির ভিক্ষা, হস্তিনা নগরে
এখন কি যাইবে গোবিন্দ ?

কৃষ্ণ । রজনী-প্রভাতে সখা ।—

দ্রৌপদী । ধর্মরাজে শত নমস্কার । শান্তিপ্রিয়
যুদ্ধভীত দ্বিতীয় পাণ্ডব, তাঁহারেও
করি নমস্কার । তৃতীয় তোমার সখা—
নমস্কার তিরস্কার সমান তাঁহার ।
চতুর্থ বালক—অগ্রজে ভক্তির বশে—
মর্ষ ছিঁড়ে সন্ধির সম্মতি মুগ্ধ হ'তে
ক'রেছে বাহির । সহদেব যদি সখা
না কহিত কথা, যদি, বিবেক-প্রেরণে
মহাত্মা সাত্যকি তার বাক্য না করিত
সমর্থন, ভূমি-লগ্ন মস্তক আমার
হে গোবিন্দ ভূমি হ'তে আর না উঠিত ।

কৃষ্ণ । ধর্ম-রাজ-বাক্য সখী, কর প্রণিধান ।

অনুরোধ, হ'য়োনা ব্যাকুল ।

দ্রৌপদী । ব্যাকুল আমারে তুমি কোথায় দেখিলে
হে মাধব ? ক্রপদনন্দিনী আমি, দীপ্ত—
বহ্নিশিখা সম ধুট্টদ্যম্নের ভগিনী,
বাসুদেব প্রিয়সখী, পাণ্ডুরাজ সূষা,
ভূমণ্ডলে অতুল সৌভাগ্যবতী নারী—
সেই আমি, এই মুক্ত কেশরাশি ল'য়ে,
ত্রয়োদশবর্ষ ধ'রে এই পৃষ্ঠদেশে
সহিতেছি হে মাধব—নিত্য সহিতেছি—
প্রতিপলে—অগ্নিজিহ্বা সংস্র ফণার
বজ্রজ্বালা প্রচণ্ড দংশন, চিররুদ্ধ
মৃত্যুর নিশ্বাসে । ব্যাকুল দেখিলে তুমি
মোরে ? কখন কোথায় জনাৰ্দন ?

কৃষ্ণ । কেঁদোনা, কেঁদোনা সখি !

দ্রৌপদী । এই ত শুনিমু কর্ণে,
দুঃশাসন-বক্ষরক্ত-পান-পণকারী
ভীমসেন মুখ হ'তে শাস্তির বচন ।
এইত শুনিমু হে দয়াল, তব সখা,
পরম দয়াল, কি কোমল স্বর ল'য়ে
গাহিল শাস্তির গান ।—কি বিচিত্র—তব
বল সখা, চঞ্চল কি দেখিলে আমারে ?
কুরুসভাস্থলে ভূবিজয়ক্ষম পঞ্চ
স্বামীর সম্মুখে, একবস্ত্রা—আর, থাক—
আর বলিব না—যে কর করিল এই

কেশ আকর্ষণ, সেই করে কর দিয়ে
 প্রেমবন্ধ আলিঙ্গনে প্রিয় হৃ:শাসনে
 বাঁধিতে কি চ'লেছ কেশব ? হৃষ্যোধন-
 পার্শ্বে বসে' শাস্তি-স্নিগ্ধ করে'র পরশে,
 সে বিজয়ী নৃপতির, সদস্ত চালিত
 উরু-সেবা করিবে কি ধীর বৃকোদর ?
 বলহে গোবিন্দ—বল—রাত্রি স্নগভীর,
 শুনে নিশ্চিত ঘুমাই আাম ।

কৃষ্ণ । অরুরোধ করজোড়ে কেঁদোনা কেঁদোনা
 তুমি—ওগো প্রিয়তম-প্রিয়া !
 এনোনা আমা'রো চোখে জল ।

দ্রৌপদী । কাঁদিতে কি জান হৃষীকেশ ?
 না—না—হে সখে গোবিন্দ, কি ভ্রম আমার !
 যে অশ্রু হে কমললোচন, —প্রবাহিয়া
 ধারায় ধারায়, ধরিয়া বসন মূর্তি
 সভাস্থলে লজ্জা রক্ষা করেছে আমার—
 সেই করুণার অশ্রু, হে করুণাময়,
 কে ভুলাল আজি মোরে ?

কৃষ্ণ । কেঁদোনা কেঁদোনা,
 কৃষ্ণে, এনো না কৃষ্ণের চোখে জল ।

অর্জুন । নারীর লোচন-জলে হইয়ো না মুগ্ধ
 বাসুদেব ! কোরবের তথা পাণ্ডবের
 প্রধান আত্মীয় তুমি, কোরবের মধ্যে
 আছে বহু নরনারী, যাহারা তোমা'রে
 জীবন-সর্কস্ব করে জ্ঞান । ধর্মরাজ-

আজ্ঞা তুমি যথাসাধ্য করিবে পালন !
 স্মার্ত্ত্য মাহল্য বাক্য যদি না সে শুনে,
 তাই হবে,—অদৃষ্টে তাহার যাহা আছে ।

.দ্রোপদী । এই বটে—এই বটে—পাগুবের এই
 বটে অভিমান-তীব্রতার পরিণাম ।
 “তাই হবে অদৃষ্টে তাহার যাহা আছে”
 কি মিষ্ট আশ্বাসবাণী শুনালে কৃষ্ণারে
 তব, কৃষ্ণ-সখা ধনঞ্জয় ! যাও, যাও
 সবে নিশ্চিন্তে ঘুমাও—নিশ্চিন্ত সঙ্কীর
 ওই মধুর বিশ্বাসে করিয়া ভ্রান্তির
 উপাধান । আর তুমি ? তোমাকে বিক্রার
 দিতে, সাহস না হয় বৃকোদর ! সত্য
 দেখিয়াছি আমি ত্রয়োদশ বর্ষব্যাপী
 অনিদ্রা তোমার—দেখিয়া কেঁদেছি । যাও,
 পার যদি—পার যদি—তুমিও ঘুমাও—
 বৃকোদর, ত্রয়োদশ বর্ষব্যাপী সেই
 অনিদ্রার অন্তরাত্রে কর প্রতিকার ।
 কি করিব ? এই সব কথা শুনে, এই
 সমস্ত আশ্বাসবাণী সম্বল করিয়া
 হতাশ নিশ্বাসে বক্ষ বিচূর্ণ করিব ?
 কেন—কেন ? অগ্নিশিখা শিরে যদি
 জনম আমার, উত্তাপ ভিক্ষার আমি
 কোন্ দীপশিখা মুখে বাড়াইব কর ?
 আমি যাব । ঘুমালি কি পঞ্চ পুত্র মোর ?
 ঘুমালি কি অভিমন্যু ? ওরে অগ্র ; ওরে

আর্য্য, ওরে শ্রেষ্ঠ সন্তান আমার ! তোর
 পঞ্চ অমুচর সনে তুইও কিরে আজি
 অস্ত্র আত্মহারা মত পড়িয়া শযায় ?
 আয়—উঠে আয়—তোদের সকলে সঙ্গে
 ল'য়ে কৌরববিনাশে নিজে যাব আমি ।

সদ্য নিদ্রোথিত অভিমন্যুর প্রবেশ ও দ্রৌপদীসহ প্রস্থান

তৃতীয় দৃশ্য

কর্ণ-ভবন—বিশ্রাম কক্ষ

বৃষকেতু

গীত

একেলা মন্দিরে ব'সে
 কথা কয় সে হেসে হেসে
 অনুরাগে আসে সুর বাহিরে ।
 শুনে আমি ছুটে যাই,
 দেখা যেন পাই পাই,
 আমি যে তাহার দেখা চাহি রে ।
 তাহার কানের কাছে
 আমার কি কথা গেছে ?
 কেন সে লুকিয়ে আছে ?
 আমি ত একেলা আছি আর কেহ নাহিরে ।
 আমি যে তাহারি সুরে গাহিরে ।

হে গোবিন্দ, চারিদিকে লোকমুখে শুনি
 তুমি নাকি আসিতেছ হস্তিনা নগরে,

বড় ইচ্ছা দেখিব তোমারে । হে গোবিন্দ,
কেমনে দেখিব !

কর্ণের প্রবেশ ও বৃষকেতুকে প্রস্থানের ইঙ্গিত, বৃষকেতুর প্রস্থান

কর্ণ । অস্তর্যামী বিভূ নারায়ণ ! বাসুদেব !
তুমি যদি সেই নারায়ণ, যদি এই
অসম্ভব সত্যই সম্ভব হয়,—ওই
ক্ষুদ্র দেহের ভিতরে সত্যই যদি হে
বিরাট পশিয়া করে লীলা, এ অস্তরে
কি আছে আমার, সমস্ত অবশ্য জান
তুমি । এই যে আমার দেহ-আবরণ—
এই বর্ম—সহজাত, দেবের (ও) অচ্ছেদ্য—
এ ত পারিবে না—কোন মতে পারিবে না,
এ হৃদয়ে তোমার দর্শনে দিতে বাধা !
এই সত্য আবিষ্কারে ক'রেছি সর্বস্ব
দান পণ । এই সত্য আবিষ্কারে, আমি
জীবন-মরণ যুদ্ধে করিতে চ'লেছি
একমাত্র প্রতিদ্বন্দী তোমার সখায় ।
হে স্বরাট, যতপি বিরাট সত্য তুমি,
নিশ্চয় একথা জান—নরের অবধ্য
হ'য়ে এসেছি ধরায় । শুধু নর ? শ্রেষ্ঠ
ঋষি ব্রহ্মজ্ঞ রামের সে কথা যতপি
সত্য হয়, হে মায়া-মহুশ্য-নারায়ণ
তোমারও অবধ্য আমি । সেই আমি
কবচ কুণ্ডলধারী রাধার নন্দন
যদি মরি অর্জুনের বাণে—যদি—যদি

মরি, তবে, সেই মৃত্যু-মুখে বাসুদেব,
তোমাতে বলিব নারায়ণ ।

পদ্মাবতীর প্রবেশ

আজি, বছদিন—বছদিন পরে প্রিয়তমে ।
পদ্মা । বছদিন পরে—কি প্রাণেশ
বছদিন পরে তোমাতে আমাতে দেখা ?
বা ! বা ! কহিতে কহিতে নিরুত্তর * শূন্য
দৃষ্টি আকাশে নির্ভর—এত অগ্রমনা ?
কারণ কি শুনিতে অযোগ্যা আমি ?

কর্ণ । একমাত্র যোগ্য তুমি— তোমাতে বলিব পদ্মা
যেদিন প্রথম এই শ্রীকর গ্রহণে
তোমাতে ক'রেছি আমি জীবন-সঙ্গিনী.
সেই দিন প্রতিজ্ঞা করিয়াছিলুম—

পদ্মা । নাথ ! জানি আমি
সে প্রতিজ্ঞা । তাই কি বলিতে চাহ তুমি ?
কিন্তু আমি এ পর্যন্ত কখন তোমাতে.
গৃহকথা শুনিবারে করিনি পীড়ন ।

কর্ণ । সেই হেতু বলিব তোমাতে ।

পদ্মা । কত কথা
জানিতে আমার জেগেছিল কতদিন
কৌতূহল, প্রশ্নে—পাছে হে বিপন্ন হও
তুমি, সে সমস্ত ক'রেছি দমন ।

কর্ণ । সেই হেতু বলিতে তোমাতে
প্রস্তুত হ'য়েছি পদ্মাবতী ।

পদ্মা ।

তীব্র ইচ্ছা হ'য়েছিল জানিতে রাজন
জগতে অতুল শক্তিধর, এই মোর
হৃদয়-ঈশ্বর বর্তমানে, স্বয়ম্বর
সভামধ্যে বিস্মিত নিশ্চল নেত্র শত
শত রাজকৃত সন্মুখে, লক্ষ্যবিদ্ধ করি'
কেমনে লভিল, প্রভু, সে অপূর্ব নারী
পাঞ্চালীয়ে দীন দ্বিজবংশী ধনঞ্জয় !

কর্ণ ।

বৃথোন্ময় দেখিয়া রাজকৃতগণে পদ্মা,
সম্বর তুলিয়া শরাসন—যেই আমি
তাহাতে ক'রেছি জ্যারোপণ, কে অমনি
যেন কোথা হ'তে অশ্রুচ্ছ দুঃখের সুরে
উঠিল বলিয়া, “হায়, দেবভোগ্যা নারী
পাঞ্চালী পড়িল আজি স্মৃতপুত্র করে।”
চমকিত হইলাম । স স্বর শ্রবণে,
ঠিক যেন রাজা যুধিষ্ঠির—মর্ম হ'তে
আক্ষেপ করিল পদ্মাবতী । তাই শুনি,
অমনি পাঞ্চালী, সভামধ্যে উচ্চকণ্ঠে
উঠিল বলিয়া, রাজগণে শুনাইয়া,
“স্মৃতপুত্রে কভু না বরিব আমি !”

পদ্মা ।

আর প্রশ্ন করিব না রাজা ।—তবে—তবে কুরু—

কর্ণ ।

সভামধ্যে ! বল বল—কৌরব-সভায় ?

ভীষ্ম, দ্রোণ, কৃপ, কর্ণ, সবারি সন্মুখে

হইল যেদিন মহীয়সী দ্রৌপদীর

প্রচণ্ড লাঞ্ছনা ? বল—কি হেতু সঙ্কোচ—বল—বল ।

পদ্মা ।

মহীয়সী রমণী দ্রৌপদী—

নারীশ্বের আদর্শ—গৌরব । কিন্তু নাথ,
মহীয়সী নাঈবা হইল নারী ! নারী
মাতৃশ্বের মূর্তি—দেবতা উদ্ভব নারী
হ’তে । সূর্য্য-ইন্দ্র-মাতা কশ্যপ-গৃহিণী
অদিতিও নারী ।

কর্ণ ।

জানি আমি প্রিয়তমে ।

আমি জানি মহাবাক্য, ঈশ্বরী-প্রেরিত,
“জগতে সমস্ত নারী আমি ।” জানি আমি,
সমগ্র জগৎ-বাসী কভু করিবে না
আমার সে কার্য্য সমর্থন,—করিবে না,
করিতে পারে না । তথাপি তোমাং বনি,
দ্যুত-পণে মত্ততায় সহধর্ম্মিণীরে
দাসীত্বে নিক্ষেপ করি, সে অশুভ দিনে
সর্ব্বাপেক্ষা অপরাধী রাজা যুধিষ্ঠির ।

পদ্মা ।

আর প্রশ্ন করিব না রাজা !

কর্ণ ।

শুন রাণী

বা কিছু আমার কথা বলিবার আছে,
বলিব তোমায় আমি সময় অন্তরে ;
আজ শুন, বহুদিন পরে—এক কথা—
বহুদিন পরে কহিব তোমাং, এক
অত্যন্ত নিগূঢ় মোর অন্তরের কথা
যেদিন দ্বৈরথ-যুদ্ধে নিধন করিব
আমি তৃতীয় পাণ্ডবে, সেদিন জানিব
পদ্মাবতী ! শস্ত্র-শিক্ষা সফল আমার !

পদ্মা ।

শাস্ত্র, শিষ্ট, ধর্ম্মনিষ্ঠ তৃতীয় পাণ্ডব—

কি হেতু জন্মিল প্রভু, এমন বিদেষ
তার 'পরে ।

কর্ণ ।

বিদেষ কিছুই নাই— পদ্মা,

শ্রদ্ধা করি ধনঞ্জয়ে অন্তরে অন্তরে,

শ্রদ্ধা করি ধর্মপুত্র যুধিষ্ঠির হ'তে,

দেখিলে সম্প্রীতি জাগে, ইচ্ছা জাগে

বাহুর বন্ধনে— তথাপি তথাপি হয়

মরিবে গাণ্ডীবী, নয় আমি—একজন ।

যদিও শেষের কথা নিত্য উঠে মনে,

তথাপি দেবতা-ত্রাস ভীষণ সমরে

করিব অর্জুন সঙ্গে শক্তির পরীক্ষা ।

জন্ম সঙ্গে যে সম্পদ লয়ে --প্রিয়তমে,

এসেছি ভুবনে আমি—সে সর্ব সম্পদে

একমাত্র অধিকারী নারায়ণ । কতু

মানবের বধ্য আমি নহি প্রিয়তমে ।

বধ্য দেবতার ? এ কবচ, এ কুণ্ডল—না না

বেদ যদি সত্য হয়, ব্রহ্মর্ষি ভার্গব যদি

ন'ন মিথ্যাবাদী—

পদ্মা ।

দেবেরও অবধ্য তুমি !

কর্ণ ।

দেবের অবধ্য আমি । জলন্ত মহল

সেই হেতু নিত্য মোরে করে উত্তেজিত,

যুদ্ধিতে দৈরথ যুদ্ধে ধনঞ্জয় সনে ।

এ হ'তে অধিক ভাগ্য চাহিনাকো আমি ।

চাহিনাকো কর্তৃত্ব বিশ্বের । বহুদিন

পরে আজি সেই শুভদিন সমাগত ।

পদ্মা ।

হইবে দ্বৈরথ যুদ্ধ ?

কর্ণ ।

হইবে দ্বৈরথ যুদ্ধ ।

সত্য যদি সঙ্কল্প আমার—সত্য,
দেবতাও এ যুদ্ধ নারিবে নিবারিতে ।
ত্রয়োদশ বর্ষ পরে বিরাটনগরে
হইয়াছে পাণ্ডব প্রকট । পাঠায়েছে
ধর্মরাজ দূত হস্তিনায়, অন্ধরাজা
চাহি' অধিকার ।
জীবিত থাকিতে আম, সূচ্যগ্র প্রমাণ
ভূমি, দিতে নাই দিব দুয়োধনে । ফল—
যুদ্ধ—দেবতা-দানব-ক্রাস রণ । এক
দিকে একাদশ অক্ষৌহী—সপ্তমাত্র
অন্যদিকে একদিকে ভীষ্ম, দ্রোণ, কুপ—
অসংখ্য অসংখ্য মহারথী—

পদ্মা ।

অন্যদিকে একা ধনঞ্জয় ?

কর্ণ ।

ভয় পেলে পদ্মাবতী ?

পদ্মা ।

না প্রভু, সমস্ত বিশ্ব—সমস্ত মানব
যে যুদ্ধের ফল প্রতীক্ষায়, মুক্ত-চক্ষে
চেয়ে রবে নিরুদ্ধ নিশ্বাসে, দোখতে সে
যুদ্ধ পরিণাম, কর্ণ-পত্নী পাবে ভয় ?
তবে প্রভু, অনুমতি দাও যদি, বলি ।

কর্ণ ।

বল, কিন্তু কি বলিবে জানি প্রিয়তমে !

পদ্মা ।

কৌরব ম'রেছে বহুদিন ।

কর্ণ ।

জানি—জানি । যেদিন কৌরব সত্যমাঝে
রজঃস্বলা দ্রোপদীর হ'য়েছে লাহনা ।

- পদ্মা । সেদিন ম'রেছে ভীষ্ম, সেদিন ম'রেছে দ্রোণ ।
- কর্ণ । জানি—জানি । সেই সঙ্গে মরিয়াছি আমি ।
- পদ্মা । জানিয়া করিবে রণ ?
- কর্ণ । বড় প্রলোভন । প্রতিদ্বন্দ্বী ধনঞ্জয় ।
- পদ্মা । শুধু ধনঞ্জয় ? পশ্চাতে তাহার —
- কর্ণ । বল, বল—বাসুদেব ?
- পদ্মা । দুষ্ট-ধ্বংসকারী জনাৰ্দ্দন ।
- কর্ণ । জনাৰ্দ্দন আমারো পশ্চাতে প্রিয়তমে ।
- পদ্মা । বিভূরূপে থাকিতে পারেন তিনি ।
- এযে নররূপে প্রিয়তম !
- কর্ণ । নররূপে বিভ নারায়ণ । বাসুদেব নারায়ণ ?
- পদ্মা । নারায়ণ ।
- কর্ণ । এই অতি অশ্রদ্ধেয় বাণী
কে তোমা' শুনাল পাগলিনী ?
- পদ্মা । ব'লেছেন ঋষিশ্রেষ্ঠ ব্যাস,
ব'লেছেন চির সত্যবাদী পিতামহ,
ব'লেছেন সর্কার্থদর্শী মাহাত্মা সঞ্জয় ।
- কর্ণ । ভাল, নারায়ণ অস্তুর্যামী । বাসুদেব
যদি নারায়ণ—বাসুদেব অস্তুর্যামী ।
কর্ণের অস্তর সঙ্গে তাঁর পরিচয় ।
দ্বিগুণ উৎসাহে তবে, দ্বিগুণ আনন্দে
পদ্মাবতী, বাসুদেব-সখা ধনঞ্জয়ে
জীবন মরণ যুদ্ধে করিব আহ্বান !
লইব বিদায়—মহারাজ দুর্ঘোষন মোর
প্রতীক্ষায় প্রতিপল করিছে গণনা ।

পদ্মা । পুনরাগমন প্রতীক্ষায় প্রতিপল
আমিও রহিব রাজা সোদ্বিগ্ন অস্তরে ।

প্রস্তানোচ্চতা

কণ । (ফিরিয়া) পদ্মাবতী ! আমিও শুনেছি ঋষিমুখে
ধনঞ্জয়-বাসুদেব নর-নারায়ণ ।
বিশ্বাস না করি, প্রীতি করি । আস্তরিক—
শ্রদ্ধা-বিজড়িত প্রীতি করি দুইজনে ।
তথাপি তোমারে বলি, শুন পদ্মাবতী,
সত্য আমি হই যদি রাধার নন্দন,
অধিরথ যদি মোর পিতা, শুনে রাখো —
নিশ্চয় নিশ্চয় আমি পরাস্ত করিব
রণে নর-নারায়ণে ।

প্রস্তান

পদ্মা । এ কেন সন্দেহ !
“হই যদি রাধার নন্দন,” “অধিরথ
যদি মোর পিতা ।” অস্তর-আকুল করা
সহসা জাগিয়া-ওঠা এ কি এ সন্দেহ !
স্বতপুত্র নহ কি, নহ কি নাথ তুমি !
ওই সে অপূর্ব স্নেহ —বাৎসল্য অপূর্ব—
তুল্য যাহা কেবল—কেবল ষশোদার ।
ষশোদার ? কেন-কেন এ পাপ সন্দেহ ?
স্বতপুত্র—প্রিয়তম, স্বতপুত্র তুমি ।

চতুর্থা দশা

কর্ণ-ভবন—কক্ষাস্তর

কর্ণ

বৃষকেতুর প্রবেশ

কর্ণ। কি সংবাদ প্রিয়তম ?

বৃষ। নিজে মহারাজ,
সঙ্গে তাঁর ভ্রাতা আর মাতুল শকুনি।

কর্ণ। শীঘ্র—শীঘ্র যাও, এই স্থানে লয়ে এস।

বৃষকেতুর প্রশ্ন

কেন অসময়ে ? বাধা কি পড়িল বৃদ্ধে ?

ভীষ্ম বিদুরের বাক্যে শঙ্কিত হইয়া

অন্ধ রাজা মোর অসাক্ষাতে, পাণ্ডবে কি

তবে—অর্দ্ধরাজ্য দানে করিল স্বীকার।

দুর্যোধন, দুঃশাসন ও শকুনির প্রবেশ

কর্ণ। স্বাগত, স্বাগত সখা, স্বাগত মাতুল !

শকুনি। কেমন আছ হে অশুরাজ ? ভীমরতি ভীষ্মের কথায়
ক্রোধ করে সভাস্থল ছেড়ে চলে এলে ! আমাদের কি অবস্থায়
ফেলে এলে, সেটা একবার ভেবেও দেখলে না !

কর্ণ। অমৃতপ্ত, মাতুল। সে জন্ম সপ্তাহ আমি নিদ্রাশূন্য।

দুঃশা। আমরাও আপনার অভাবে অন্ধরাজ !

শকুনি। তুমি ত কেবল মাত্র নিদ্রাশূন্য—আর আমি ? আমার
অবস্থাটা কি হ'য়েছে বুঝেছ—এই সারা সপ্তাহটা তোমার অভাবে ?
নিদ্রা-শূন্য—জাগরণ-শূন্য—উত্থান-শূন্য—পতন-শূন্য ! ওঃ ! সে যে কি
—কি একটা বিরাট শূন্য—

কর্ণ । জীবনে ওরূপ ক্রুদ্ধ কদাচ হ'য়েছি । সভাস্থল ত্যাগের পরই আমার মনে হ'ল, আমি তোমার অনিষ্ট ক'রে ফেলেছি ।

দুর্যো । কিছু অনিষ্ট করানি সখা । যতদিন তুমি আছ, ততদিন যেখানেই থাক—কৌরব সভায় কিম্বা গৃহে—আমি সম্পূর্ণ নিশ্চিত আছি । ভীষ্ম, দ্রোণ, কৃপ—ওদের আমি সহায় মধ্যেই গণ্য করি না ।

দুঃশা । আপনি যেখানে আছেন, সেইখানেই আমাদের সভা ।

শকুনি । তবে, ওই ধর্মধ্বজীদের কথায় মস্তিষ্কটাকে বিকৃত না ক'রে তুমি চ'লে এসেছ, সেটা ভালই করেছ । আমার কিন্তু ভাগিনেয়, ওই আক্ষেপটা র'য়ে গেল—ক্রোধের উদ্বেকটা কখন হ'ল না । ওই মস্তিষ্কহীন বৃদ্ধগুলো—ওই ভীষ্ম, ওই দ্রোণ—ওই দাসীপত্নীটার সম্মুখে আমাকে তীব্র ভাষায় যখন গালি দেয়, তখন মনে হয়, একবার ক্রোধ করি ; কিন্তু ক্রোধ ক'রতে গেলেই ওই ক'টাকে পাগল মনে ক'রে হা-হার সঙ্গে হো-হো বুদ্ধ হ'য়ে ক্রোধটা একটা অর্দ্ধ-বিরাট হাস্তে পরিণত হয় । অবশিষ্ট অর্দ্ধ পেটের ভিতরে একটা বিদ্রোহ তুলে বসে । তাতে নাক মুখকে এমন বক্র ভাবাপন্ন ক'রে ফেলে যে, দর্পণের কাছে গিয়ে নিজেকেই কিছুক্ষণ আমি চিনতে পারি না—

দুর্যো । ষাক্, মাতুল, বৃথাবাক্যে আর সময় নষ্ট নয় ।

শকুনি । তারপর, বারবার গ্যালক সম্বোধনে গণ্ডে চপেটাঘাত ক'রতে ক'বতে মুখ নাসিকা যখন আবার প্রকৃতিস্থ হয়, তখন বুঝতে পারি, আমি জগতে অজ্ঞেয় ধৃতরাষ্ট্র-গ্যালক শকুনি ।

কর্ণ । তারপর ? বিশেষ কি প্রয়োজন সখা ?

দুর্যো । প্রয়োজন ? দারুণ সমস্যা অঙ্গরাজ !

মীমাংসায় অসমর্থ হয়ে স-মাতুল

এসেছি তোমার ল'তে বুদ্ধির শরণ ।

শকুনি । সমস্যা ?—সমস্যা—[হাস্ত] আবার ও দঙ্কমুখে,

হাহা-যুক্ত—হোহো যুক্ত—হিহি-যুক্ত হাসি !

সমস্তার সমস্ত মীমাংসা এ মাতুল

ক'রে ত দিয়েছে বৎস, সমস্তার আগে ।

এখনো সমস্তা ? বল না, বল না ।

সুশা । আমাদের সঙ্গে শেষ সন্ধির চেষ্টায়

এসেছে স্বয়ং কৃষ্ণ হস্তিনা নগরে ।

কর্ণ । [বিস্মিতভাবে । তারপর ?

তুযো । কলা প্রাতে সভায় প্রস্তাব ।

কর্ণ । মনোরম বাক্য শুনে তার, চাও রাজা

করিতে কি সমর-সকল পরিহার ?

তুযো । ভয় নাই, সেদিকে সমস্তা নয় সখা,

সেদিকে তোমার বন্ধু অচল, অটল—

চিরস্থির হিমাদ্রির মত ।

কর্ণ । তাই বল । এ সমস্তা অন্যদিকে ?

তুযো । বলিতে কি পার,

সমপ্রাণ, কৃষ্ণের হস্তিনা আগমনে

মনের নিভৃত কোণে চির-লুকায়িত

কি বাসনা, সহসা উন্মত্ত হ'য়ে, আজি

আমাকে ক'রেছে আক্রমণ ?

কর্ণ । জানি আমি

হে রাজন্, সুযোগ্য আতিথ্য বাসুদেবে ।

তুযো । এই, সখা—সুযোগ্য আতিথ্য । জানি আমি

এসেছে সে হস্তিনা নগরে, সভামধ্যে

সবার সাক্ষাতে কটুক্তি শুনাতে মোরে ।

সে ঘৃষ্ণের অন্ত কোন নাহি অভিপ্রায় ।

- কর্ণ । থাকিতেও পারে ।
- দুর্যো । কিছু না কিছু না সখা ।
শুধু বাক্যে নিগূহী করিতে আমারে
সে শঠ এসেছে দৌত্যে হস্তিনা নগরে ।
কি যোগ্য আতিথ্য কর স্থির ।
- দুঃশা । মাতুলের —
- শকুনি । [দুঃশাসনের মুখে হস্ত দিয়া]
ব্যস্ত নয়, ব্যস্ত নয় ভাগিনেয় ।
শুন আগে, তজরাজ কি দেয় উত্তর ।
- কর্ণ । উত্তর—বন্ধন ।
- শকুনি । আলিঙ্গন, আলিঙ্গন—
- কর্ণ । সুদৃঢ় বন্ধন—নিভৃত অন্ধতাময়
হস্তিনার কারাগারে । তার পিতা; মাতা
ষেক্ষেপে আবদ্ধ ছিল কংসের ভবনে
মথুরায় ।
- শকুনি । আলিঙ্গন উপরে আবার—
মামার ভৃতীয় আলিঙ্গন । কি বিচিত্র
বুদ্ধির মিলন দেখ দুর্যোধন, দেখ
দুঃশাসন । দুর্যোধন ! মস্তক আঘাত—
মধুময় দুঃশাসন ! শ্রীমুখ চুষন । ষাও—
বিলম্ব ক'রনা—এখনি যাইয়া বাধ শঠে ।
- দুঃশা । বিস্মিত করিলে মায়া ।
- শকুনি । শুধু মায়া ? মাতুল-আচার্য—যথা গুরু
দ্রোণ । তবে তিনি আচার্য অস্ত্রের, আর
আমি, রাজত্ব রক্ষায় শ্রেষ্ঠাত্ম—বুদ্ধির !

শুক্লাচার্য্য ত'ত মোর যোগ্য অভিধান,
যদি ঋষি ভাগ্যদোষে না হইত এক
চক্ষুহীন। সমবুদ্ধি প্রিয় অঙ্গরাজ,
আমিও ব'লেছি ওই কথা— ওই কথা
'ব' দস্ত্য-'ন'য়ে 'ধ'য়ে, তাহাতে দস্ত্য-'ন' দিয়ে
খট্টার শ্রীপদ সঙ্গে শ্রীরজ্জু সংযোগে
সপ্রেমে জড়িয়ে রাখা শ্রীগোপী-বল্লভে।

কর্ণ।

সঙ্গে? অনুচর?

দুর্য্যো।

থাকুক অসংখ্য তার,
আমি সখা একাদশ অক্ষৌহিনী-পতি।

কর্ণ।

বন্ধন, বন্ধন রাজা—

শকুনি।

বন্ধন--বন্ধন দুর্য্যোধন।

কর্ণ।

এ শুভ সুর্যোগ রাজা, সপ্নেও কখনো
আসিবে না। কোথায় আছেন বাসুদেব?

দুর্য্যো।

লজ্জা হয়, ঘৃণা হয় সে কথা বলিতে।
যোগ্যের অধিক সখা, করিয়াছিলাম
তার পূজা আয়োজন। ভারত সম্রাট
যে পূজার অধিকারী। সে সমস্ত করি' ত্যাগ,
অতিথি হইল শঠ বিদুরেব গৃহে।

শকুনি।

অভিপ্রায়—জানুক নগরবাসী
দুর্য্যোধন-দত্ত শ্রেষ্ঠ উপায়ন হ'তে
ভক্ত বিদুরের ক্ষুদ্র—অহো! কি অধিক
কি প্রচণ্ড প্রিয় মোর। শুধু শঠ নহে,
বৎস। বল সমস্ত শঠের শিরোমণি!

কর্ণ।

বন্ধন—বন্ধন—এ শুভ সুর্যোগ সখা,

কিছুতে ক'র না ত্যাগ। যেমনি শুনিবে পঞ্চ
 ভ্রাতা কেশব হ'য়েছে বন্ধ হস্তিনার
 কারাপারে, অমনি সকলে, ভগ্নদন্ত
 ভুজঙ্গের মত, উৎসাহ-চেতনাহীন
 লুপ্তিত হইবে ভূমিতলে।

শকুনি।

শুন, শুন,

দুঃশাসন, দুঃযোধন। এই ত তোমার
 সর্বদা মঙ্গলকামী সখা-যোগ্য কথা।

কর্ণ।

বন্ধন—বন্ধন—অজ্ঞানের হস্ত হ'তে
 খসিবে গাণ্ডী, হতাস্বাস বৃকোদর
 শৃগাল-দষ্টের মত, স্বদেহ-দংশনে,
 আপনিই আপনারে করিবে নিধন।

শকুনি।

শক্তি ও সহায়-শূন্য রাজা বৃধিষ্ঠির,
 ছোট দুটি ভাই আর দ্রৌপদীয়ে ত্যজি'
 মুক্ত-কচ্ছ—আবার পলায়ে যাবে বনে।

দুর্ঘ্যো।

উপদেশ শিরোধার্য সখা। কল্য তুমি
 শুনিবে শঙ্কায়, শাস্ত্রের 'নারায়ণ'
 হস্তপদে বাধা—হস্তিনার অন্ধকারায়
 লয়েছে আশ্রয়।

কর্ণ।

নিশ্চিত ঘুমাতে পারি ?

দুর্ঘ্যো।

নিঃসন্দেহে—স্বখে—নিশ্চিত ঘুমাও সখা !

একাদশ অক্ষৌহিনী-পতি দুঃযোধন।

দুঃযোধন প্রভৃতির প্রস্থান

কর্ণ।

একাদশ অক্ষৌহিনী-পতি দুঃযোধন,

তত্পরি প্রকৃতি তাহার সবিশেষ

জ্ঞাত আছ তুমি । জানিয়াও আজ তুমি
 এসেছ স্বয়ং দৌতো হস্তিনা নগরে
 ষড়পতি । এ সাহস ষার—কি বলিব—
 হয় সে নিভাস্ত জড়, নয়—নারায়ণ ।
 ছিল ইচ্ছা, শুনিতে তোমার বাণী ; ছিল
 ইচ্ছা দেখিবার, আপন আয়ত্তে পেয়ে
 ভীম শক্তিধর ওই দুরন্ত কৌরব
 কেমনে তোমায় বন্দী করে । সভাস্থলে
 দাব না তো, দেখা তো হ'ল না । বাসুদেব ।
 যদি তুমি অন্তর্ধ্যামী, তোমাতে শুনায়ে
 এই কথা, নিশ্চিন্তে ঘুমাতে চলি আমি ।
 এসো নিদ্রে । একি দেবী, বলিতে বালিতে !
 সপ্ত রজনীর অদর্শন - তাই কি ব্যথিতে,
 সপ্ত রজনীর ভাৱে—আঁখির পলক—
 করিতে আসিলে আক্রমণ ? আহা—আহা !

পর্যাপ্তে উপবেশন

একি স্নিগ্ধ, একি শাস্ত জ্যোতি ! চারিদিকে
 জ্যোতির উৎসব ঘেন ! ওগো জ্যোতির্ষয়া ।
 ওগো তন্দ্রা, নিশীথের গভীর গহ্বরে—
 কোথায় লুকায় রেখেছিলে, এই সব—
 চপলা-চঞ্চল দুরন্ত কিরণ-বালা ? (শয়ম)
 কিসের লাগিয়া পলক ভেদিয়া মোর—
 এ উল্লাসে সকলে মিলিয়া আজ তারা—
 তারার উপরে নৃত্য করে ? তার মাঝে—

ওকি ও সুন্দর, ওকি মধু-রূপ-রেখা ।
ওকি বর্ণ, নবীন নীরদ ! ওকি আঁখি—
আয়ত—মুখর ! বাসুদেব—বাসুদেব—
এমন - কিশোর—তুমি ।

পদ্মাবতীর প্রবেশ

পদ্মা ।

কাহার বন্ধন

প্রিয়তম ? শুনিলাম বৃষকেতু মুখে,
বন্ধনের কথা শুনে, বালক ব্যাকুল
হ'য়ে, ছুটে গেছে আমার নিকটে । বলে—
“মা, তুমি সত্বর যাও—পিতারে নিষেধ
কর ।” কাহারে বাঁধিতে চাও প্রিয়তম ?

শয্যাপাশে আসিমা দেখিল

ঘুমাও—ঘুমাও । সপ্তরাত্রি নিদ্রাহীন—
ঘুমাও—ঘুমাও প্রভু ।

কর্ণ ।

বৃণাল-তন্তুর স্পর্শে

পদ্মাবতী ফিরিল

কম্পিত তোমার তনু—হে কঠোর ।
এতই কোমল তুমি ! তোমারে বাঁধিবে !

পদ্মাবতী উৎকর্ণ হইয়া দাঁড়াইল

কে বাঁধিবে ? কে বেঁধেছে—কবে ? সে কি ওই—

পদ্মাবতী উল্লসিতভাবে দাঁড়াইল

মত্ততার গ্রন্থিতে কঠোর, অহঙ্কার-
রজ্জুমুক্তি দুৰ্য্যোধন ?

পদ্মা ।

(চলিতে চলিতে) ঘুমাও, ঘুমাও নাথ । ওগো স্বপ্ন-রাজ্যে

গতিশীল স্বচ্ছন্দ পথিক, চলে যাও,
হ'ক দূর, যত দূর—ফিরাব না আমি।

প্রস্থান

ব্রাহ্মণ-বেশী সূর্যের প্রবেশ ও কর্ণের শিয়রে দাঁড়াইয়া

- সূর্য্য । উত্তীর্ণ স্বপ্নের রাজ্যে, যোগনিদ্রা কর
আলসন । স্বপ্ন-চক্ষু দেখ মোরে । উঠ
হে ধীমান্, স্বপ্ন-কর্ণে শুন মোর কথা ।
- কর্ণ । কে আপনি ?
- সূর্য্য । চেয়ে দেখ । অপার মমতা-বশে, বৎস,
স্বমণ্ডল মাধ্য হ'তে এই মর্ত্যভূমে
আসিয়াছি আমি । হে দাতার শিরোমণি
তোমার ব্রতের কথা, স্বভাব তোমার,
সারা বিশ্বে হ'য়েছে বিদিত । সারা বিশ্ব
শুনিয়াছে, কাহারও নিকটে তুমি ভিক্ষা
নাহি চাও, ভিক্ষার্থীরে রিক্তহস্তে কভু
না ফিরাও । শুনেছে দেবতা, শুনিয়াছে
মৰুদেবতার পতি দামব । শুনিয়া,
ভিক্ষার্থী ব্রাহ্মণবেশে আসিয়াছে তব গৃহে ।
- কর্ণ । কি উদ্দেশ্যে ভগবন !
- সূর্য্য । হিত-কামনায় পাণ্ডবের,
ভিক্ষা চাহিবেন তিনি কবচ কুণ্ডল ।
- কর্ণ । বুঝিয়াছি । কে আপনি ?
- সূর্য্য । সবিতা ।
- কর্ণ । আমার ইষ্ট ? প্রণতি—প্রণতি আপনারে ।
- সূর্য্য । পূর্ব্বাহ্নে হইয়া জাত তাঁর
অতিপ্রায়, সাবধান করিতে তোমায়ে

এসেছি প্রবল স্নেহে । হে বৎস, তোমার
ওই কবচ কুণ্ডল উত্তম অমৃত
মধ্য হ'তে । যতদিন এ দু'টি তোমার
রবে, ত্রিভুবন মধ্যে কেহ না পারিবে
তোমাতে করিতে পরাজিত । গাণ্ডীবী
পশ্চাতে রহিয়া ষষ্ঠি দেবেস্ত্র করে
রণ. তাহারেও মানিতে হইবে
পরাভব । তাই বলি, যদি প্রিয়বর
জীবিত রহিতে থাকে বাসনা তোমার.
ইচ্ছা থাকে দৈবরথ সমরে, প্রতিযোদ্ধা
অর্জুনে করিতে পরাজয়, হে মানদ !

দূঢ় অনুরোধ মম, যেন কোন মতে
দিয়োনা বাসবে ওই কবচ কুণ্ডল ।

কর্ণ । জীবিত থাকিতে চাই, অর্জুন-বিজয়
জীবনের একমাত্র উদ্দেশ্য আমার ।
তথাপি হে ভগবান, কীর্ত্তিধ্বংসে, ব্রত-
ভঙ্গে, সত্যের আশ্রয় চ্যুত হ'য়ে, পল
মাত্র চাহি না বাঁচিতে, চাহি না অর্জুনে
পরাজিতে ।

সূর্য্য । কবচ কুণ্ডল দিবে ?

কর্ণ । ভিক্ষা চান দেবরাজ যদি ।

সূর্য্য । যেমনি চাহিবে ?

কর্ণ । না ব্রাহ্মণ, প্রথমে দিনয়—অনুন্নয়—
যা আছে আমার, সমস্ত চাহিব দিতে ।

গ্রহণ না করেন বাসব দিব দান—কবচ কুণ্ডল ।

সূর্য্য । এসেছি সৌহার্দ্য বশে—
 কর্ণ । বুঝেছি তা ভগবন ।
 সূর্য্য । স্নেহ বশে—
 কর্ণ । এ দাস যে ভক্ত আপনার ।
 সূর্য্য । হে সন্তান মায়াবশে ।
 কর্ণ । মায়াবশে !
 সূর্য্য । মায়্যা—তীব্র—অতি তীব্র—দেবতা-হৃদয়-জয়ী !
 দৈবকৃত রহস্য সে, গোপনীয় অতি ।
 ত্রিভুবন মধ্যে জানে শুধু একজন
 আর জানি আমি । বাসব জানেনা তাহা ।
 কর্ণ । বলুন আমারে ভগবন্—বলুন—
 ভক্ত আমি—দাস আমি—আত্মীয় স্বজন—
 পত্নী পুত্র—অন্য কথা কিবা প্রয়োজন—
 জীবন হইতে প্রভু প্রিয় যে আপনি,—
 কি রহস্য—শুনান আমারে ভগবন্ !

(নিতান্তস্ব ভাব)

সূর্য্য । শুনানো হ'ল না কর্ণ । উত্ত্যক্ত তোমার
 নিদ্রা, উদ্ধ্বাসে ছুটিয়াছে আগ্রতের
 দেশে । শুনানো হ'ল না বৎস, ষথাকালে
 আপনি শুনবে । এখন চলিব আমি !
 চলিতে চলিতে পুনঃ বলি, স্থিরচিত্তে
 শুন মতিমান, সর্বস্ব করিয়া দান,
 যত্নপি রাখিতে পার কবচ কুণ্ডল
 রেখো কর্ণ, রেখো কর্ণ, রেখো কর্ণ—রেখো । গ্রহান
 কর্ণ । (উঠিয়া চক্ষু মার্জিত করিতে করিতে) পদ্মাবতী ! পদ্মাবতী !

পদ্মাবতীর প্রবেশ

- পদ্মা । কি প্রভু, কি প্রভু !
- কর্ণ । অন্বেষণ—শীঘ্র কর অন্বেষণ !
- পদ্মা । কারে ?
- কর্ণ । এক বেদজ্ঞ ব্রাহ্মণ !
- পদ্মা । কই, কোথায় ?
- কর্ণ । এই গৃহমধ্যে—গৃহমধ্যে—
- পদ্মা । (চারিদিকে গুঁজিয়া) কেহই ত নাই । রুদ্ধ সর্বদ্বার—
কে ব্রাহ্মণ ? গৃহমধ্যে কেমনে আসিবে ?
- কর্ণ । খোলো দ্বার—ধ'বে আন তারে । আছে আছে—
এখনো সে নিশ্চয় নিশ্চয় পুর মাঝে ।
যদি না আসিতে চাহে, হাত ধ'রে তীব্র
অগ্নয়ে—চরণে ধরিয়া, পদ্মাবতী । পদ্মাবতীর প্রস্থান
রহস্য রহস্য—সত্য যদি দেখে থাকি,
হে সবিভা, রহস্য শুনারে যাও মোরে ।

ছিজবেশী ইন্দ্রকে লইয়া পদ্মাবতীর প্রবেশ

- স্বাগত—স্বাগত । কিবা প্রয়োজনে প্রভু,
পবিত্র করিলে দীন-গৃহ ?
- ইন্দ্র । ভিক্ষার্থী এসেছি তব গৃহে অঙ্গরাজ ।
- কর্ণ । কি প্রার্থনা,
অসহোচে বলুন আমারে । অন্ন ? বস্ত্র ?
গোধন ? কাঞ্চন ? কি তবে ? সহোচ কেন ?
গো-শস্য-সম্পদ-পূর্ণ গ্রাম ? তাও নয় ?
স্বর্ণাভরণ-বিশুষ্টিতা রূপসী ললনা ?
তাও নয় ? সহোচ কি হেতু এত বিজ্ঞ !

ইন্দ্র । ইচ্ছা নয় বলি তব পত্নীর সম্মুখে । পদ্মাবতীর প্রহান
 যথার্থ-ই সত্যব্রত যতপি ঋপনি,
 কবচ কুণ্ডল চাহি দান । অগ্র নয়—
 ওই সহজাত—লগ্ন যাহা তব দেহে ।

কর্ণ । অদ্ভুত প্রার্থনা বিপ্র, প্রার্থনা নির্ভূর ।
 কবচ কুণ্ডল নহে—জীবন আমার ।
 না না—জীবনও অক্লেশে দিতে পারি—বুঝি
 নাহি পারি কবচ কুণ্ডল দিতে । এসো,
 হে বিপ্র, জীবন লহ ! প্রার্থনা আমার,
 কবচ কুণ্ডল তুমি ক'র না প্রার্থনা ।

ইন্দ্র । তবে ফিরে যাই ?

কর্ণ । স্ববর্ণ ? প্রমদা ? ধেনু ? সাম্রাজ্য ? পৃথিবী ?

ইন্দ্র । নাহি প্রয়োজন । চাহি কবচ কুণ্ডল ।
 কবচ কুণ্ডল মাত্র । দাও, থাকি । আর—
 না দিতে সম্মত যদি—চ'লে যাই ।

কর্ণ । পদ্মাবতী ।

পদ্মাবতীর প্রবেশ

শাণিত ছুরিকা । ছুরিকা আনিয়া পদ্মাবতী কর্ণকে দিল

দেখিবে ছেদিতে স্বৰ্ণ ?

পদ্মা । তবে কি জীবন চায় ভিখারী নির্ভূর ?

কর্ণ । তাহ'তে অধিক দেবি,—কবচ কুণ্ডল ।

পারিবে কাটিতে ? পারিবে দেখিতে ?

কিয়ৎকণ দাঁড়াইয়া চক্রে অঞ্চল দিয়া পদ্মাবতী প্রসন্ন করিল, কর্ণ ছুরিকাযোগে

কবচ কুণ্ডল ছিন্ন করিয়া ইন্দ্রকে প্রদান করিলেন

ইন্দ্র । ধন্য তুমি দাতৃ-শিরোমণি ।

কর্ণ । সন্তুষ্ট বাসব ?

ইন্দ্র । বাসব ! চিনেছ তুমি মোরে ?

কর্ণ । পূর্বেই জেনেছি দেব ।

ইন্দ্র । ধন্য ধন্য তুমি মহাত্মন, তব তুল্য
দাতা, বীর হয়নি, হবে না ত্রিভুবনে
বুঝিয়াছি—কেমনে, কাহার কাছে
মম আগমন-বার্তা জানিয়াছ তুমি ।
অগ্রাহ করিয়া তাঁর স্নেহ-উপদেশ—
এই তব দান ? হে মহান,
দেবেন্দ্র তোমাতে নতি করে ।
অগ্রাহ করিয়া তব মহত্ব অপূর্ব—
চলিয়া যাইতে নারি আমি । লহ উপহার,
নহে দান—হৃদয়ের শ্রদ্ধার অঞ্জলি । (অস্ত্রদান)

কর্ণ । কি এ দেবরাজ ?

ইন্দ্র । ‘একশ্ব’ ইহার নাম । যাহারে হানিবে,
সে যদি অমর হয়, তাহারও
তখনি মৃত্যু । লহ উপহার মহাত্মন ।
আর মোর, আশ্চর্যিক আশীর্বাদ,
এই তব দেহচ্ছেদে
সৌম্য, সৌন্দর্য্য হানি হবে না তোমার ।
সূর্য্য সম দীপ্তি ল’য়ে
লোকচক্ষে হবে তুমি আদিত্য-বিগ্রহ ।

প্রহান

কর্ণ । পদ্মাবতী—পদ্মাবতী !

পদ্মাবতীর প্রবেশ । তাহার স্কন্ধে মস্তক রাখিয়া

স্নেহস্পর্শে মুছাও রক্তাক্ত কলেবর ।

দ্বিতীয় অঙ্ক

প্রথম দৃশ্য

চারনীগণ

গীত

কোন্ বেণুতে ব্রহ্মের বাঁশু

জাগিয়েছিলে প্রেমের গান,

কোন্ বেণুতে হাসিয়েছিলে,

কোন্ বেণুতে কাঁদিয়েছিলে,

কোন্ বেণুতে নাচিয়েছিলে,

ব্রহ্ম-বধুর কোমল প্রাণ ?

ধরতে এসে কোন্ বেণুর কাঁশু

গোকুলের পাগল ফুলের

মাতল রেণু

দিশাহারা ছুটতো তারা

শ্রীমুনার তুলত উজান বান ?

এখন তোমার এ কোন্ বেণুর সুর ?

হে গোবিন্দ !

এ কি ছন্দ

কাঁপে বিশ্বপুর !

আকাশ পাতাল— সুরে মাতাল—

মত্ত করাল কাল—

হে গোবিন্দ, এ তোমার কোন্

দীপকের তান

দ্বিতীয় দৃশ্য

চণ্ডিনা—সভামণ্ডপ

কৃষ্ণ, ধৃতরাষ্ট্র, ভীষ্ম, দ্রোণ, বিদুর, দুর্ঘোষন প্রভৃতি

কৃষ্ণ ।

আমার একান্ত ইচ্ছা, হে কোরবপতি,
আবার মিলিত হয় কোরব পাণ্ডব,
সন্ধি-সখ্যে পরস্পরে ভ্রাতৃত্ব বন্ধনে
উভয় কুলের হয় পরম কল্যাণ—
অযথা না হয় এই বীর-কুলক্ষয় ।

প্রার্থনা করিতে তাহ

ভবৎ-সমীপে আসিয়াছি, মহারাজ ।

ধৃত ।

শুন, দুর্ঘোষন, কেশবের হিতবাক্য ।

দুর্ঘোষ ।

শুনিয়াছি পিতা, কিন্তু বুঝিতে অক্ষম,
কেমনে এ মিলন সম্ভব ।

কৃষ্ণ ।

মহারাজ মনুষী-প্রধান—বুঝাইয়া

দিন পুত্রে এ মিলন সহজে সম্ভব ।

সমুখিত বিষম আপদ কুরুকুলে ।

উপেক্ষা করেন যদি

কুরুকুল নাশ করি, এ ঘোর আপদ

পরিশেষে পৃথিবী করিবে নাশ ।

আপনার ইচ্ছার উপরে

রক্ষা, ধ্বংস করিছে নির্ভর, মহাত্মন,

আপনি করুন শাস্ত নিজ পুত্রগণে,

আমি করি যুদ্ধ হ'তে নিরস্ত পাণ্ডবে ।

ধৃত ।

শুনিতোছ দুর্ঘোষন ?

- হুৰ্যো । শুনিতেছি—শুনিতেছি,
আমার দুর্ভাগ্যবশে পিতা,
আরো কত কাল একথা শুনিতে হবে ।
- কৃষ্ণ । একদিকে বড় শুভদিন,
অন্যদিকে বড়ই দুর্দিন ।
হে মনুষী, কুরু ও পাণ্ডব,
ধর্মার্থে রাখিয়া দৃষ্টি, যত্নপি আবার
সম্মিলিত হয় পরস্পরে,
কুরু-পাণ্ডবের পতি ধৃতরাষ্ট্র
হইবেন রাজ রাজেশ্বর—
সর্ব নৃপতির সেব্য অজেয় সম্রাট ।
- শকুনি । (জনাস্তিকে) এখনি আছেন তিনি ।
- হুঃশা । জনাস্তিকে । সে জন্য মাংস,
হবেনাকো নির্ভর করিতে তাঁরে,
পাণ্ডবের কৃপার উপরে ।
- ধৃত । ভ্রাতায় ভ্রাতায় সম্মিলন,
আমারো একান্ত ইচ্ছা, আমি চাই শাস্তি—
শাস্তি চিরস্থায়ী । অনর্থক বিষয় বিগ্রহে
কৌরব পাণ্ডব কুল না হয় নির্মূল !
- কৃষ্ণ । একাদশ-অক্ষৌহিনী বল
হইবে নিষ্ফল, কোনো চেষ্টা, কোনো যত্নে
পরাজিত হবে না পাণ্ডব ।
শাস্তি—শাস্তি । আদেশ করুন মহারাজ,
আপনার পুত্রগণে সন্ধির স্থাপনে ।
- ধৃত । কি উপায়ে হয় সন্ধি বল বাসুদেব ?

কৃষ্ণ ।

শ্রাঘ্য প্রাপ্য অর্ধরাজ্য
 ধর্মরাজে সমর্পণ—সন্ধির উপায় ।
 অন্য কিছু বলিতে পারি না মহারাজ ।
 নিশ্চয় কি হেতু মহাত্মন ?
 আদেশ করুন পুত্র আমায় সম্মুখে ।
 ভীষ্ম, দ্রোণ, কৃপ ও বিদুর উপস্থিত
 আছেন সভায় । আদেশ করুন পুত্র
 এই চারি মহাত্মা সম্মুখে ।
 কোরবের পাণ্ডবের কল্যাণ বাঞ্ছায়
 করিতেছি আবেদন । প্রমত্ত পুত্রের
 মমতায় যে সব অকাঙ্ক্ষা পূর্বে
 ক'রেছেন রাজা, প্রতিকারে এসেছে সময় ।
 আমন্ত্রণ করি' ধর্মরাজে, ফিরাইয়া
 দিন তাঁরে অর্ধরাজ্য, সঙ্গে তার
 ইন্দ্রপ্রস্থ পুরী । অথবা যেরূপ অভিরুচি—
 সন্ধি, যুদ্ধ—উভয়েই সম্মত পাণ্ডব ।

ধৃত ।

সন্ধি—সন্ধি—একমাত্র অভিরুচি সন্ধি ।
 হিতকামী কেশবের আবেদন
 নিফল ক'রনা দুঃখোদন ।

দুঃখো ।

অসম্ভব পিতা । সন্ধি-কথা মুখে,
 অন্তরে বিগ্রহ-ইচ্ছা ল'য়ে
 এসেছেন বাহুদেব আপনার কাছে ।

ধৃত ।

না, না, একথা বলিতে নাই দুঃখোদন,
 বাহুদেব সর্বদা আমার হিতকামী ।

দুঃখো ।

আমি নহি প্রমত্ত কেশব,

আমি চিরস্থির—প্রারম্ভে ব'লেছি ষাহা,
এখনো তা বক্তব্য আমার। বাসুদেব,
প্রমত্ত যতপি কেহ থাকে—
সে তোমার ঐ ধর্মরাজ।

কৃষ্ণ । উত্তেজিত হইয়ো না ভ্রাতঃ !

দুর্যো । দ্যুতরণে পরাজিত,
সর্বস্ব হারায়ৈ তার. আজি সে নিরলঙ্ক,
হৃতবাজ্য ভিক্ষা চায় কোরবের কাছে।
ভিক্ষাই যতপি চায়, আসুক আপনি
দস্তে তৃণ করি,' অঞ্জলি করিয়া বন্ধ
মহাত্মা পিতার কাছে করুক প্রার্থনা।

ভীষ্ম । কুলস্র, দুর্বৃদ্ধি, কাপুরুষ, কেশবের
ধর্ম-সুসঙ্গত উপদেশ এখনও কর
প্রণিধান ! কুমন্ত্রীর পরামর্শে
উত্তেজিত হ'য়ে ক'র না কোরব কুল ক্ষয়।

দুর্যো । বিনামুদে
স্বচায়ে প্রমাণ ভূমি দিব না পাণ্ডবে।

দ্রোণ । হে রাজন্, কৃষ্ণের ক'র না অপমান,
হিতাকাজক্ষী গান্ধেয়ের শুভ উপদেশ
অগ্রাহ্য ক'র না মোহবশে।
বাসুদেব, ধনঞ্জয়ে দিয়ো না দিয়ো না
অবসর কবচ করিতে পরিধান।
দিয়ো না দিয়ো না নৃপ. প্রশান্ত অর্জুনে
গাণ্ডীবে করিতে জ্যারোপণ।
ব্রহ্মর্ষি ভার্গব, ভীষ্ম, আমি—

পূর্বে যে তোমার কাছে
 করিয়াছি সে বীরের তেজের বর্ণনা,
 তাহাতে অনেক গুণ তেজস্বী অর্জুন ।
 একবার যদি ক্রুদ্ধ হয়, দুর্ব্যোধন,
 তোমার সে একাদশ অক্ষৌহীণী সেনা,
 মুহূর্ত্তে বিলয় পাবে । কূট-পরামর্শ-দাতা,
 সর্বনাশকারী তব দুর্ভক্ত বাস্কব—
 দুঃশাসন, রাধেয়, সৌবল—
 একটিও রবে না জীবিত ।

দুর্ব্যো । ভীত হ'ন পিতামহ, ভীত হ'ন
 আপনি আচার্য্য, আমি ভীত নহি ।
 শ্যাম যুদ্ধে যতপি জীবন যায়,
 লাভব ব্রাহ্মণ, স্বর্গ হ'তে সুখ প্রদ,
 ক্ষত্রিয়ের নিত্য প্রার্থনীয় বীর-শয্যা ।

কৃষ্ণ । তাহাই হইবে লাভ ভ্রাতঃ !

দুর্ব্যো । তথাপি দিব না রাজ্য, পিতা-মোর
 জীবিত থাকিতে একজন রহিবে ভিখারী—
 হন যুদ্ধিষ্ঠির, নয় আমি ।
 এ ভারতে সম শক্তিদর
 দুই রাজ্য পারে না থাকিতে ।
 উগ্রকর্মে, ভীষণ বচনে ভীত হ'য়ে
 হে আচার্য্য, পিতামহ, রাজ্য দুর্ব্যোধন
 বাসবেবো সন্নিধানে শির না করিবে নত ।
 শ্যামা রাজ্য ? শ্যামা রাজ্য কার হে কেশব ?
 ধর্ম্মের তত্ত্ব বলে কর অভিমান

তুমি নিজের বল কৃষ্ণ গ্ৰাঘ্য রাজ্য কার ?
 পিতা মোর ধৃতরাষ্ট্র কৌরবপ্রধান,
 পাণ্ডু ছিল অমুগ্ধ তাঁহার । এই সব
 হিতৈষী মিলিয়া আমারে বালক হেরি',
 মহাত্মা পিতারে মোর বুঝিয়া দুর্বল,
 গ্ৰায়তঃ ধর্মতঃ প্রাপ্য
 আমার পৈতৃক ধন হ'তে
 নিতান্ত নিষ্ঠুর ভাবে ক'রেছে বঞ্চিত ।
 সেই রাজ্য বিধির কৃপায়
 আবার এসেছে ফিরে আয়ত্তে আমার ।
 যাও ফিরে বাসুদেব, বল যুধিষ্ঠিরে,
 হয় সে মরিবে, নয় আমি । বিনাযুদ্ধে—
 সূচ্যগ্র প্রমাণ ভূমি—এক কথা—
 দিব নাকো তাবে ফিরাইয়া ।

বিদূর ।

উন্নতের মত কথা ব'লনা ব'লনা,
 দুঃখোঁধন, সর্বদ্রষ্টা কেশব সম্মুখে ।
 উত্যক্ত করিয়া আবাহনে—
 অনিচ্ছুক মৃত্যুরে আনিয়া
 দিয়ো না কৌরব-কুল তাহার কবলে ।
 তুমি মর দুঃখ নাই, মরে দুঃশাসন
 দুঃখ নাই । মরিবে শোকাক্ত তব পিতা,
 জ্বলবে বংশের শোকে জননী-গাঙ্গারী ।
 কেশবের সঙ্গে যাও আছেন যথায়
 মহাত্মা পাণ্ডব-শ্রেষ্ঠ, সাদরে লইয়া
 এসো তাঁরে হস্তিনায় । চারি ভ্রাতা,

মনস্বিনী রূপদ-নন্দিনী সঙ্গে সঙ্গে
 আসুন তাঁহার । একশত পঞ্চ ভ্রাতৃ-
 মিলন দেখিয়া ধন্য হ'ক ধরাবাসী ।
 জগতে পরম শান্তি হ'ক প্রতিষ্ঠিত ।
 ধৃত । এতক্ষণে বুঝিয়াছি আমি,
 কেশব সত্যই হিতকামী । ইচ্ছা যোর,
 তুমিও তা বুঝ দুয়োধন । খুল্লতাত
 দ্বন্দ্বাশ্রয়ী মহাত্মা বিদূর, যে আদেশ
 করিল তোমারে, তাই কর । কেশবের
 সঙ্গে যাও যথা আছে রাজা যুধিষ্ঠির,
 মঙ্গল সংবাদ ল'য়ে পঞ্চ ভ্রাতা সাথে
 ফিরে এসো হস্তিনায় ।
 বাসুদেবে করিয়া সহায়
 প্রকৃত শান্তির লাভে এসেছে সময়,
 অতিক্রম না করিয়ো প্রিয়তম ।
 কেশবের সাক্ষর প্রার্থনা সুস্থ মনে
 করহ পূরণ -- করিয়ো না প্রত্যাখ্যান ।
 করিলে হইবে পরাজিত ।
 দুখ্যো । নিশ্চিন্ত থাকুন পিতা,
 কোন কালে কোরব না হবে পরাজিত ।
 কখনো করি না গর্ষ পাণ্ডবের মত,
 তথাপি এ সভাস্থলে সবারে সুনামে
 গর্ষভরে বলিতেছি আজি, যত্নপি অপর
 কেহ না হয় সহায়, কর্ণ, আমি, দুঃশাসন.
 পৃষ্ঠদেশে মাতুল শকুনি -- এই চারিজন --

- দেবেন্দ্র বিরোধী হয় যদি,
 পিতা, তাহারেও পরাস্ত করিব যুদ্ধে ।
- দুঃশা । বুদ্ধিমান নীতিজ্ঞ আপনি,
 কাকভূষণীর মত এই সব
 সর্বজ্ঞ বৃদ্ধের সঙ্গে কেন তবে বৃথা
 তর্ক মহারাজ ? এখনো কি বুদ্ধিতে অক্ষম,
 কি উদ্দেশ্যে কেশবের হেথা আগমন ?
 পাণ্ডবের সঙ্গে সন্ধি
 না করেন যত্নপি স্বেচ্ছায়, এই সব
 অন্নভোক্তা আপনার, আপনাকে
 কেশব সাহায্যে বন্দী করি,
 যুদ্ধিষ্ঠির সন্নিকটে করিবে প্রেরণ ।
 বুঝিয়া সতর্ক হ'ন রাজা ।
- শকুনি । শুধুই কি দুর্ব্যোধন ?—
 সেই সঙ্গে তুমি যাবে, কর্ণ যাবে—
 আর যাবে হস্তপদে দৃঢ় বন্ধ হয়ে
 এইসব মহাত্মার চির চক্ষুশূল—
 তোমাদের মাতুল শকুনি ।
- দুর্ব্যো । সত্য বলিয়াছ ভাই, এতক্ষণে
 বুঝিয়াছি আমি—ষড়যন্ত্র—ষড়যন্ত্র ।

ক্রোধভরে প্রস্থান—দুঃশাসন, শকুনি প্রভৃতির অনুসরণ

- ভীষ্ম । আয়ুশেষ হ'য়েছে তোমার ।
 ধৃত । কি হ'ল, কি হ'ল জ্যেষ্ঠতাত ?
 ভীষ্ম । আরো শুন, মোহগ্রস্ত যে সব ভূপতি

এ অধম্ম যুদ্ধে তব হইবে সহায়,
তাদেরও হ'য়েছে আয়ুশেষ ।

ধৃত । কি হ'ল, কি হ'ল জ্যেষ্ঠতাত ?

দ্রোণ । গুরুজনে অতিক্রম করি',
সভাস্থল করি' পরিত্যাগ
পুত্র তব চলে গেল মহারাজ !

ধৃত । দুর্কৃত্ত অবাধ্য পুত্র,
শুনে না আমার বাক্য, শুনে না কেশব ।

কৃষ্ণ । অবশ্য শুনিবে—মহারাজ ।
দুর্কৃত্ত জানেন যদি,
অবাধ্য যত্বপি তব বোধ,
অশক্ত আপনি যদি তাহার শাসনে,
আছেন এখানে বহু হিতৈষী বান্ধব,—
মহামতি পিতামহ, মহাত্মা আচার্য্য
দ্রোণ, রূপ—প্রত্যেকে অতুল শক্তিধর ।
সে সকলে অন্তরঙ্গ করুন মহারাজ,
তাঁহারা করুন বাধা
আপনার মদমত্ত দুর্কৃত্ত মস্তানে ।
হে মহাত্মাগণ, এখন কর্তব্য যাহা
নিবেদন করি সকলের কাছে—
সমস্ত্রমে, বারবার করিয়া প্রণাম,
ওই দুরাচারে না করি' শাসন,
হ'তেছেন প্রত্যেকেই দুঃস্বখে তাহার
অন্ন ও বিস্তর অংশভাগী ।
তাই নিবেদন --যা বলিল দুঃশাসন—

বাঁধি ওই চারি দুরাঙ্গারে,
পঞ্চপাণ্ডবের কাছে করুন প্রেরণ ।

ভীষ্ম । কর্তব্য তাহাই বামুদেব,
কিন্তু হায় আমরা সকলে—

প্রতিজ্ঞা গ্রহণ করি'
হইয়াছি ওই অন্ধ রাজার অধীন ।

দ্রোণ । আদেশ করুন মহারাজ—
এখনি কেশব, ওই দুর্কর্ত্তে বাধিয়া
নিক্ষেপ করিয়া আসি—
মহারাজ যুদ্ধিষ্ঠির পদতলে ।

কৃষ্ণ । অনুজ্ঞা করুন মহারাজ । এই শুভযোগ
রাজ্যরক্ষা, লোকরক্ষা—ধর্ম্মরক্ষা । এট
শুভযোগ—আদেশ আদেশ—মহামতি ।
দ্রোণাচার্য্যে আদেশ করুন মহারাজ ।

ধৃত । বিদুর—বিদুর—ভাই, সত্বর—সত্বর
যাও অস্তঃপুরে, লয়ে এস গান্ধারীকে ।
সমবাক্য তাঁর—বিশ্বাস আমার
দুরাঙ্গার মতি ফিরাইবে ।

বিদুরের প্রস্থান

দ্রোণাচার্য্যের প্রবেশ

কৃপা । কেশব—কেশব !

কৃষ্ণ । কি আচার্য্য ?

কৃপা । দুরাঙ্গারা আনিতেছে বাঁধিতে তোমাতে !

কৃষ্ণ । আমায়ে আচার্য্য ?

কৃপা । তোমায়ে কেশব । সঙ্কোপনে দুই ভাই—
পরামর্শদাতা ওই দুরাঙ্গা শকুনি,

দৃষ্ট-বুদ্ধি কর্ণের সম্মতি—

রক্ষা কর—আত্মরক্ষা কর বাসুদেব ।

কৃষ্ণ । ভয় নাই হে ব্রাহ্মণ—

ধর্মভঃ দূতের কার্য্য করিতে এসেছি,

নিশ্চিন্ত দাঁড়াও প্রভু । পারিবে না—কেহ

পারিবে না নিগৃহীত করিতে আমারে !

ভীষ্ম । দুরাচারী সকলি করিতে পারে—

সকল অকার্য্য হে কেশব ।

ধৃত । না—না—তা' কি হতে পারে !

এত কি সে মতিহীন হবে জ্যেষ্ঠতাত ?

কৃষ্ণ । অবস্থানে যদি ইচ্ছা হয়,

অপেক্ষা করুন পিতামহ,

অথবা প্রণাম যোর করুন গ্রহণ ।

ভীষ্ম । জানি আমি তোমার স্মরণে

যুচে যার জীবের বন্ধন,

তথাপি—তথাপি তোমার বন্ধন-কথা

শুনিতে অশক্ত বাসুদেব !

দ্রোণ । আমিও অশক্ত কৃষ্ণ !

ভীষ্ম, দ্রোণাদির প্রধান

কৃষ্ণ । শুনিলেন মহারাজ আপনার পুত্র

বাধিতে আসিছে মোরে ! আপনি করুন

অনুমতি—দেখুন বসিয়া, কে কাহারে

আক্রমণ করে । একাকী আমাকে তারা

অথবা আমিই সে সবারে ।

আমার সামর্থ্য আছে,

সে সামর্থ্যে একা আমি, নিগৃহীতে পারি

আপনার সমস্ত কোরবে ।
কিন্তু আমি—কম্পিত হয়ো না মহারাজ,
হেন অধর্মের কার্য্য করিব না কভু ।
জানি আমি, আমার নিগ্রহে—
হইবেন কৃতকার্য্য রাজা যুধিষ্ঠির ।

রুপা । কেশব—কেশব !
ধৃত । দুর্ঘোষন—যুর্ঘোষন ।

প্রহরী আদি লইয়া দুর্ঘোষনাদির প্রবেশ

দুর্ঘোষা । বাঁধ, বাঁধ, বাঁধ শঠে—
দুঃশা । বন্ধন—বন্ধন ।
শকুনি । (কিঞ্চিৎ কুরুণভাবে)—ধীরে—অতি ধীরে—
ওরে, নবনীত হ'তে
অতি যে কোমল অঙ্গ তার !
দুর্ঘোষা । বাঁধ—বাঁধ । বিলম্ব ক'র না ।
দুঃশা । বাঁধ—বাঁধ ।

ভীষ্মাদির প্রবেশ

ভীষ্ম । ক্ষান্তি দে—ক্ষান্তি দে—
ওরে ও ছুরায়া দুর্ঘোষন !
ধৃত । ওরে বৎস দুর্ঘোষন, এনোনা ও কথা
আর মুখে—কৃষ্ণ আজি দূত ।

বিদুরসহ গাঙ্গারীর প্রবেশ

গাঙ্গারী । ক'র না ক'র না বৎস, ক'র না ক'র না
এই নৃশংসের কাজ !

জগতের হিতকামী যিনি,
তাঁর প্রতি এরূপ উন্নত আচরণে
ক'র না জগতে শুরু ।

দুর্যো। শুনিব না কারও কথা
শঠশ্রেষ্ঠে করিব বন্ধন ।

গান্ধারী। পারিবি না, পারিবি না—
ওরে ও নির্লজ্জ, মতিহীন,
অহঙ্কার-পরবশ, মর্যাদা-ঘাতক !
পারিবি না—কেশবে বাঁধিতে পারিবি না ।

কৃষ্ণ। একাকী দেখেছ মোরে, তাই বুঝি
বাঁধিতে আমারে অত্যন্ত সাহস ভরে
ছুটিয়া এসেছ দুর্যোধন,
কি ভ্রান্তি তোমার ।
আমি একা, চিরস্থিতি, আপনারে ঘেরে,
আমি বহু—মুক্তিরূপ—জগতের বন্ধন
ভিতরে । আমি অণু—
বন্ধন আমারে কভু খুঁজিয়া না পায়,
আমি মহৎ—ব'সে আছি বন্ধন সীমায় ।
যেখানে র'য়েছি আমি, র'য়েছে সেখানে
পাণ্ডব, অন্ধক, বুধি—র'য়েছে সেখানে
রবি, ক্রতু, বসু, ঋষিগণ,
র'য়েছে সেখানে ব্রহ্মা, র'য়েছে সেখানে—
এই দেখ—এই দেখ—দৃষ্টি থাকে,
দেখ দুর্যোধন, দেখে কর আমারে বন্ধন ।

কৃষ্ণ উচ্চহাস্য করিলেন—দৃষ্টির পরিবর্তন

ধৃতরাষ্ট্র! লোক অগোচরে ক্ষণেকের
তরে মুক্ত হ'ক নয়ন তোমার।
এই মম বিশ্বরূপ, করহ দর্শন।

শ্রীকৃষ্ণেব বিশ্বরূপ দর্শন

পটাবরণে দেবগীতি

পশ্যামি দেবাংস্তব দেব দেহে—

ঈত্যাদি

তৃতীয় দৃশ্য

প্রাসাদ-কক্ষ

গান্ধারী ও দুর্ষ্যোধন

গান্ধারী। এখনো সময় আছে, সন্তপ্ত মাতার
অনুরোধ—বাসুদেব-বাক্য রক্ষা কর
দুর্ষ্যোধন। এখনো আছেন তিনি
হস্তিনা নগরে, দেবর বিদূর গৃহে।

দুর্ষ্যো। কিবা প্রয়োজন?

গান্ধারী। না থাকে তোমার, পতিকুল-নাশ-ভীতা
আমার হ'য়েছে প্রয়োজন। বল বৎস
একবার, আমি নিজে ফিরাইয়া
আনি তাঁরে। সন্দোপনে তোমাতে লইয়া
সন্ধির প্রস্তাব করি। নিরুত্তর কেন
বৎস? কথার উত্তর দিয়া
নিশ্চিন্ত করহ মোরে। নিশ্চিন্ত করহ তব

আতঙ্ক-ব্যাকুল অন্ধ নিরীহ পিতারে ।

বাক্যহীন, স্পন্দহীন—

প্রাণহীন দেহ যেন ল'য়ে

র'য়েছেন কল্যা হ'তে তিনি শয্যাগত ।

দুর্যো । আশীর্বাদ ক'রে মোরে ফিরে যাও মাতঃ,

কর গিয়া আশ্বস্ত তাঁহারে ।

সান্ত্বনার কণ্ঠে তাঁরে দাও শুনাইয়া,

পুত্র তব জয়-লক্ষ্মী করিয়া বহন

শীঘ্র ফিরি' আপনারে দিব উপহার ।

গাঙ্গারী । মন যাহা বলিতে না চাহে, হেন কথা,—

কেমনে কহিব দুর্যোধন ।

অন্ধ সে নৃপতি—পুত্রস্নেহে আত্মহারা,

স্তোকবাক্যে ভুলাইব কি হেতু তাঁহারে ?

দুর্যো । স্তোকবাক্যে ?

গাঙ্গারী । পুত্র-মমতায় হে সন্তান,

ধর্মার্থ পারি না আমি দিতে বিসর্জন—

অবিশ্বাস্য কথা শুনাইয়া ।

হর্ষ-বিষাদের তীব্র ঘাত প্রতিঘাতে

করিতে পারি না স্বামী-হত্যা ।

কাম ও ক্রোধের বশে ত্রয়োদশ

সুদীর্ঘ বৎসর ক'রেছ যা পাণ্ডবগণের

অপকার, তোমাদের গর্ভে ধরি'

আমিও হ'য়েছি বৎস, সে পাপের ভাগী ।

আমার কল্যাণ, তব পিতার কল্যাণ,

কুরুরাজ্য, কুরুবংশ—সবার কল্যাণে

অল্পরোধ করে তব মাতা,
ধর্মরাজে রাজ্য দিয়া স্থখী কর তারে ।
স্থখী হও নিজে, আত্মীয় বান্ধব সঙ্গে
স্থখী কর মাতারে পিতারে ।

দুর্যো । আবার সে পুরাতন কথা ! মা, মা !
নির্জ্ঞানে বসিয়া করিতেছি আমি
পাণ্ডবের বধের উপায় ।
এ সময় অর্থহীন উপদেশে
বাধা দিতে এসো না আমারে ।
যদি আশীর্ব্বাদে ইচ্ছা থাকে, কর ।
নহে মাতা, গৃহে ফিরি' লওগে বিশ্রাম ।
সমরে হইয়া জয়ী, যেদিন ফিরিব
মাতা—প্রণমিতে চরণে তোমার,
সেইদিন অর্থহীন ষত বাক্য আছে
অভিধানে, একান্তে বসিয়া—
নিঃশেষে ঢালিও তুমি সন্তানের কানে ।

গান্ধারী । কেমনে হইবে তুমি জয়ী ?

দুর্যো । যেই দিন জয়-লক্ষ্মী মাথায় বহিষা
বসাইব সম্মুখে তোমার,
সেইদিন জিজ্ঞাসিয়ো মাতা ।

গান্ধারী । মনেও এনো না বৎস,
ভীষ্ম দ্রোণ সহায় পাইয়া
সমরে করিবে তুমি পাণ্ডবে সংহার ।

দুর্যো । একি অভিশাপ নাকি মাতা ?

গান্ধারী । সত্য কথা, নহে অভিশাপ । সন্তানুলে

দিব্যচক্ষু প্রস্ফুটিত করিয়া আমার,—
 শুধুই আমার কেন, তোমার পিতার—
 তাঁহায়েও করি' চক্ষুস্থান
 গিয়াছেন শ্রীমধুসূদন ।

হুঁস্যা ।

ওহো সেই ভীষণ কুহক !

চক্ষুস্থতী করেনি তোমারে কৃষ্ণ, মাতা ।
 পিতারে দেখিয়া অন্ধ, মায়াজাল
 করিয়া বিস্তার, তোমাদের অন্ধ ক'রে
 চ'লে গেছে শঠ-শিরোমণি ।

আমিও মা মায়াবলে

ভ্রমণ করিতে পারি আকাশ মণ্ডলে,
 প্রবেশ করিতে পারি রসাতলে । যেতে পারি
 ইন্দ্রপুরী অমরায়, ইচ্ছা যদি করি ।

কুহকী কৃষ্ণের মত, আমারো শরীরে
 অসংখ্য বিচিত্র রূপ করাতে পারি মা
 প্রদর্শন । ইন্দ্রজাল, মায়ী ও কুহক—

নারী তুমি—তোমাকে দেখাতে পারে ভয়,
 গৃহীতাস্ত্র বীর আমি,

সে কুহকে শোশমাত্র ভীত নহি মাতঃ ।

যাও মাতা স্বভবনে ! শ্রীচরণে অনুরোধ—

জীবন থাকিতে যা পারিব না আমি,

সে কার্য্য হইতে মোরে

আর তুমি আমিও না নিরস্ত করিতে ।

আগেই ক'রোছ আমি সমর ঘোষণা ।

একপণ— হয় পঞ্চপাণ্ডব সংহার,

নয়, তব শত সন্তানের
বীরাশাস্ত্র রণাঙ্গন-ধূলিতে শয়ন ।
গাঙ্গারী তবে আর কি বলিব ! তবে
ধর্ম্মানুমোদিত যুদ্ধ কর হুর্ষ্যোধন

নেপথ্যে কলরব

হুর্ষ্যো । অবশ্য করিব মাতা ।
হীন নহে মস্তান গোমার ।

গাঙ্গারীর প্রহান

ভীষ্ম, দ্রোণাদির প্রবেশ

হুর্ষ্যো । পিতামহ, একাদশ অক্ষৌহিণী সেনা
আপনার মৈনাপত্য করিয়া শ্রবণ
সিংহনাদে করিতেছে উল্লাস প্রকাশ !
সগর্বে চরণক্ষেপে চ'লেছে তাহারা,
স-তরঙ্গ বিশাল নদীর মত,
কুরুক্ষেত্রে হিরণ্যতী-তীরে ।
কেন গর্বে ? বুঝিয়াছে তারা—
গাঙ্গেয় নায়ক যাহাদের,
নর ত দূরের কথা—কিবা দেব, কিবা
দৈত্য, অথবা উভয় হ'তে এ জগতে
আরও কেহ যদি থাকে শক্তিমান, কোন
মতে পারিবে না তাদের করিতে পরাজয় ।
আগে হ'তে জয়-স্বপ্ন সমস্ত রথীর
গতিশব্দে হতেছে মুখর ।
তথাপি তথাপি—পিতামহ—কৌতূহল—
শুধু কৌতূহল—প্রশ্নের আমার
অপরাধ যতপি না করেন গ্রহণ—

ভীষ্ম । বল বল—ভেবেছ কি মহারাজ,
 কার্পণ্য করিব যুদ্ধে ?
 দুষ্যো । পাণ্ডব অত্যন্ত প্রিয় আপনার—
 ভীষ্ম । প্রিয় কেন মহারাজ, প্রিয়তর হ'তে
 প্রিয়তম । পাণ্ডব-প্রিয়তা মোর মোহ
 নহে—ধর্ম । তথাপি আশ্রয় হও রাজা ।

কর্ণের প্রবেশ

এস, এস হে রাধেয়—
 রণক্ষেত্রে গমনের আগে
 হ'য়েছিল তোমারে দেখিতে অভিলাষ,
 এসেছ সুযোগ্য কালে, দুর্যোধনে বলি—
 তুমিও শুনিয়া যাও, শুন দুর্যোধন—
 হ'ক প্রিয়, প্রিয় হতে প্রিয়,
 অসীম প্রিয়তা-সেব্য সে পঞ্চপাণ্ডব,
 যখন প্রতিজ্ঞা করি' লইয়াছি
 তোমার সৈন্তের ভার,
 কার্পণ্য করিয়া যুদ্ধ করিব না আমি ।

দুষ্যো । নাশিবেন পাণ্ডবে ?

ভীষ্ম । সমর্থ হই যদি ।

দ্রোণ । সত্যব্রত গাঙ্গেয়ের উপযোগী কথা ।

শকুনি । (দুঃশাসনকে ইঙ্গিত) আরে মূর্থ, এ সমস্ত বৃথা কথা !
 সেই-সে কথাটা জিজ্ঞাসা করিতে বল ।

দুঃশাসন দুর্যোধনকে ইঙ্গিত করিল

দুষ্যো । পিতামহ ! কোতুহল—

ভীষ্ম । আবার কিসের কোতুহল—

- দুৰ্য্যো । অণু নহে পিতামহ—
- ভীষ্ম । বার বার কথার সঙ্কোচে
আমার অবাধ গতি
নিরুদ্ধ ক'র না দুৰ্য্যোধন ।
- দুৰ্য্যো । ইচ্ছামৃত্যু আপনি মহান্—
- ভীষ্ম । মৃত্যু-ইচ্ছা এখনো জাগেনি রাজা,
তবে, জীবন হ'য়েছে সুদুর্ভর ।
- দুৰ্য্যো । পাণ্ডবের সপ্ত অক্ষৌহিনী
কতদিনে নাশিতে পারেন পিতামহ ?
- ভীষ্ম । যোগ্য প্রশ্ন মহারাজ—এ প্রশ্ন করিতে
সঙ্কোচের কিছু নাহি ছিল প্রয়োজন ।
অগ্রেই ব'লেছি—বলি পুনর্বার,
যুদ্ধে না করিব কৃপণতা ।
যদি নাহি মরি, এক মাসে
সমস্ত পাণ্ডব মৈত্র্য করিব বিনাশ ।
- শকুনি । (জনাস্তিকে) ওই গণ্ডগোল দুঃশাসন—
আশার ভিতরে একটা বিষম ছিদ্র
'যদি নাহি মরি ।'
- দুঃশা । ইচ্ছামৃত্যু পিতামহ,
মরণে যত্নপি ইচ্ছা নাহি আপনার
কে বধিতে পারে আপনারে ?
- ভীষ্ম । রণক্ষেত্রে শিখণ্ডীরে যত্নপি দেখিতে
পাই, অস্ত্রত্যাগ করিব তখনি ।
জীবন থাকিতে মহারাজ,
আর স্পর্শ করিব না তাহা । (দুৰ্য্যোধনাদিৰ হস্ত)

- দূর্যো
শকুনি সেই নারীমূর্তি বীর ?
শিখণ্ডী ? ক্রপদ-পুত্র ? (হাস্ত) বৎস দূর্যোধন !
সেই অকল্যাণ-দৃষ্টি নারীমুখ রথীটার
বিনাশের ভার আমার উপরে দাও ।
- দুঃশা আপনার সম্মুখে সে কোন কালে
উপস্থিত হইতে নারিবে পিতামহ ।
- ভীষ্ম । যদি পার সুবল-নন্দন,
যদি পার দুঃশাসন, রোপিতে তাহারে—
এক মাস মাত্র কালে,
ভূমিশায়ী হবে ওই সপ্ত অক্ষৌহিনী ।
- দূর্যো । আচার্য্য ?
- দ্রোণ । আমারও ওই একমাস রাজা !
পঞ্চাশতি বরষ বয়স—অতি বৃদ্ধ,—
তথাপি, তথাপি শুন রাজা,
জন্মে নাই হেন যোদ্ধা শাস্ত্রিও ভুবনে,
গ্রায় যুদ্ধে এই বৃদ্ধে বিনাশিতে পারে ।
- দূর্যো পরম সন্তোষ মহাশয়ন,
এ অপূর্ব কথা—দৈববাণী মত
বিশ্বজয়ে করিছে আমারে উত্তেজিত ।
- দুঃশা । তুচ্ছ সে পাণ্ডব !
- দূর্যো । তুচ্ছতম তাহাদের সহযোগী নৃপ ।
মহাভাগ কৃপাচার্য্য ?
- কৃপ । নিজ-শক্তি শক্র-শক্তি, সমর-গুরুত্ব
সমস্ত বিচারে, মম অনুমান রাজা,
আমি পারি দুই মাসে ।

- অথ । দশদিনে আমি পারি রাজা ।
- কর্ণ । আমি কি বলিব মহারাজ ?
- দুর্যো । বল সখা, এখনো নিশ্চিত নহি আমি ।
- কর্ণ । আমি পারি পাঁচ দিনে । পঞ্চম দিবস-শেষে
একটিও প্রাণী জীবনের চিহ্ন ল'য়ে
অবাস্তিত না রহিবে পাণ্ডব শিবিরে ।
- ভীষ্ম । আত্মশ্লাঘাকারী হীন-স্বভাবের নন্দন,
এখনও দেখ নাই এক রথে
কেশব-অর্জুনে । সহজ-দয়ালু রাধাসুত ।
দেখিতেছি হারিয়েছ কবচ-কুণ্ডল,
যে তাহা লইয়া গেছে, দেখিতেছি
সে তোমারি দয়া অস্ত্রে তোমারি ভবনে
তোমারে বধিয়া গেছে ।
আর তুমি নহ অতিরথ, নহ রথী,
নহ অর্ধরথী—তাই জেনো হে রাধেয়,
আর, রথীপদবাচ্য নহ তুমি ।
শুন দুর্যোধন, কবচ-কুণ্ডলহারা
এই তব হতভাগ্য সখা,
কুসুম কোমল দেহ ল'য়ে,
রণস্থলে হীন সৈনিকের হীন
অস্ত্রমুখে দাঁড়াতে সমর্থ নহে আর ।
কল্যা ছিল যে অমর সম
আজি সে সহজ বধ্য ।
- কর্ণ । সত্য বটে পিতামহ,
সহজাত কবচ-কুণ্ডলধারী—ছিলাম অবধ্য

আমি মানবের । শুধুই মানব কেন !

মানব, দানব, দেবতাঃ—

বিশ্বশ্রুটি বিধি নহে গণ্যের বাহিরে ।

কিন্তু আজ অমূল্য সে দু'টি বিনিময়ে

লভেছি সংহার-শক্তি । ইচ্ছামৃত্যু

শাস্ত্রনন্দন, আপনারো প্রাণ যদি

ল'তে ইচ্ছা করি, ইচ্ছার বিরুদ্ধে মৃত্যু—

সেই দণ্ডে আচ্ছন্ন করিবে আপনারে ।

এক রথে কেশব-অর্জুন ?

বিধিতে যতপি চাই কেশব শরীর,

যদি বিধি কেশব-নির্ভর ধনঞ্জয়ে

আর চারি দিনে চারি ভ্রাতা ।

পঞ্চম দিবস-শেষে তোমার কেশব

পঞ্চ পাণ্ডবের শোকে

অজস্র অশ্রুর ধারে রচিয়া তটিনী—

ভেমে ভেমে ফিরে যাবে ঘরকায় ।

ভীষ্ম কি করিব বল দুখোদন ।

যদি এই হীনসূত-প্রলাপে বিশ্বাসে

দিতে ইচ্ছা হয় তারে সৈন্যপত্য ভার,

বল, অস্ত্র করি পারত্যাগ ।

কর্ণ । এত হীন নহি পিতামহ, আপনারে

করি' অতিক্রম, আমি হব সৈন্যপতি ।

পূর্বের প্রতিজ্ঞা যাহা, এখনা সে কথা মোর—

জীবিত রবেন যতদিন গঙ্গাসূত,

রণক্ষেত্রে অস্ত্রে হাত দিব নাকো আমি ।

- ভীষ্ম । অশুভা করহ রাজা, কুরুক্ষেত্রে চলি ।
- দুর্যো । আজ্ঞা আপনার পিতামহ । আজ্ঞাবহ
দাস আমি । আপনি যুদ্ধের নেতা—
আমরা সকলে অশুচর । ভীষ্ম, দ্রোণাদির প্রশ্নান
- দুর্যো । শিখণ্ডী বধের ভার লইলে মাতুল ?
- শকুনি । নারীবধ 'ভার' বলা
বিরাট হাশ্মের কথা রাজা । দুঃশাসন-সহ-প্রশ্নান
- কর্ণ । পিতামহ প্রতি ক্রোধে অস্ত্রত্যাগ করি
তোমার বিষম ক্ষতি করিয়াছি সখা ।
- দুর্যো । কেন—কেন সখা ?
মাতুল কি শিখণ্ডীকে রোধিতে পারিবে ?
- কর্ণ । সংশয়—সংশয়—হবে অসম্ভব, যদি
ধনঞ্জয় বাহুদেব রক্ষা কবে তারে ।
কিন্তু আমি ? ভায়, পাণ্ডব-বিজয়ে রাজা
অস্ত্র ধরা আমার না হ'ত প্রয়োজন ।
- দুর্যো । বৃষ্টিতে যে অক্ষয় রাশেয়—বল বল—
কেন সখা, একথা বলিলে তুমি ?
মাতুল কি পারিবে না ? দুঃশাসন ? আমি ?
জয়দ্রথ ? অশ্বথামা ? কৃপাচার্য্য ? দ্রোণ ?
কেহ পারিবে না ?
- কর্ণ । 'হীন হীন' ব'লে নিত্য,
ক'য়েছিল বৃদ্ধ মোর মস্তিষ্ক চঞ্চল !
কি এক অশুভক্ষণে আত্ম হারাইয়া
করিবু প্রতিজ্ঞা—অস্ত্রত্যাগ রণস্থলে ।
তার ফলে—দেবের অবধা, মহাপ্রাজ্ঞ,

মহাধনুর্ধর, মহাসত্ত্ব নরশ্রেষ্ঠ
ক্ষুদ্র বালকের বাণে হইবে নিহত ।
দূষ্যো । কেহ পারিবে না, আগম রোধিতে তার ?
কর্ণ । মনে লয় মহাবাজ, আমি ভিন্ন আর
কোনও ধনুর্ধর পারিবে না ।
দূষ্যো । কোন কালে—সংশয় করিনি সখা
তোমার বিক্রমে । তোমার অস্তিত্ব-গর্বে
গর্বান্বিত আমি । আজ একবার—
অনুরোধ—দাও বুঝাইয়া ।

কর্ণ একঘাতিনৌ শক্তি বাহির করিল

অসংখ্য বিদ্যাংধারানুখী !
ও-কি অদ্ভুত, অঙ্গরাজ ?
কর্ণ । কবচ-কুণ্ডল-বিনিময়ে লাভিয়াছি
একবিঘাতিনৌ শক্তি—দিয়াছে বাসব ।
উপক্রম পৃথিবী রক্ষায় - দানব সংহার
কালে—একবার হয় প্রয়োজন ।
সমস্ত আকাশ-ভরা জ্যোতিষ্কমণ্ডলী
হ'য়ে চূর্ণ, হ'ত যদি সখা,
শিগগুরি দেহ আবরণ,—
শক্তির আঘাত তারা রোধিতে নারিত ।
দূষ্যো । তুলে রাখ, তুলে রাখ সখা !
কর্ণ । তুলে রাখি ?
দূষ্যো । রাখ—রাখ, করযোড়ে অনুরোধ—
হে আমার আত্ম হ'তে প্রিয়—
তুলে রাখ, যতদিন ভিক্ষা নাহি করি ।

কেশবের দেহভেদ করি,
 একদিনে পাণ্ডব-সংহার নাহি চাই ।
 পাঁচদিনে পঞ্চভ্রাতা ।
 কর্ণ । এই উরস-পিঞ্জরে
 রাখিলাম লুকাইয়া রাজা ।

চতুর্থ দৃশ্য

কর্ণ-ভবন—কক্ষ

কর্ণ ও দুঃশাসন

দুঃশা । কি যে হ'ল, বুঝিতে নারিছ অঙ্গরাজ !
 কর্ণ । সমস্ত বুঝেছি আমি । মোহিনী-মায়ায়
 সবারে ক'রেছে অন্ধ, দেখায়েছে বাজি ।
 আগে হ'তে মুগ্ধ ভীষ্ম, মুগ্ধ সে বিদুর,
 কৃষ্ণ যা দেখিতে বলে, তাই দেখে তারা
 পিতা তব চির অন্ধ—যা শুনেছে কানে,
 অস্তদৃষ্টি নিয়া তাই ক'রেছে দর্শন ।
 সব মিথ্যা—মায়া সে মোহিনী—
 সকল অস্তিত্ব-শূন্য—একমাত্র সত্য
 সেথা, ছিল সে নিপুণ বাজিকর ।
 দুঃশা । বড়ই বিষণ্ণ আজি পিতা—
 হেঁটমুণ্ডে চিন্তায় মগন ।
 কর্ণ । সত্বর চলিয়া যাও ভ্রাতঃ,
 করিয়া আমার নাম—

বিষণ্ণ হইতে নিষেধ করহ তাঁরে ।

কল্যাণ প্রাতে ক'রে দাঁও সমর ঘোষণা ।

কৃষ্ণের ওই বিশ্বরূপ বাজি,

সভাস্থলে সবারে শুনায়ে গেল—

হ'য়েছে আসন্ন-মৃত্যু সমস্ত পাণ্ডবা

দুঃশা । তবে যাই ?

কর্ণ । এখনি—বিলম্ব নহে ক্ষণ । অদর্শন-

অবকাশে যদি সন্ধি ক'রে ফেলে রাজা !

দুঃশা । একি অঙ্গরাজ !

কর্ণ । দেখো না দেখো না অঙ্গ—হ'য়েছি, হ'য়েছি,

সত্য—কবচ-কুণ্ডল বিনিময়ে

অমোঘ শক্তির অধিকারী ।

দেখো না— দেখো না অঙ্গ মোর, চ'লে যাও—

রাজাকে আশ্বাস দাঁও, দেখো না—দেখো না

মোরে—আমি অঙ্গরাজ ।

দুঃশাসনের প্রস্থান

পঞ্চাবতীর প্রবেশ

কর্ণ । বিষণ্ণ কি হেতু প্রাণময়ী ? হারায়ছি

কবচ-কুণ্ডল * দৃষ্টির প্রহার মোর

সহিত অক্ষয় যোবা, ভেবেছ কি

বধ্য আমি রণক্ষেত্রে সে বীরের কাছে ?

পদ্মা । পক্ষপাতী হইল দেবতা । নরে নরে

প্রতিদ্বন্দ্বী—দেবে রণে যে ষার শক্তির

পরিচয়,—মাঝে হ'তে বাদী হ'ল

সব ! ষিক দেবতায়—

ষিক তার স্বরপতি নামে ।

কর্ণ ।

নর প্রতি হীন মায়া বশে
 ভিখারী সাজিয়া কপট ভিক্ষাব নামে,
 জীবন লুঠিতে এলো গৃহে—সে তস্কর !
 ধিক্কার দিয়ো না তারে দেবি !
 দেবেন্দ্র ক'রেছে দয়া—
 করিয়া কবচ-শূণ্য উরস আমার ।
 কবচ-কুণ্ডল গেছে—যাক ।
 সঙ্গে সঙ্গে চ'লে গেছে মর্ষের পীড়ক
 একটি অশাস্তি মোর,—
 নিত্য নিত্য নিশামানে,
 নিভৃত চিন্তার এক নির্ভয় প্রহার ।
 হীন বংশে জন্মিয়াছি আমি—
 অভিজাত ক্ষত্রিয় ব্রাহ্মণ—
 ভীষ্ম, দ্রোণ, কূপ, অশ্বথামা—
 অস্তরে বাহিরে করে ঘৃণা মোরে ।
 সৰ্বদা সকলে মিলে কটুক্তি শুনায়
 সভাস্থলে । সেই আমি চিরঘৃণ্য—
 রাধার নন্দন, আমারে কি হেতু প্রিয়ে
 দেবতা-দুর্লভ এই দান ?
 কেবা সে দেবতা ? কেন সে দিয়াছে মোরে—
 জন্মসঙ্গে এই মোর লজ্জা-অভিশাপ ?
 মিত্র নহে সে আমার, ক'রেছে শত্রুতা ।
 যদি আমি বধিতাম ধনঞ্জয়ে বনে,
 পৃথিবী গাহিত—ওই সব অভিজাত
 করিত চীৎকার—

আকাশে তুলিয়া প্রতিধ্বনি,
 “হীনজাতি সূতপুত্র বধেনি অর্জুনে,
 বধেছে তাহার ওই কবচ-কুণ্ডল।”
 কবচ-কুণ্ডল গেছে—যাক্—
 আছে কর্ণ—আর তার উপাধি—রাধেয়।
 এ যদি আমার থাকে, এখনো, এখনো
 আমি ভুবনে অজেয় পদ্মাবতী।
 রামের সর্ব্বস্ব ল’য়ে আসিয়াছি ঘরে,
 এ জগতে এখনো এমন কেহ নাই
 রাম-শিয়ো করে অতিক্রম।

পদ্মা। তাই বল, তাই বল প্রভু,—
 আবার উল্লাস আনি প্রাণে।

কর্ণ। উল্লাস—উল্লাস। কর্ণের গৃহিণী তুমি,
 বিষাদের স্বরূপ কেমন,
 এ জীবনে জানে না যে জন।

বিষণ্নতা তোমারে দেখিতে আসি,
 হাসিতে হাসিতে যাক্ নিজগৃহে ফিরে।

পদ্মা। তথাপি সংশয়—

কর্ণ। সংশয়? কি হেতু প্রিয়ে?
 সমরে আমার পরাজয়?

পদ্মা। কোথা হ’তে—কখন কেমন ক’রে আসে—
 বুঝিতে না পারি। দূর ক’রে দিতে চাই—
 এমন কঠিন ভাবে সময়ে সময়ে
 আক্রমণ করে মোর মন—
 কোন মতে পরাস্ত করিতে নারি তারে।

কর্ণ কিসের সংশয় ? যখনি আসিবে সেটা
তোমাতে করিতে আক্রমণ,
দৃঢ়স্বরে তখনি শুনাবে তারে,
স্বামী মোর মহীয়সী রাধার নন্দন ।

পদ্মা । হায় ! তাই ত বলিলে যাই । কিন্তু নাথ,
বলিবার মুখে, শুনাইতে
দুরন্ত সংশয়ে কে যেন ছুঁকর দিয়ে
করে মোর গুঁঠ আচ্ছাদন । মনে হয়,
সংশয়ের মূল যেন নিহিত র'য়েছে,
প্রিয়তম, তোমার রাধেয়-পরিচয়ে ।
মনে হয়, গুঁঠ পরিচয়-গর্ভে
তোমার সমস্ত শক্তি রয়েছে নিহিত ।
শুধু কি সংশয়, সঙ্গে সঙ্গে ভয়—
থাকে থাকে হৃদয় দলিয়া উঠে বেগে ।
মনে হয় দৈবের বিপাক যদি নাথ,
একবার ভাঙ্গে পরিচয়, তোমার গুঁঠ
তেজরাশি, সঞ্চিত পারদ-খণ্ড মত
কণা হ'তে কণা হ'য়ে
পরিষ্কিপ্ত হইবে ভূতলে । আর তাহা
একত্র করিয়া এ শক্তি-ভাণ্ডার মধ্যে

(কর্ণের বক্ষে হস্ত দিয়া)

কেহ যেন পারিবে না প্রভু, সে অপূর্ব
শক্তি রাশি পুনরায় করিতে সঞ্চিত ।

কর্ণ । মিথ্যা নহে প্রাণময়ী ।

পদ্মা । মিথ্যা নহে ? আশঙ্কা আমার তবে সত্য ?

- কর্ণ । সত্য । যত কিছু শক্তি মোর
সমস্ত নিহিত ওই 'রাধেয়' সংজায় ।
- পদ্মা । তবে কি তবে কি—
- কর্ণ । সাবধান পদ্মাবতী, মনেও করো না
উচ্চারণ । কখনো কি দেখেছ জীবনে
সে অপূর্ব মাতৃস্নেহ ? দূর হ'তে
তরুণ সন্তানে দরশনে বাৎসল্যে
গলিত অঙ্গ—স্বধাধারে ক্ষীরের সঞ্চারণ—
অন্ধ আঁধি, বাহু সঙ্গে উন্মুক্ত করুণা !
তুমিও ত মাতা পদ্মাবতী,
সত্য বল—তুমিও কি পরেছ বয়িতে
সে অপূর্ব স্নেহধারা অন্ধ সন্তানে ?
- পদ্মা । পারি নাই, দেখি নাই, শুনিয়াছি প্রভু ।
- কর্ণ । কোথায়—কোথায় প্রিয়তমে ?
- পদ্মা । বৃন্দাবনে, যশোদার স্নেহ—
অবিশ্রান্ত রষ্টি হ'ত গোপালের শিরে ।
- কর্ণ । সত্য—আমিও শুনেছি । আমি শুধু কেন,
বিশ্ববাসী শুনিয়াছে সে স্নেহের কথা ।
- পদ্মা । কিন্তু হায়, প্রিয়তম,
সেই কৃষ্ণ হ'ল শেষে দেবকী-নন্দন ।
- কর্ণ । জন্মেছে কি মৃত্যুভয় প্রিয়ে ?
- পদ্মা । না—না !
- কর্ণ । ভেবেছ কি, হীন যোদ্ধামত
জীবনে মানিব পরাভব ?
- পদ্মা । না—না ! কখন ভাবি না প্রিয়তম ।

কর্ণ । চ'লে যাও—নিশ্চিন্তে ঘুমাও প্রিয়তমে !
 সকল পুরুষ কৃষ্ণ নয়,
 সব নারী হয় না ষশোদা ।
 নারী-শিরোমণি রাধা জননী আমার । পদ্মাবতীর প্রহান

বৃষকেতুর প্রবেশ

বৃষ । পিতা—পি ।

কর্ণ । কি—কি প্রিয়তম ? বল—বল ।

(বৃষকেতু কেবল নেপথ্যের দিকে চাহিল)

কি আছে, কে আছে হোথা বল প্রিয়তম ।

উল্লাসে বলিতে এলে, এসে মুক মত,—

ওকি বৃষকেতু ? উল্লাস নয়নে ঝরে,

অধরোষ্ঠে নাচিছে উল্লাস—কারে দেখে ?

বল বৎস, কারে দেখে নিরুদ্ধ নিশ্বাস ?

(নেপথ্যে) কৃষ্ণ । যাও প্রতিহারী,

পাইয়াছি প্রভুরে তোমার ।

কৃষ্ণের প্রবেশ

কর্ণ । (অগ্রগমন করিতে করিতে) পদ্মা—পদ্মাবতী !

বৃষ্ণ হস্ত তুলিয়া নিষেধ করিলেন

না—না—না—ছুটে যা, ছুটে যা বৃষকেতু,

ডেকে আনু তোব জননীরে ।

বলু তারে এসেছে তাহার ঘরে

বিনা নিমন্ত্রণে তার নারায়ণ ।

বৃষকেতু ছুটিয়া যাউতে কৃষ্ণ তাহাকে ধরিলেন

কৃষ্ণ । অপেক্ষ--অপেক্ষ প্রিয়তম ।

ষেয়ো পরে, আদেশ করিব যে সময় ।

রহ দ্বারে, দ্বারারূপে দ্বার আগুলিয়া ।
অন্য প্রাণী কেহ যেন না পশে এ ঘরে ।

বৃষ । মাকে বলিব না ?

কৃষ্ণ । না ।

বৃষ । আমি থাকিব না ?

কৃষ্ণ । না ।

বৃষ । মা যদি আসিতে চান ?

কৃষ্ণ । নিষেধ করিবে তাঁরে ।

বৃষকেতুর প্রশ্নান

কর্ণ । তারপর ? একি সত্য ?

অথবা সে বিরাট স্বপন—

কল্য যাহা দেখায়েছ কৌরব সভায়—

একটি মধুর অংশ তার এই দিব্য

অপরূপ হীন জাতি সূত-পুত্র গৃহে ?

কৃষ্ণ । এসেছি আমার আর্ষ্যে দিতে নমস্কার !

কর্ণ । হে ঐন্দ্রজালিক !

করিতে এসো না মোরে মন্ত্রমুগ্ধ !

আমি কর্ণ, হীন সূত—রাধার নন্দন ।

কৃষ্ণ । নহেন আপনি আঘা !

কর্ণ । নহি আমি ?

সর্বেন্দ্রিয় শিথিল ক'র না বাহুদেব !

কৃষ্ণ । কথায় কি হ'ল অবিশ্বাস ?

কর্ণ । সত্য-আবির্ভাব তুমি—মধুর হইতে

স্বমধুর ! মুগ্ধ নর বলে—নারায়ণ ।

কিন্তু হে কেশব, ঐ সত্য তোমার আজি

ব্রহ্মাস্ত্রের বলে—

আমার এ মুক্তবক্ষে করিল প্রহার ।
 বধ্য আজি যেন সনাকার ।
 আর একবার— শুনাও আমারে বাসুদেব,
 নিশ্চিন্ত নিশ্বাসে মরিতে প্রস্তুত হই—
 নহি—নহি কি রাধেয় আমি ?

কৃষ্ণ । না, আপনি কোস্তেয় । কর্ণ বসিধা পড়িলেন

সত্য বটে মতিমান,
 অতি এ বিস্ময়কর কথা ।
 কিন্তু সত্য— যথা আমি আপন সম্মুখে ।
 পিতৃস্বমা-গর্ভে তুমি জন্মেছ ধামান্,
 কল্যাকালে জননী—আদিত্য ঔরসে ।

কর্ণ । (উঠিয়া) তারপর ? জানিয়া পরম শত্রু মোরে
 বধিতে কি এলে কৃষ্ণ ? হেসো না—হেসো না—
 এ হ'তে স্ত্রীক্ষু নয় গাণ্ডীবীর বাণ ।

কৃষ্ণ । নহে আর্ঘ্য, লইতে এসেছি আপনারে ।

কর্ণ । কোথায়—কোথায় কৃষ্ণ ?

কৃষ্ণ । যেই স্থানে অন্ততপ্তা জননী তোমার,
 বসে আছে তোমার মিলন প্রতীক্ষায় ।
 মতিমান সর্বগাপ্তবিশারদ তুমি—
 শাস্ত্রমতে পাণ্ডুর তনয়—বৃষিকূলে
 আমি তব ভ্রাতা । সত্যসন্ধ দাতৃশ্রেষ্ঠ
 করুণা-নিধান । তাই আমি আসিয়াছি
 নিমন্ত্রণ করিতে তোমারে ।
 হে আর্ঘ্য, মিনতি মোর—
 ফিরে এসো নিজ গৃহে । অধিকার কর

তব—হে জ্যেষ্ঠ পাণ্ডব, ধর্মাম্বুমোদিত
সিংহাসন। যুধিষ্ঠির হ'ন যুবরাজ।

ভীমসেন শ্বেতছত্র ধরন মস্তকে।

হ'ক ধনঞ্জয় তব রথের সারথি।

প্রতি দিবসের ষষ্ঠ ভাগে

আস্থন দ্রৌপদী তব করিতে অর্চনা।

দু'টি মাজীসূত তব হ'ক অনুচর।

কর্ণ।

এত পুরস্কার-প্রলোভন, হে কেশব,

ইষ্ট কোন কালে ধরেনি সম্মুখে।

প্রতিদানে লহ কৃষ্ণ, লহ প্রিয়তম,

এ দীন ভ্রাতার আলিঙ্গন। (আলিঙ্গন)

চূর্ণ করি' মর্মস্থল ফুটিয়া উঠিল

যেই স্বপ্নহারা স্নেহ, হে কিশোর,

হে মধুর, কৃতার্থ করিতে যোরে

ধর শ্রীঅধরে ! (চুম্বন) পদ্মবতী !

কৃষ্ণ।

(হস্ত উত্তোলন) যাবে না, যাবে না দাদা !

কর্ণ।

শুনেছো আমার কথা, দেখেছো আমাবে !

হে সর্বজ্ঞ নরোত্তম প্রকৃতি আমার

এখনো কি তোমার অজ্ঞাত—

কৃষ্ণ।

পিতৃস্মৃতি প্রেরিত হইয়া

করজোড়ে আপনারে করি আবাহন।

কর্ণ।

জেনেছে কি ধর্মরাজ ?

শুনেছে কি মা'র মুখে এ মত্ত কাহিনী ?

কৃষ্ণ।

শুনিয়াছি আমি। আর এক অন্তরঙ্গ—

শুনেছে বিদূর মহামতি।

কর্ণ ।

অনুরোধ—যতদিন নাহি মরি আমি,
এ নিষ্ঠুর ইতিহাস শুনায়ে না তাঁরে ।
শুনিলে সর্বস্ব ত্যজি', আসিবেন
গলবস্ত্রে পূজিতে আমারে যুধিষ্ঠির ।
ঠেলিলাম বাসুদেব, তব অনুরোধ—
পানিব না উপেক্ষা করিতে তাঁরে ।
চির-লোভনীর সঙ্গ যার—
সে যে আজ অমুজ আমার বাসুদেব
হইবে সঙ্কলে মোর প্রচণ্ড আঘাত,
ভয়—কৃষ্ণ, চূর্ণ হ'য়ে যাবে ।

কৃষ্ণ ।

পৃথ্বীর সংহার দশা এনো না কোন্তেয়,
বাক্য মম কর প্রণিধান ।

কর্ণ ।

রাধেয়—রাধেয় বল ভাই ।

হে অদ্ভুত, হে অনন্ত অন্ধকার হ'তে
চক্ষুর নিমেষহারী রূপোচ্ছ্বাস ল'য়ে
ক্ষণ-প্রকটিত দীপ্ত আত্মার আলোক !
বিয়োগান্ত এ অপূর্ব প্রথম মিলনে
এই লগ্ন কোন্তেয়ের শেষ আলিঙ্গন । (আলিঙ্গন)
আবার রাধেয় আমি ।

পৃথ্বীর সংহার দশা বলিতেছ তুমি ?
রসাতলে কবে সে যাইবে বাসুদেব ?
নিষ্ঠুর জননী-তাক্ত, সগোজাত শিশু,
অজ্ঞানে অবস্থা বুঝে ভূমিতে পড়িয়া
যে সময় তারস্বরে করিল ক্রন্দন,
বিদীর্ণ হইয়া পৃথ্বী—সীতারে যেমন—

কেন তারে সে সময় লুকালো না কোলে ?
বাসুদেব ! বল না কৌন্তেয় আর মোরে ।
আবার রাধেয় আমি ।

কৃষ্ণ । জেনেছি যখন ভাই, রাধেয় বলিব
কোন মুহুর্তে ? মনঃক্ষোভ লয়ে
ফিরিয়া চলিছ অর্থাৎ, দেহ অনুমতি ।

কর্ণ । মনঃক্ষোভ ? হ'তেছে তোমার ? কি রূপ সে
প্রিয়তম ? বল কৃষ্ণ, বল ভাই,
কি রূপ তীব্রতা তার ?

স্বর্গ মূল্যহীন-করা উপহার—
ভ্রাতৃত্ব তোমার লইতে অশক্ত আমি ।
প্রতিষেধা জানে, এতকাল যার বধে
নিশিদিন করিয়াছি উপায় কল্পনা—
অদৃষ্টের তীব্র পরিহাস—

আজ সে আমার কৃষ্ণ, কনিষ্ঠ সোদর :
দূর হ'তে যারে দেখে প্রমত্ত কামনা
ছুটিবে বাধিতে বক্ষে মুগ্ধ আলিঙ্গনে,
হে প্রিয়, হে প্রিয়তম—এক হস্ত
বক্ষে দিয়া, অতঃপাছ প্রসারিয়া,
বিধিতে হইবে মোরে মন্বহীন শরে—
প্রাণাধিক সেই ধনজয়ে !

মর্ষ্য চায় পরাজয়, সত্য চায় জয়,
মমুষ্য চায় নিষ্ঠুরতা । বাসুদেব ।
মম্ব-ভাঙা প্রীতিপুষ্প অঞ্জলিতে ধরি',
গুনাতে আসিলে তুমি মনঃক্ষোভ কথা !

কৃষ্ণ । আর শুনাব না মহাত্মনু । সদাব্রত, দানব্রত
আদিত্য-নন্দন, রাধার বাৎসল্য স্মরি',
এই যে করিলে তুমি ত্যাগ—পৃথিবীর আধিপত্য,
আভিজাত্য—অস্তিত্ব তোমার এই যে হে
নিষ্ফেপ করিলে তুমি চির অন্ধকারে—
হে আৰ্য্য, প্রণতি করি' বলি আপনারে,
আজি হ'তে দান বাক্য
চিরদিন সংযুক্ত রহিবে তব নামে ।

কর্ণ । আবাহন করিবারে, হে বৃষ্ণী-কুঞ্জর,
কোন কালে ছিল না সাহস—
সেই তুমি বিনা নিমন্ত্রণে স্মৃত-গৃহে—

কৃষ্ণ । না আৰ্য্য, না আৰ্য্য—আসিয়াছি নিঃস্বপ্নে ।

কর্ণ । বৃষকেতু ।—বাসুদেব স্মৃতপুত্র আমি—
কিন্তু ওই অজ্ঞান বালক ?

কৃষ্ণ । সে আমার ভ্রাতৃপুত্র—যুধিষ্ঠির ভীমার্জুন
মাদ্রীর স্নেহ—পিতৃব্য তাহার হে পাণ্ডব !

বৃষকেতুর প্রবেশ

কর্ণ । বৃষকেতু বল গিয়া মাতারে তোমার --
এসেছে অপূর্ব এক অতিথি তাহার
ঘরে । আবাহন নাহি তার, নাহি বিসর্জন ।
গৃহস্বামী বলিলে অতিথি—অতিথি বলিলে
গৃহস্বামী --লয়ে যাও । (মূঢ়স্বরে) ভাল কথা !
যখন যাইবে কৃষ্ণ ফিরে, জানায়ো প্রণাম
ভ্রাতঃ স্মৃত্যরূপা মাতারে আমার ।

তৃতীয় অঙ্ক

প্রথম দৃশ্য

পাণ্ডব শিবির

কৃষ্ণ ও দ্রৌপদী

দ্রৌপদী । হুরাআর বন্ধনের ভয়ে,

তুমি নাকি, জনার্দন,

বিবাত হইয়াছিলে কোরব সভায় ?

কৃষ্ণ । তারা বলে—প্রিয় সখী !

দ্রৌপদী তারা বলে ! তুমি বুঝি ক'রেছ শ্রবণ,

তাহাদেরি মুখ হ'তে ?

ভীত-চিত্ত দেখিয়া বিরাটে

সলজ্জ হইয়া চির-নির্লজ্জ কোরব,

সঙ্কচিত করিল কি বাধনের দড়ি ?

কৃষ্ণ । কোন মতে হতভাগ্য সর্বনাশ হ'তে

নিরস্ত হ'ল না প্রিয়সখী ।

দ্রৌপদী । কি হেতু কেশব—পার কি বলিতে তুমি ?

মুখে মোর নাহি লেখা, সে ত সখা

দিবে না উত্তর । চোখে মোর আসে অশ্রু-

সাগ্রহে উত্তর তারা করে আচ্ছাদন,

নয়নে কি দেখিছ কেশব ?

দুই গুণ্ডে কথার ভিতর দিয়া

আমার প্রাণের কথা রেখেছি গোপনে,

প্রাণময়, পড়িতে কি শিখ নাই

সখীর প্রাণের লেখা ?

কৃষ্ণ ।

তুমি বল, আমি শুনি--বহুকাল পরে

দেখিতেছি তব মুখে পূর্ণ প্রফুল্লতা !

দেখে, ভারে ভারে কি জানি যে কেন সখী,

আসে ধারায় ধারায় অশ্রু ।

তোমার লোচন-বিন্দু প্রহরী ব'সেছে

মর্মদ্বারে, আমার রোধিছে দৃষ্টি—বল

প্রাণসখী, শুনি আমি । পারিব না আমি

বহুকণ অবস্থিতি করিতে এখানে—

এখনি রাজার দেবী, আসিবে আহ্বান ।

দ্রৌপদী । আগে তুমি বল—বল, বল—

বলিতেই হবে প্রাণসখা !

কি প্রকার সে বিরাট ? কোন্ জগতের

কিরূপ মাটিতে গঠিত হ'য়েছে তাহা ?

গোপীর শাসন ভয়ে ভীতি-বিকম্পিত,

যেই দুটি চাহিত হে সর্বদা সশঙ্ক

চাবিধারে, সেই, এই দু'টি ঢল ঢল

আঁখি, বল ননৌচোর, কতবড়

হ'য়েছিল ? বহিয়া নন্দের বাধা,

যে কোমল শির-শীর্ষে চিহ্ন পড়েছিল,

বলহে গোপাল, সে মাথা তোমার,

কত দূরে উঠেছিল ? সকলে বলিছে—

বিশেষতঃ জনাৰ্দন, তোমার প্রাণের সখা—

কৃষ্ণ ।

সখা কি ব'লেছে সখী ?

দ্রৌপদী । বলে—ভাগ্যবান ধৃতরাষ্ট্র, ভাগ্যবতী
 জননী গান্ধারী—বিরাট দেখিল তারা ।
 যে ভাগ্য পাণ্ডব মধ্যে পাইল না কেহ ।
 এত তার প্রিয় যে পাঞ্চালী,
 তারও ভাগ্যে হল' না দর্শন ।

কৃষ্ণ । দেখিতে কি আছে অভিলাষ ?

দ্রৌপদী । বলে—বিস্ময়কে বিস্মিত করিয়া
 সহস্রা জাগিল মূর্তি । সহস্র মস্তক,
 সহস্র সহস্র স্তম্ভপদ,
 সর্ব দিকে চক্ষু তার,—কর্ণ সর্ব দিকে—
 অপূর্ব পুরুষ এক,—কি বিরাট—
 স্বদেহে সমস্ত বিশ্ব আক্রমণ করি',
 দাঁড়াইল—উক্কে—উক্কে—উঠে গেল শির,
 আরও উক্কে, বিশ্বের বাহিরে দশাঙ্গুলি ।

কৃষ্ণ । দেখিতে কি ইচ্ছা কর মথী ?

দ্রৌপদী । কখন না, কখন না—বাসুদেব, এই
 ক্ষুদ্র মন্মথল, কত ব-শে ধ'রে আছি
 ওই দু'টি চরণ কমল ।
 সহস্র সহস্র পদ ওই বিরাটের
 রাখিবার স্থান কোথা মথা ।
 ক্ষুদ্র নারী, মুগ্ধ-দৃষ্টি, বিজ্ঞতা বিহীন—
 তোমারে দেখার সঙ্গে, আনন্দ-পরশে
 মুগ্ধ-প্রাণে পশে মাদকতা । কৃষ্ণিণী-বল্লভ,
 তোমার বিরাটে আমার কি প্রয়োজন ?
 ক্ষুদ্র ঘট, স্বল্প জলে তৃপ্তি করি লাভ,

তৃষ্ণা নিবারণে সখা,
 কি হেতু ঘাইব মহাসাগরের তীরে ?
 কৃষ্ণ । আমি ত সর্বদা সখী, কিঙ্করের মত
 নিযুক্ত হইয়া থাকি তোমার সেবায় ।
 কিঙ্করীর মত সতাভাষা সখী তব
 তুমিতে তোমাবে চেষ্টা করে ।

দ্রৌপদী । হে পাণ্ডব-নাথ, তুমি জান কেবা তুমি,
 তুমি জান আমি কে তোমার । কিন্তু আমি
 চিরদিন অগ্নিমন্ড্রে বেখেছি স্বরণে—
 সেই দিন । যে বিষম দুদিনে আমার
 হ'য়েছিল হস্তিনায় ঘৃণিত-লাঞ্ছনা ।
 কিন্তু সে দুদিন কি অপূর্ব স্বস্তি শুভ
 এনেছিল ঘনকৃষ্ণ উষ্ণাঘে বাঁধিয়া ।
 হে মধুসূদন, সেই দিন ক'রে গেছে,
 তোমাতে আমাতে কি মধুর, কি প্রাণদ-
 সম্বন্ধ স্থাপন ! হেঁটমুণ্ডে পঞ্চ স্বামী,
 হেঁটমুণ্ডে ভীষ্ম, দ্রোণ, কৃপ ।
 পাপহস্তে বজ্রাঙ্কলে তীব্র আকর্ষণ,
 উৎফুল্ল নয়নে চেয়ে পাপ দুর্ঘোষন,
 পার্শ্বে তার দুষ্টবুদ্ধি কর্ণ ও শকুনি ।
 কর্ণের সে কুটিল নয়ন
 বলিতে লাগিল যেন বিষাক্ত ভাষায়,
 “কি পাঞ্চালি, সূতপুত্রে বরিবে না ব'লে
 দস্ত যে দেখালে স্বয়ম্বর সভাস্থলে,
 হে পঞ্চ স্বামীর আদরিণী,

সে দস্ত কোথায় রেখে এলে ?
 আজ তুমি কোথা ?
 কোন্ দাসে করিতে এসেছ ভাগ্যবান্ ?”
 তখন চাহিয়া দেখি, সব শূন্য—
 মৰ্ক দৃশ্য পলায়েছে দৃষ্টিসীমা হ’তে ।
 পঞ্চ সিংহ দেহরক্ষী যার,
 সে আজ জগতে অসহায়—একাকিনী !

কৃষ্ণ । সে দারুণ ইতিহাস পুনরুচ্চারণে
 কর না কাতর মোরে প্রিয়সখী ! শুনে
 কৌরব-বিনাশে, উত্তেজনা বশে
 সুদর্শনে তাত দিতে হয় অভিলাষ ।

দ্রৌপদী । তাই যে আমার বাঞ্ছা সখা ।
 পূর্ব ইতিহাস কথা তুলে, তোমারে যে
 কাতর করিতে আমি চাই ।
 সেই দিনে সম্বন্ধ নির্ণয়—
 তুমি কেবা, আমি কে তোমার ।
 ডাকিলাম—হে বিশ্ব-আত্মন, এসো এসো,
 রক্ষা কর, কৌরব-সাগরে ডুবে মরি—
 কেহ আসিল না । এস কৃষ্ণ জনাৰ্দন,—
 আসিবার চিহ্ন আসিল না ।
 এসো এসো হে গোপীবল্লভ !
 কেবা যেন আসিতে আসিতে ফিরে গেল !
 শ্যাম-প্রেম বিলাসিনী—
 শুদ্ধ শ্যাম-সুখের কামিনী
 গোপী আমি নহি যে কেশব !

আমারে অপরিচিত দেখে বুঝি সখা.
 আসিতে আসিতে এলোনা সে ।
 ডাকিলাম, দীনবন্ধু বিপদ-বারণ ।
 আরো তীব্র আকর্ষণ—
 বস্ত্রাঞ্চল চ'লে গেলো ছুরাত্মার করে ।
 অবশিষ্টে মাত্র মোর লজ্জা-আবরণ ।
 ডাকিলাম, কোথা আছ লজ্জা নিবারণ ?
 পূর্বমত, কেহ না আসিল বাসুদেব !
 ত্রস্ত হ'ল কটির বসন,
 গেল লজ্জা, গেল ধর্ম, সতীত্ব মর্যাদা
 গেল !—দুই করে তখন আবারি' চক্ষু
 উঠিল ডাকিয়া তারস্বরে,
 এলে না—এলে না তুমি, হে পাণ্ডব-সখা ?
 “এই যে এসেছি সখি,
 চেয়ে দেখ এই যে সম্মুখে আমি ।”
 চেয়ে দেখি সত্য—এই হাসি, এই আঁধি,
 এই গণ্ড, এইমত তাহে অশ্রধার ।
 কিন্তু শাস্ত, কি সৌম্য, মধুর !
 অত মধু সহিতে নারিল দৃষ্টি মোর,
 আবার সে লুকাইল পলক ভিতরে ।
 ফিরিল বাহুজ্ঞান, চেয়ে দেখি—
 স্তূপাকার নানাবর্ণ বসনের রাশি
 আচ্ছন্ন ক'রেছে সভাস্থল ।
 এখন বুঝি কৃষ্ণে, তোমারি নিশ্বাস—
 সন্ধির সকল চেষ্টা ক'রেছে নিষ্ফল ।

কৃষ্ণ ।

শ্রোপদী । নিশ্বাস—নিশ্বাস—সত্যই ব'লেছ সখা,
 অগ্নি-শৈল-জ্বালাভরা আমার নিশ্বাস !
 বুঝিতে কি পার নাই জনাৰ্দ্দিন,
 রুদ্রক্রোধে উন্মত্তের মত সে নিশ্বাস
 এখনো ভ্রমিছে সভাস্থলে ?
 তারি স্পর্শভয়ে সখা তোমার বিরাট
 কোন্ বনে । বরাট গহ্বরে লুকায়েছে ।

কৃষ্ণ । এখন বুঝিছ সখি,
 সৰ্বদোষ-পরিমুক্ত ধৰ্ম্মমূর্তি রাজা
 এত যে করিল চেষ্টা । নরস্তু হইতে
 জাতিবধে, কোন্ শাক্ত সে সমস্ত দণ্ড
 ক'রে দিল । বিধাতা সহিতে পারে—
 দানব-মানব কৃত সৰ্ব উপদ্রব,
 সহিতে পারে না গুণ—অনাথ ক্রন্দন,
 অনশনে জাতির মরণ,
 আর পারে না পারে না—কোনমতে—
 কাষো, বাক্যে, কল্পনায় নারীর লাঞ্ছনা ।

অৰ্জুনের প্রবেশ

অৰ্জুন । একি ! নারী সঙ্কে নিরালায়
 এখনো এত কি মৰ্ম্মকথা !
 চ'লে গেছে শেষ অক্ষৌহিণী, অতিমহু
 অবশিষ্ট ছিল, পঞ্চভ্রাতা সঙ্কে ল'য়ে,
 লইয়া বাজার আশীর্বাদ, ক্ষণপূর্বে

সেও গেল চ'লে । সৰ্ব-অবশিষ্ট
 তুমি আর আমি । ধৃষ্টদ্যুম্ন সৰ্ব সেনাপতি,
 তথাপি আদেশ—'আমাকে হইতে হবে
 বাহিনীর সৰ্বপ্রান্তে জাগ্রত প্রহরী ।
 চ'লে এসো, চ'লে এসো । যখন আসিবে
 ফিরে পাণ্ডবে করিয়া জয়দান
 অবশিষ্ট মৰ্ম্মকথা নিজেনে বসিয়া
 শুনাইও গ্রাণের সখীরে । যাজ্ঞসেনী,
 রাজার ইচ্ছায় তোমারে জানাই আমি,
 যতদিন মহারণ নাহি হয় শেষ,
 ততদিন দাস দাসী ল'য়ে,
 এই উপপ্লব্য নগর-প্রাসাদে ক'র অবস্থান ।

দ্রৌপদী । সমাচার ?

কৃষ্ণ । যবে যোগ্য হবে শুনাইতে
 হেথায় বাসিয়া সমস্ত খনিবে সখি ।

অৰ্জুন । রণস্থল দেখিতে বাসনা আছে ?

কৃষ্ণ । সখা ! সখী হইয়া আমি বলি—আছে ।

অৰ্জুন । ভাল, কর সঞ্জে যেইদিন
 হইবে দৈবত বৃদ্ধ মোর, সেইদিন
 সখা এসে রাজার শিবিরে
 তোমারে লইয়া যাবে, পাঞ্চাল-নন্দিনী ।

যুধিষ্ঠিরের প্রবেশ

যুধি । ধনঞ্জয় (সকলে সমভ্রমে দাঁড়াইল)

অৰ্জুন । মহারাজ !

- যুধি । এই যে এই যে—তুমিও এখানে কৃষ্ণ আছ ?
- কৃষ্ণ । কিবা আজ্ঞা মহারাজ ?
- যুধি । স্থনিপুণ চর পাঠিয়েছিলাম আমি
কৌরব সৈন্তের মধ্যে । অগ্ন প্রাতঃকালে
সংবাদ বহন করি' ফিরেছে তাহারা ।
- কৃষ্ণ । কি সংবাদ মহারাজ ?
- যুধি । ভীতিকর ।
- অর্জুন । কেশবে বলুন মহারাজ ।
- যুধি । প্রশ্ন করেছিল দুয়োধন পিতামহে,
দ্রোণাচাৰ্য্যে, কৃপাচাৰ্য্যে, আচাৰ্য্য নন্দনে,
সর্বশেষে কর্ণে—করিতে পারেন তাঁরা
কতদিনে আমার সমস্ত সৈন্ত নাশ ।
ভীষ্ম বলেছেন একমাসে । গুরু দ্রোণ
ওই একমাসে । দুই মাসে কৃপ ।
আচাৰ্য্য-নন্দন —দশ দিনে । কিন্তু কৃষ্ণ,
বলেছে রাধেয়, আমি পারি পাঁচ দিনে ।
- অর্জুন । মিথ্যা কহে নাই মহারাজ ।
- যুধি । বাস্তব ?
- কৃষ্ণ । মিথ্যা কহে নাই মহারাজ ।
- যুধি । পাঁচ দিনে ?
- কৃষ্ণ । দৈব যদি না হয় বিরূপ,
পারে এক দিনে । মহারাজ, পাঁচ দিনে
কি হেতু বলিল কর্ণ বুঝিতে না পারি ।
- অর্জুন । শিক্ষিতান্ন, চিত্রযোধী মহাত্মা সকলে,
কার্পণ্য যতপি তাঁরা না করেন রণে.

- পারেন নাশিতে সৈন্য নিদ্রিষ্ট সময়ে
কিস্ত একথা শুনিয়া
বিচিন্তিত কি হেতু আপনি ধর্মরাজ ?
যুধি । তুমি পার কত দিনে ?
অর্জুন । কেশব যত্নপি ইচ্ছা করে,
একদণ্ডে পারি মহারাজ । তাই কেন,
চক্ষুর নিমিষে । শুধু কি কৌরব-সৈন্য ?
স্বাবরজঙ্গমাত্মক ত্রিলোক নাশিতে পারি !
সত্য—সত্য—জনার্দন যদি ইচ্ছা করে—
ভূত, ভবিষ্যৎ, বর্তমান
ত্রিকাল বিনাশে, হে আর্ঘ্য, সমর্থ আমি ।
কৃষ্ণ । সখা মিথ্যা বহে নাই, মহারাজ ।
অর্জুন । শঙ্কর—কিরাতবেশী—ধনুযুদ্ধ কালে,
মোর প্রতি সঙ্কষ্ট হইয়া এক শস্ত্র
দিয়াছেন মোরে জগতে ভীষণতম ।
যুগান্ত সময়ে, যেইক্ষণ
সর্কভূত সংহারের হয় প্রয়োজন,
কবিতেন সেই অস্ত্র প্রয়োগ সংহারী !
জানেন না পিতামহ, জানেন না গুরু,
মনে হয়, সেই অস্ত্র-কথা—
স্বতপুত্র স্বপ্নেও শোনেনি মহারাজ ।
যুধি । ষাও ধনঞ্জয়, বাসুদেবে সঙ্গে ল'য়ে—
দ্রৌপদী । অধীনার নিবেদন, আপনারে স্বরি'
নিশ্চিন্ত হউন মহারাজ ।
ধর্মরাজে ধর্ম উপদেশ—

দুরন্ত ক্ষিপ্ততা। তথাপি আদেশ ল'য়ে
এক কথা চাই নিবেদিতে।

যুধি। বল কৃষ্ণে।

দ্রৌপদী। একথা! আমার নয়. ধর্মের তত্ত্বজ্ঞ
দেবসির কথা। ভাগ্যবশে গুনিয়াছি।
বলিয়াছিলেন ঋষিরাও, হোক তোমাদের জয়—
পাণ্ডুর তনয়, বাঁহাদের পক্ষে জনার্দন।
'যখানে কৃষ্ণের স্থিতি, সেখানে ধর্মের স্থিতি।
যেখানে ধর্মের স্থিতি, জয় সেঃ স্থানে।'

অর্জুন। কতদিনে পারি আমি নাশিতে কোরবে,
আমারেই কি হেতু এ প্রশ্ন মহারাজ ?
এ প্রশ্ন করুন আপনাকে। আপনি কি
আছেন দাঁড়ায়ে আমার পৌরুষে দিয়া
ভর ? প্রকৃত ধর্মের মূর্তি হে নরপ্রধান,
আপনি যে নিজ বাঁধা বলে স্বর্গ, মর্ত্য,
রসাতল চক্ষুর নিমেষে,
উৎসন্ন করিতে শক্তিমান !

যুধি। ভীতি-অপগত ধনঞ্জয়।

অর্জুন। ওই শান্ত করুণ দর্শন কখনো যত্নপি,
মহারাজ, পড়ে কোনো ভাগ্যহীন 'পরে,
তথান করিতে হবে তারে
জীবনের আশা পরিত্যাগ।

কৃষ্ণ। আমারও ওই কথা মহারাজ। আমি
আরো বলি, সে যদি অমর হয়, ওই কৃষ্ণ
দৃষ্টির প্রহারে তারেও মরিতে হবে।

যুধি । নিশ্চিন্ত হয়েছি ভ্রাতঃ !

প্রসন্নমোহিত

দ্রৌপদী । আপনি নিশ্চিন্ত ।

দাসীয়ে নিশ্চিন্ত করি' যান মহারাজ ।

যুধি । কিরূপে করিব যাজ্ঞসেনী ?

দ্রৌপদী । একবার ক্রোধ, গ্রাধা ক্রোধ—কর রাজা,

ওই সব ছুরায়া উপরে ।

যুধিষ্ঠির মুছ হাসিয়া চিন্তে— -দ্রৌপদী পপবোর কণন

দ্রৌপদী । তবে রাজা আমার উপরে ।

যুধি । কি হেতু পাঞ্চালী ?

দ্রৌপদী । আছে সাক্ষী বৃকোদর—মিথ্যা নহে,

ধর্মরাজ, কতবার অসাক্ষাতে,

কৃত্যাক্য প্রয়োগ করেছি আপনারে ।

একবার হীন জয়দ্রথ-অপমানে,

একবার কৌচকের নীচ আক্রমণে,

কতবার, এক আর বলিব মহারাজ,

যতবার মর্যাদায় পেয়েছি আঘাত—

ততবার মনে, বাক্যে স্তম্ভীত্র ভাষণ

এ অপূর্ব ধর্মে আপনার

হে রাজন্, দিয়েছি ধিকার ।

তাই বলি, ধর্ম-অবতার দয়া করি'

করুন—করুন ক্রোধ, ভিক্ষা এ আমার --

একটি বারের তরে, সর্বভাবে

আপনার অযোগ্যা এ জায়ার উপরে ।

যুধি । ক্রোধ যদি করি, প্রথম করিতে হয়

আমারি উপরে যাজ্ঞসেনী । রাজধর্ম,
 ক্ষত্রধর্ম করিতে পালন প্রতিবন্দী
 রাজার আস্থানে, ক'রেছিন্তু দ্যুতরণ ।
 পরাস্ত হইয়া যুদ্ধে হারায়েছিলাম,
 কৃষ্ণে, সর্বস্ব আমার । সে সর্বস্ব মধ্যে ছিল—
 প্রাণাধিক চারিভ্রাতা,
 আর ছিলে সেই পঞ্চ প্রাণের বন্ধনী,
 ধর্মরাজ্য-প্রাণের মূল উপাদান,
 মূলভিত্তি, মূলশক্তি—তুমি । দ্যুতরণে
 আমিই ক'রেছি কৃষ্ণে তোমার লাঞ্ছনা ।
 যদি বল যাজ্ঞসেনী
 এ পঞ্চ প্রাণের তমি নহ গো বন্ধনী,
 আছে তব সখা বাসুদেব,
 আর তার প্রিয়সখা—প্রিয় ধনঞ্জয়—
 এই দুই প্রিয় হ'তে প্রিয়ের সম্মুখে
 একবার ক্রোধ করি নিজের উপরে ।

দ্রৌপদী । (পদস্পর্শ) মহারাঞ্জ, জ্ঞানহীনা, মতিহীনা—
 সত্যই অযোগ্যা আপনার ।

যাধি । ওই দেখ কশকের আঁগি ছল-ছল,
 ওই দেখ বিবর্ণ হ'য়েছে ধনঞ্জয় ।

কৃষ্ণার্জুন দু'টির কল্যাণে

ক্রোধ যে করিতে আমি পারিনা পাঞ্চালী । প্রশ্নান

অর্জুন ।

যুদ্ধে !

কি কাণ্ড করিয়াছিলে বুঝেছ কি তুমি !

কৃষ্ণ ।

দখী, শীঘ্র যাও, রণ-অভিধান মুখে

শীঘ্র কর চণ্ডিকার পূজা আয়োজন—

সংস্কৃত হ'য়েছে ধর্ম ।

অর্জুন ।

ধর্ম যদি হন ক্রুদ্ধ নিজের উপরে,

তখনি ভাঙিয়া যাবে ধর্মকায়া তাঁর ।

সঙ্গে সঙ্গে হবে চূর্ণ—

কৃষ্ণকে দেখাইয়া

বাক্য যে আমার মুখে আসে না পাঞ্চালী—

এ চাক্র-নির্মাণ কায়া—এই স্তম্ভাম স্তম্ভর

ওহু—সঙ্গে সঙ্গে—চূর্ণ হ'য়ে যাবে ।

যে উদ্দেশ্যে কেশবের আগমন,

হ'য়ে যাবে মুহূর্ত্তে নিষ্ফল ।

ক্রোধদী । হে মধুসূদন ।

কৃষ্ণ । হাত ধর সখি !

দ্বিতীয় দৃশ্য

শিবির-কক্ষ

কর্ণ

কর্ণ ।

পারিলে না তুমি, যে কার্য্য তোমার পক্ষে

কেবল সম্ভব—অর্জুনের পরাভব—

সেই কার্য্য কোনমতে পারিলে না তুমি ।

হে মহান্, সত্যপূর্ণ প্রচেষ্টা তোমার,

তোমার দেবতা-ত্রাস অস্ত্রের প্রহার,

সমস্ত আদর হ'ল অর্জুনের কাছে ।

বাৎসল্য তোমার অতি তীক্ষ্ণ অস্ত্রমুখে

তোমারেও যেন লুকাইয়া,
 আঘাতের ছলে, শুধুই করিল যেন
 গাণ্ডীবীর গণ্ডস্থলে অজস্র চূষন ।
 খার তুমি ? হে বিশ্বে অজেয় মহাবীর,
 এক ক্ষুদ্র বালকের পুষ্পের প্রহারে
 আনন্দে হইলে যেন শরণযাশায়ী ।
 যাক্—যুদ্ধ-নাম অভিনয়ে
 পড়েছে প্রথম যবনিকা । এইবারে
 দ্রোণাচাৰ্য্য । একদিকে বান্ধকো, দামছে
 নিত্য মৃত্যুকামী দ্বিজ, অন্ত্যাদিকে
 পুত্র হাতে প্রিয়, তীব্র তেজস্বী ক্ষত্রিয় ।
 এবারে দ্বিতীয় যবনিকা । মধ্যে তার
 রঙ্গমঞ্চ-ভরা শুদ্ধমাত্র কোরবের
 উত্তপ্ত নিশ্বাস । তারপর ? ভীষ্ম যাহা
 পারিল না, দ্রোণ যাহা পারিবে না,
 সেই কাৰ্য্য—*জ্ঞান-বিনাশ—আমি কি পারিব
 নিশ্চয় পারিব । সেখানে মমতা শুধু
 কল্পনার—দ্রোণাচাৰ্য্য গুরু, দেবব্রত
 পিতামহ-ভাতা । এখানে মমতা হায়,
 বিধাতা দিয়াছে বেধে রক্তের বন্ধনে !
 তথাপি পারিব । কেন না পারিব ? হীন—
 অতি হীন সূতপুত্র রাধেয় যে আমি ।
 এই যে বাধয়া এলু সপ্তরথী মিলে,
 অর্জুনের সর্বশ্নেহাধার অভিমত্যা ।
 ভূমিস্থ ষোড়শকলা-পূর্ণ শশধর,

শৌর্য্যে, তেজে গাণ্ডীবী হইতে গরীয়ান—
 এইত সে মধুর বালকে, অসঙ্কোচে
 করিয়া আসিহু ধরাশায়ী ।
 পুত্রে যদি বধিতে পারিহু,
 কেন না পারিব আমি বধিতে পিতারে ?
 নিশ্চয় পারিব । কেদা সে অর্জুন ? সে যে
 রাজপুত্র—অভিজাত । আমি হীন জাতি—
 তার সঙ্গে কি সম্বন্ধ ? নিশ্চয়—নিশ্চয়—
 নিশ্চয় বধিব আমি তারে । শুন ওগো
 বাসবপ্রদত্তা শক্তি—এক বিঘাভিনী ।
 তুমি যদি কাব্যকালে, আমাবে না কর
 প্রণারণা, তোমারি সাহায্য ল'য়ে
 নিশ্চয়, নিশ্চয় আমি বধিব অর্জুনে ।

পদ্মাবতীর প্রবেশ

পদ্মা । আবার যে ধনুঃশর হাতে ? নিশাকালে
 আবার হইল নাকি যুদ্ধ প্রয়োজন ?

কর্ণ । স্নানিলে না কোলাহল—
 ছুটে আসে ভীমোচ্ছ্বাসে রণক্ষেত্র হ'তে ?

পদ্মা । কে করিল প্রিয়তম ? অভিমন্যু-বধকালে
 কোরব ? পাণ্ডব ? অভিমন্যু-বধকালে
 শুনেছিহু একবার কোরব-উল্লাস ।

বাত্যাক্কুর সাগরের মত—আত্মহারা,
 কি উচ্চ—কি মত্ত কোলাহল ! তারপর,
 আজি সঙ্ক্যাকালে । শুনে মনে হ'ল, যেন
 উঠিল পাণ্ডবপক্ষ হ'তে । কিন্তু শুনে

বুঝিতে নারিনু, কাহারো করিল,
কেন বা করিল। দেখিলাম মুখ তব
বড়ই গভীর। ভয়ে আমি জিজ্ঞাসিতে
পারি নাই রাজা।

কর্ণ। পাণ্ডবের সে উল্লাস।

পদ্মা। কি হেতু?

কর্ণ। মরিয়াছে জয়দ্রথ।

পদ্মা। তার বধে—

এমন উল্লাস করিতে পারিল তারা?
শ্রেষ্ঠ রত্ন বিনিময়ে, ওই হীন, ওই
নীচ, ওই পশু-সম ক্ষত্রিয়ের প্রাণ—
উল্লাস আসিল পাণ্ডবের? তবে বুঝি
রোদন শুনেছি?

কর্ণ। না, উল্লাস শুনেছি। তবে জয়দ্রথ-বধে
নয়, জীবন বক্ষাস অর্জুনের।

পদ্মা। কিরূপ, কিরূপ প্রিয়তম?

এত বড় বীর জয়দ্রথ, যার যুদ্ধে
বিপন্ন হইয়াছিল অর্জুনের প্রাণ?

কর্ণ। তার সঙ্গে যুদ্ধে নয়, নিজেই গাণ্ডীবী—

বিপন্ন করিয়াছিল আপনাব প্রাণ।

প্রিয় পুত্ররত্ন-শোকে অতি মত্ততায়
করেছিল পণ—“সূর্যাস্তের পূর্বে যদি
জয়দ্রথে বধিতে না পারি, যেথা হবে
অস্ত সূর্য, সেথা দাঁড়াইয়া অগ্নি-কুণ্ডে
করিব প্রবেশ।”

- পদ্মা । বঝেছি রাজন্, জয়দ্রথ-জীবন-বিনাশে
পাণ্ডবের আজি, সর্বশক্তি সংগ্রহের
হ'য়েছিল প্রয়োজন ।
- কর্ণ । তা'তেও হ'ত না পদ্মাবতী । সূচীব্যহ—
আচার্যের অদ্ভুত রচনা, তার মধ্যে
লুকায়িত, অষ্ট দ্বারে দিকপাল সম
অষ্ট-সেনানা-রক্ষিত জয়দ্রথ ।
প্রাণপণ ক'রে চারি ধারে সর্ব-সৈন্য-
দুভেদ্য—প্রাচার । উদ্দেশ্য—সন্ধান তার
দিবা মধ্যে কোন মতে না পায় পাণ্ডব ।
- পদ্মা । সেই জয়দ্রথ হ'ল হত ?
- কর্ণ । সেই জয়দ্রথ হ'ল হত ।
অর্জুনের বিনাশের এমন প্রকৃষ্ট
আয়োজন, আর কোনোদিন হয় নাই,
হইবে না, হইতে পারে না পদ্মাবতী ।
সিকুরাজে অশেষিতে দেবতা আসিত
যদি, দেবতা পারিত না একদিনে ।
তারপর যুদ্ধ । তারপর যদি পারে,
বিনাশ তাহার । সেই জয়দ্রথ হ'ল হত ।
- পদ্মা । কেমন করিয়া, বলিতে কি আছে বাধা ?
- কর্ণ । (হাস্য) বিলক্ষণ বাধা । আমি বলি, আর,
মাষ্টাঙ্গ প্রণত হ'য়ে তুমি বাহুদেবে,—
'নারায়ণ নারায়ণ' বলে বারংবার
ভূমিতে করিতে থাক মস্তক প্রহাব ।
- পদ্মা । করিব না, বলুন আপনি মহাশয় !

কর্ণ ।

সারাদিন হ'ল যুদ্ধ—বাহভেদ করি'
 আচার্য্যকে করি' অতিক্রম, যে সময়
 বাহ-কেন্দ্রে উপস্থিত হ'ল ধনঞ্জয়,
 সে সময় দণ্ডমাত্র বেলা অবশেষ ।
 যেখানে রয়েছে জয়দ্রথ, জগতের
 কোন শক্তি সেই স্বল্প কাল ব্যবধানে,
 তার কাছে ল'য়ে যেতে নারিত অজ্ঞানে ।
 আনন্দে উৎফুল্ল হ'ল রাজা দুর্যোধন,
 উৎফুল্ল হইল দুঃশাসন । মত্তভাবে
 করিতে লাগিল নৃত্য মাতুল শকুনি ।
 দেখিতে দেখিতে এলো সন্ধ্যা । সূর্য্য যেন
 অস্ত গেল । আমি দেখিয়াছি, দেখেছেন
 দ্রোণাচার্য্য । কৃপাচার্য্য করেছে দর্শন ।
 তাই কেন, সমস্ত কৌরব দেখিয়াছে—
 লোহিতবরণ দিনঃবিধী ধীরে ধীরে
 অস্তাচল-অস্তুরালে ঢাকিল বদন ।
 কাঁদিয়া উঠিল দ্রোণ, কাঁদিয়া উঠিল
 কৃপ । মনে হয়, আমারো আসিল চোখে
 জল । মনে হয়, পদ্মাবতী, শোকে ফোঁতে
 আমিও হইলু অশ্রুহারী । বন-মধ্যে
 একাকিনী মতিয়সী পাণ্ডব-মহিষী
 আতিথ্য লইতে গিয়ে যেই নরাদম,
 অসম্মোচে ক'রেছিল তারে অক্রমণ,
 সেই পশু—তার বধে অশক্ত হইয়া
 সত্যই কি অনলে পুড়িবে আজি বাসুদেব-

প্রিয়সখা—নরশ্রেষ্ঠ বীর ধনঞ্জয় !
কিন্তু সত্য, পদ্মাবতী, সাক্ষী কোটা নর—
এলো সন্ধ্যা । বহুকুণ্ডে করিবে প্রবেশ
ধনঞ্জয়, সকলে দেখিতে গেলো ছুটে ।
গেলো সূর্যোদয়, সূর্যাসন । হতভাগ্য
সিকুরাজ কোতূহল নারিল বারিতে ।
অর্জুনের মরণ দেখিতে সেও গেলো ছুটে ।

পদ্মা ।

তুমি ?

কর্ণ ।

ছি ।—এ তোমার জিজ্ঞাসা পদ্মাবতী ।

পদ্মাবতী পদধারণ করিল

সমস্ত ভুবনে যুদ্ধক্ষেত্রে একমাত্র
প্রতিদ্বন্দ্বী যেন, আমি কি দেখিতে পারি
সেই শোচনীয় মৃত্যু তার ? কিন্তু, কিন্তু—
সাবধান পদ্মাবতী, বলিব আশ্চর্য্য
কথা, শুনে উতলা হয়ো না যেন ।

পদ্মা ।

বল, বল তুমি । অথবা তোমার ইচ্ছা ।

আমি আছি স্থির ।

কর্ণ ।

চারিদিকে উৎফুল্ল কৌরব—

উল্লাস-মত্ততা শুধু আঁখিতে বাঁধিয়া
অগ্নিকুণ্ডে ঘেরিয়া দাঁড়াল । কাল-হত
সিকুরাজ, নিঃসন্দেহ পার্থের মরণ
দেখিতে যেমন এলো কুণ্ডের সমীপে,
অমনি—আশ্চর্য্য—পুনঃ সূর্যের প্রকাশ !
আর কোথা যাবে সিকুরাজ ? সেই অষ্ট
দিকপাল সম অষ্ট রথীর সম্মুখে,

সবার সামর্থ্য করি' ভেদ,
ধনঞ্জয় জয়দ্রথে করিল বিনাশ ।

পদ্মা । অত্যাশ্চর্য্য কথা বটে !

কর্ণ । কেহ বলে—উদ্ধার প্রবাহ রাব-
রশ্মি-আগমন-পথ রোধ ক'রেছিল !
কেহ বলে—অস্তমুখে রাহু-আক্রমণ !
কিন্তু অনেকেই বলে, সূর্য্যে ঢেকেছিল
সুদর্শন ।

পদ্মা । আমিও তাহাই বাল প্রভু—
ঢেকেছিল সুদর্শন ।

কর্ণ । ঢাকুক, তথাপি
নর তোমার কেশব ! সত্য যতদিন,
নিজে নাহি উপলব্ধি করি, ততদিন,
বিধাতাও দিলে শাস্তি, মানব বলিব
বাসুদেবে । মানব, মানব—তবে রাণী,
মুক্তকণ্ঠে বাল আমি—অপূর্ক মানব !
ধরণীতে বিধাতার মর্কশ্রেষ্ঠ দান ।
সৃষ্টি হ'তে আজিও পয্যন্ত এমনটি
আসে নাই আর—এই পূর্ণ মানবতা ।

পদ্মা । তিনিই ত নারায়ণ ।

কর্ণ । বেশ প্রিয়তমে, তোমার সে নারায়ণে
প্রণাম করিয়া এবারে বিদায় যাচ আমি ।

পদ্মা । (সহাস্যে) ওকি নাথ ! নিজে সত্য না করি নির্ণয়,
শুধুমাত্র নারীর কথায়, তাঁরে
নারায়ণ বাল মস্তক করিলে অবনত !

- কর্ণ । প্রিয়তমে, এ প্রশ্নের উত্তর যতপি
হয় দিতে, পোহাইয়া যাবে রাত্রি ।
আজ যদি জীবন লইয়া ফিরে আসি,
শুনাইব কালি ।
- পদ্মা । একি কথা হে রাজন্ ।
- কর্ণ । শুনিলে না—কোলাহল ?—না—না, ওতো নহে
কোলাহল । ও যে আর্তনাদ ! শুন, ওই
পদ্মাবতী, কোরবের মরণ চীৎকার—
কুরুসৈন্য ছত্রভঙ্গ যেন !
- পদ্মা । সত্যই ত আর্তনাদ !
কেবা যেন মহারথী পড়েছে, ঝঞ্ঝার
মত, কোরব সৈন্যের মাঝে ! কে পড়িল
নবনাথ ? কার মহাশক্তি করিতেছে
বিহ্বল কোরবে ?
- কর্ণ । বুঝিতে নারিলে নারী ?
আপনি অর্জুন । বধ করি জয়দ্রথে,
তম নাই কিছুমাত্র ক্রোধের নির্বাণ
তার । তাই, মহাপ্রলয়ের মূর্তি ধরি',
কোরবের সৈন্য মধ্যে প্রবেশ ক'রেচে
ধনঞ্জয় । আর্তনাদ—আর্তনাদ । শুধু
মৃত্যু যেন কহিছে কাহিনী ! বুঝিচ না
পদ্মাবতী, বাহিনী মথিয়া ধনঞ্জয়
রণক্ষেত্রে খুঁজিছে আমারে ? রহ রাত্রি
অপেক্ষায় । থাকে যদি জীবন আমার,
প্রভাতে হইবে দেখা । ওকি পদ্মাবতী,

ওকি প্রিয়তমে, মরণেব আশঙ্কায়
 মোর, এইমত বিকল্প হইলে তুমি !
 ছি—ছি, ওকে কব পদ্মাবতী ! আমি কর্ণ,
 তুমি কর্ণ-জায়া, মূর্ত্তিমতী দয়া ! তুমি
 দানশক্তি রূপ ধরে করেছ আমার
 এই হৃদয় আশ্রয় । তোমার সেই ইষ্ট
 নারায়ণে—যদি আজ প্রাণ মোর দিই
 উপহার, তুমি কি সামাগ্রা নারী মত
 স্বামী-শোকে বিলুপ্তিতা হইবে ভূতলে ?
 না—না পদ্মাবতী! আমারে আশ্বাস দাও ।

পদ্মা । তোমার যে পরাজয়, কল্পনাগ আমি
 আনিতে পারি না প্রভু ।

কর্ণ । আনিতে পার না তুমি,
 আনিতে পারি না আমি । কিন্তু রাণী,
 নিয়তির কার্য্য, কোন কালে হয় নাই
 মানবের কল্পনা-চালিত । তাই বলি—
 শুনি বিস্মিত হয়ো না, বিপন্ন হয়ো না—
 যদি মরি আমি, হৃদয়ের সর্বজালা
 মুখের হাসির তলে রেখ লুকাইয়া ।
 আর, যদি মরে ধনঞ্জয়—পদ্মাবতী,
 অধিক সম্ভব তাহা । এই রাত্ৰিকালে
 সত্য যদি সেই আসি" থাকে রণস্থলে,
 জীবিত পার্থের মুখে আর প্রাতঃসূর্য্য
 করিবে না কিরণ বর্ষণ—থাক সঙ্গ
 জন্মদিন তার, থাক তার চারিধারে

দেবতা-প্রাকার । সত্য, এ আমার মিথ্যা
দস্ত নহে প্রিয়তমে !

পদ্মা ।

আর, যদি হন ধনঞ্জয় রণশায়ী ?

কর্ণ ।

বড়ই কঠিন সে উত্তর ! প্রতি শব্দ
তার মর্গভেদী ! তুমি নির্জনে বসিয়া,
দেবতা, মানবে লুকাইয়া, এমন কি
সন্তানে তোমার, অজস্র অশ্রু ধারা
দিয়ে কোন্তেয়ের করিও তর্পণ ।
বড় প্রহেলিকা---নহে প্রিয়তমে ?

পদ্মা ।

বড় প্রহেলিকা প্রিয়তম ।

কর্ণ ।

দেখিতেছ ?

অস্ত্র বাহির

পদ্মা ।

ও কি অদ্ভুত অস্ত্র ?

কর্ণ ।

নাম এক-বিঘাতিনী শক্তি, বাসব দিয়াছে
উপহার । অর্জুনের বধে এই শক্তি
সর্বস্ব আমার । যে দিন হইতে আমি
গ্রহণ ক'রেছি অস্ত্র, সেই দিন হ'তে
প্রতি রাত্রিকালে, মনে কার, পদ্মাবতী,
এই অস্ত্র সঙ্গে ল'য়ে যাব রণস্থলে,
বধিতে অর্জুনে । কিন্তু কি আশ্চর্য্য রাণী,
শয্যাভ্যাগ কালে যেমনি করিতে যাঠ
ইষ্টের স্মরণ, অমনি কেমন ক'রে
তোমার কেশব আসি' মন্থুখে দাঁড়ায় ।
নবীন-নীরদ-শ্যাম সেই আবরণে,
ইষ্ট দিবাকর পড়ে ঘেন, দূরে, দূরে—
সুদূর পশ্চাতে । অমনি এ অস্ত্র-কথা

মুছে খায় স্মৃতি হ'তে । আজ পাছে ভুলি,
 তাই পদ্মাবতী, আগে হ'তে এই অস্ত্র
 বক্ষের পঞ্জর সঙ্গে ক'রেছি বন্ধন ।
 কি দেখিছ চারিদিকে রাণী ? আজ আর
 তোমার কেশব আসিবে না ।
 যদি আসে, সখার মরণ তার
 নিরোধ করিতে পারিবে না ।

পদ্মা । অর্জুনের মৃত্যুর কল্পনা যতপি আনিল
 হাসি তব মুখে, তবে মরণে তাঁহার
 কাঁদিতে আদেশ কেন করিলে রাজন ?

কর্ণ । হাসি । যা দেখিলে প্রিয়তমে,
 এ হাসি আমার নয় । হাসিল নিয়তি
 আমার মুখেই মধ্য দিয়া !

পদ্মা । আবার সে প্রহেলিকা ।

কর্ণ । আর তোমা চলে না গোপন,
 বলিবার আর বুঝি হবে না আমারো
 অবসর । প্রিয়তমে, নিরুদ্ধ নিশ্বাসে
 শুন—ধনঞ্জয় দেবর তোমাব ।

পদ্মা । একি বল প্রিয়তম ।

উন্নত কি শ'লে তুমি ?

কর্ণ । বিমাতার গর্ভজাত নহে প্রিয়তমে,
 আমার মনুজ—সহোদর । দ্রৌপদীর
 মত, পাণ্ডুবাকু-স্মৃষা তুমি, সর্বশ্রেষ্ঠ
 সর্বজ্যেষ্ঠ পাণ্ডব-মহিষী ।

পদ্মা । নহ—নহ—নহ তুমি—

কর্ণ । কুন্তী-পুত্র আমি !

পদ্মাবতীর মুচ্ছিতবৎ ভূমিতে শয়ন, নেপথ্যে ঘুরে আর্তনাদ

কে আছ বাহিরে ? বৃষকেতু, বৎস বৃষকেতু !

বৃষকেতুর প্রবেশ

শীঘ্র কর মায়ের শুশ্রূষা ।

দুঃশাসনের প্রবেশ

দুঃশা ।

অঙ্গরাজ, অঙ্গরাজ !

কর্ণ নিস্তব্ধ হইতে ইঙ্গিত করিল

রজনী প্রভাতে, একটিও প্রাণী বৃষ্টি
না রহে জীবিত কোরবের । রণক্ষেত্রে
সাক্ষাৎ পশেছে বৃষ্টি কাল ।- একি একি ।

কর্ণ । অসুস্থ হ'য়েছে রাণী, চল দুঃশাসন,
ওদিকে দেখো না আর । আর্তনাদ শুনে,
অগ্রেই প্রস্তুত হ'য়ে দাঁড়ায়েছি আমি ।

দুঃশা । এ সঙ্কটে এসো পরিত্রাতা । জ্ঞানশূন্য
মহারাজ, বুদ্ধিহারা সর্ব সেনাপতি ।

কর্ণ । ভয় নাই ভাই, সত্য যদি কাল আসে,
অন্য রাত্রে এই হস্ত কালের সংহার ।

বৃষকেতু, মায়ের শুশ্রূষা কর । চল—

নিশ্চিন্তে আমার সঙ্গে চল দুঃশাসন ।

উভয়ের প্রস্থান

বৃষ । মা—মা !

পদ্মা । (উঠিয়া) হাঁরে বৃষকেতু, যাইবার কালে,
গিয়াছিল—কি তোরে বলিয়া জনার্দন ?

বৃষ । ব'লেছি ত তোমারে জননী !

পদ্মা । ভুলে গেছি, বল শুনি আর একবার ।

বৃষ । “সুন্দিতা মাতা তব, বৎস,
প্রবুদ্ধ ক’র না তাঁরে । জাগিবেন যবে
তিনি, বলিযো তাঁহারে, সাক্ষাৎ করিতে
সঙ্গে তাঁর, প্রতিশ্রুত রহিলাম আমি ।”

পদ্মা । তা’রে কি বলিয়া গেল ?

বৃষ । বলিলেন মোরে—

“ভগতে দাতার শ্রেষ্ঠ তোমার জনক,
দক্ষিণার লোভে আমি অতিথি হইলু
তাঁর ঘরে । রিক্ত হস্তে চলিষ্ণু ফিরিয়া ।
প্রতিশোধ ল’তে তাই শুন বৃষকেতু,
লইলাম তোমারে দক্ষিণা । আজি হ’তে
জনে রাখ, যেখানেই কর অবস্থান,
আমার—আমার বস্তু তুমি ।”

পদ্মা । প্রাণাধিক, এখনো কাঁপিছে অঙ্গ,
ল’য়ে চল মোরে, শয্যায় বসিয়া,
শুনাব তোমারে আমি এক গল্পকথা—
এক শ্রেষ্ঠ কুকৌর ।

তৃতীয় দৃশ্য

কুরুক্ষেত্র—একপাশ

দুর্যোধন ও দ্রোণ

দুর্যোধন । মূর্ত্তিমান ধনুর্ধর—আপনি থাকিতে
সেনাপতি, দুরন্ত রাক্ষস ঘটোৎকচ
আমার সমস্ত সৈন্য করিতে নিশ্চল ?

দ্রোণ । কি করিতে বল মহারাজ ?

দুর্যোধন । কি করিতে বলি আমি ?

হায়, কুক্ষণে করিয়াছিল,
আপনি ও পিতামহ হুই বৃদ্ধ 'পরে
সমস্ত—সমস্ত মোর শক্তির নির্ভর ।

দ্রোণ । ধিক্ দুর্যোধন, অথবা আমারে ধিক্,
দাসত্ব ক'রেছি কোরবের ।

দুর্যোধন পদ ধরিল

যাহা কেহ আনিতে পারে না কল্পনায়,
তোমার তৃষ্টির জন্ম তাহাও ক'রেছি
আমি । চক্রবাহু করিয়া রচনা—জালে
ঘিরে বধিয়াছি সিংহশিশু—তার
জনক হ'তে বুঝি, রাজা, বহুগুণে
শক্তিমান সে বালক অভিমত্যা । আর,
অণু দিবাভাগে, পূর্ণরূপে করিলাম
অর্জুনের বধের ব্যবস্থা । হতভাগা
জয়দ্রথ, আলোক-পিপাসী পতঙ্গের

মত, উন্নত ছুটিয়া স্বেচ্ছায় অনলে
দিল কাঁপ। পণ্ড হ'ল প্রয়াস আমার,
তব ভাগ্যদোষে রাজা।

হুঁয়ো। ক্ষমা—ক্ষমা, শুরু,
ঘটোংকচ-উপদ্রবে বুদ্ধিহীন আমি।
বলুন উপায়, নহে আজি রাত্রিশেষে
একটিও সৈন্য মোর রবে না জীবিত।
বলুন বলুন মহাত্মন, কি উপায়ে
সে রাক্ষসে কারি প্রাণহীন।

দ্রোণ। কামাচারী নিশাচর,
আগাদের রাত্রি তার দিন। কোথা হ'তে
কোথা যায়, কোথায় মিলায়—সুবিশাল
কুরুক্ষেত্রে অন্বেষণা তারে, বধ তার,
এ বৃদ্ধের পক্ষে সম্ভব কি মহারাজ ?

হুঁয়ো। বুঝিয়াছি। কিন্তু বুঝেও বুঝিতে আমি
নাহস করিতে নারি শুরু। তা'হলে কি
কৌরব নিশ্চল হবে ?

দ্রোণ। বুঝিয়াছি রাজা,
এ প্রশ্নের উদ্দেশ্য তোমার। পড়ে যদি,
হিড়িম্বা-নন্দন সম্মুখে আমার জেনো,
তখনি হইবে তার লীলা অবমান!
জানে সে আমারে। জানে—সম্মুখ-সংগ্রামে,
আমার বাণের মুখে, মায়াবী রাক্ষস
কোন মায়া লুকাতে নারিবে। সেই হেতু,
সযত্নে সে আমারে করিয়া পরিহার,

ঘুরিতেছে রণক্ষেত্রে আমি হ'তে দূরে,
দিক হ'তে দিগন্তরে ।

দুয়োধন মস্তকে হস্ত দিয়া বসিলেন

কি করিব রাজা,
আশ্রয় করিতে আমি পারি না তোমারে ।
যুদ্ধির নিরোধ ক'রেছে মোর পথ,
সঙ্গে তাঁর ভায় ও নকুল—সহদেব ।
বিনাশ অথবা রাজা পরাস্ত না করি'
চারিজনে, চোরমত আমি ত পারি না
যেতে, বাধতে সে হাঁড়িয়া-নন্দনে !

দুৰ্য্যো । আশা শেষ !

দ্রোণ । কেন ? সব রথী একত্র হইয়া—
আভয়-বধকালে খেয়ল ক'রেছ—
কর তারে আক্রমণ ।

দুৰ্য্যো । কারিয়াছিলাম গুরু ।

দ্রোণ । করহ আবার । পার্থ-পুত্র-বধ-
কালে ক'রেছিলে সপ্তবার, ভীম-পুত্র-
বধে কর তিনবার ।

দুৰ্য্যো । তারপর গুরু ?

দ্রোণ । তারপর ? সর্বশক্তি করিয়া সংগ্রহ
বাধিব সে ছুরায়া রাক্ষসে ।

দুৰ্য্যো । যদি গুরু, আসে সে সম্মুখে ।

যদি নাই আসে ? যদি সে ছুরায়া,
এখন যেমন, আপনার
বাণের প্রক্ষেপ হ'তে দূরে দূরে ফেরে ?

দ্রোণ । যেখানে দাঁড়ায়ে তুমি, এই স্থান হ'তে,
দিব্যাস্ত্র প্রয়োগে, তাহার সমস্ত
মায়া ক'রে দিব ভঙ্গে পরিণত, রাজা,
তখন যে কেহ, তুমিও, অক্লেণে তারে
পারিবে বধিতে ।

দুর্যো । গুরুদেব কৃপা—কৃপা—
এ অধম শিষ্যে ক'র কৃপা ।

দ্রোণ । কি বলিতে চাও ?

দুর্যো । (উঠিয়া) আর কি বলিব ? এখনি-- এখনি এই স্থান
হ'তে গুরু করুন সংহার ছরাত্মারে ।

দ্রোণ । কোনমতে পারি না তা' রাজা !
রণ-শাস্ত্র তত্তজ্ঞানে রাখি অভিমান,
নীতি-বিগহিত যুদ্ধ কর না প্রত্যাশা
আমার কাছে । যাও, বলিলাম যা তোমারে,
স্তিরচিত্তে করি' প্রণিধান, কর তাহা ।
তৃতীয় বারের যুদ্ধে, বিফল যতুপি
হও রাজা, পুনর্জন্ম রহিল আমার,
যে কোন উপায়ে তারে, করিব বিনাশ ।

দ্রোণের প্রস্থান—দুর্যোধনের উপবেশন

শকুনির প্রবেশ

শকুনি । ওই সব বক-ধাম্বিকের কথা শুনে,
নিরাশ কি হেতু দুর্যোধন । ওঠো—ওঠো ।
পাঁজিতে যাদের ধর্ম ভরা, কোন কালে
তাহাদের দিয়া হয় কি ভারতযুদ্ধ
জয় ? আজি অশ্রদ্ধা, কাল সে ভীষণ

মঘা—তেরোম্পর্শ তার পরদিন। ওই
 ওখানে দাঁড়ায়ে যুদ্ধিষ্ঠির, সেইখানে
 কোদাল-দস্ত-বারকরা ভীম—এই সব
 করি' অতিক্রম, কখন কি যেতে আছে—
 ভীমের সে ধর্মপত্নী হিড়িম্বা পুত্রের
 সঙ্গে করিতে সংগ্রাম! আরে ছি ছি, যদি
 জমিতাম, এই সব ভক্তবিটলগুলা,—
 আচাষা বামন, এ যুদ্ধে নায়ক হবে,
 তা'হলে কি বাপের সে কয়খানা হাড
 অতি তেজে মাটিতে নিক্ষেপ কার? নাও!
 ওঠো বৎস, সমস্ত তোমার চিন্তা-ভার
 আমার উপর দাও—আমি নিজে থাকি
 ব'সে, এইখানে গালে হাত দিয়া। শুধু
 চিন্তাবাগ ছুড়ে, এইখানে ব'সে ব'সে—
 সাত অক্ষৌহিনী, আর সক্রম-গাওব,
 এবং তাদের বংশ, যেখানে যে আছে—
 পাঠাব ধর্মের বাড়ী। ওঠো বৎস, ওঠো—
 আবার কিসের চিন্তা? করিয়া এসেছি
 সে দুরাশ্রা রাক্ষসের বধের ব্যবস্থা।

দুর্যো। সত্য হে মাতুল—সত্য? (উঠিলেন)

শকুনি। তুমি কি আমার
 রহস্যের বস্তু প্রিয়তম! আমিতেছে
 অঙ্গরাজ, সঙ্গে ল'য়ে একল্ল সে বাণ!

দুর্যো। নিশ্চিন্ত—নিশ্চিন্ত!

শকুনি। কিন্তু বৎস সাবধান,

পাঠিয়েছিলাম দুঃশাসনে । সত্যকথা—
 কাহারে করিতে হবে বধ—ব'লেছি
 অঙ্গরাজে করিতে গোপন । জান তুমি
 মঙ্গল তাহার, সেই একল সায়কে
 বধিবে সে ধনঞ্জয়ে । কথার কোশলে
 তাই, শিখায়ে দিয়েছি দুঃশাসনে, যেন
 কোনমতে প্রকাশ না করে তার কাছে
 হীন রাক্ষসের নাম । তাই বলি,
 সাবধান, আগে হ'তে ঘটোৎকচ-নামে
 নিরুৎসাহ ক'র না তাহারে ।

দুর্যো । বুঝিয়াছি, কিন্তু হে মাতুল, তারপর ?

শকুনি । (হাস্য) তারপর—

সে প্রশ্ন প্রভাতে—যদি এই রাত্রিকালে
 তুমি আমি বাঁচি । এখানে লুকায়ে আছি,
 ভেবেছি কি আছি তুমি, সে অর্ধ-রাক্ষস
 মায়াবীর দৃষ্টি-অগোচরে ? ওদিকের
 কাজ শেষ ক'রে ধারণে তোমার ক্ষম,
 কথাটা বুঝেছ দুর্যোধন ? ওই—ওই—
 আর্তনাদ যেন এইদিকে আসে ছুটে ।
 ওদিকের কাজ বুঝি—বুঝেছ, বুঝেছ—
 বৎস দুর্যোধন ! বুঝি কেন, আর্তনাদ
 ভেদ ক'রে ওই যে আসিছে হুঙ্কার—
 আর, বুঝি কেন, ওদিক নিঃশেষ—যাক্
 ভয় নাই—আসে কর্ণ—যাহা বলিবার
 বল তারে এইবার ।

কর্ণের প্রবেশ

কর্ণ । আসিয়াছি সখা ।

দুর্যো । সখা অঙ্গরাজ, দক্ষিণ বিপন্ন আজি ।
 রণ-যজ্ঞ আরম্ভ হইতে, একদিন
 একটি ক্ষণেবও তরে, এমন বিপদ
 আসে নাই কোরবের ।

কর্ণ । বুঝিয়াছি রাজা, বিপদ যে নিদাক্ষণ,
 ব'লেছে আমারে দুঃশাসন ।

দুর্যো । সবারে অভয় দাও সখা !

কর্ণ । সর্বঅস্ত্রে সজ্জিত হইয়া আসিয়াছি ।

দুর্যো । তথাপি অভয়—বল সখা, সে দুঃস্বপ্ন
 শক্রকে না করিয়া নিধন, ফিরিবে না ?

কর্ণ । কি হেতু তোমার কথা বুঝিতে না পারি
 আজ সখা ? স্পষ্ট বল, কাহারে বধিতে
 হবে ?

শকুনি । স্পষ্ট বল, স্পষ্ট বল দুর্যোধন । যে যেখানে
 আছে হে তোমার আপনার, সে সবার
 হতে আরো আপনার ওই মহামতি ।

দুর্যো । ঘটোৎকচে ।

কর্ণ । ঘটোৎকচে ! নহে—ধনঞ্জয় ?

দুর্যো । নহে ধনঞ্জয় ।

কর্ণ । মহারাজ,
 আমি যে তাহারি বধ লঙ্ঘন করিয়া
 পত্নীর নিকট হ'তে লয়েছি বিদায় !

দুর্যো । দুর্জয় সে রাক্ষসের তুলনায় তুচ্ছ

ধনঞ্জয়, তুচ্ছ ভীম, নগণা নগণ্য
অনু পাণ্ডবের রথী । ভীমার্জুনে নাহি
ভয়, আমিষ্ট তাদের সমর্থ করিতে
পরাজয় ।

কর্ণ । (ঈষৎ হাস্য করিয়া) চল মহারাজ ।

দুর্যো । চল, রক্ষা কর মোরে সখা ।

কর্ণ । এই যে প্রস্তুত রাজা !

তোমার তুষ্টির তরে সমস্ত দিয়াছি ।

অবশিষ্ট যা আছে আমার, তাহা আজি

নিঃশেষে তোমারে দিব দান । কর্ণ ও দুর্যোধনের প্রস্থান

শকুনি । (হাস্য) “নিঃশেষে তোমারে দিব দান ।” তাহ’লেই
এখন নিঃশেষ ফেলে বাচি । আজকের রাতটা ত কোন রকমে কাটুক,
তারপর কালকের চিন্তা কাল ।

বিকর্ণের প্রবেশ—তাহাকে দেখিয়া শকুনির

ভীতিবাক্যক অক্ষুট শব্দ

বিকর্ণ । ভয় নেই মামা, আমি বিকর্ণ ।

শকুনি । আরে রাম রাম, গেল কর্ণ, এলো বিকর্ণ । তুমি যে
এখানে হঠাৎ ? কি মনে ক’রে বৎস ?

বিকর্ণ । বিশেষ কিছু মনে ক’রে নয় মামা, তুমিও যেভাবে এখানে
উপস্থিত হ’য়েছ, আমিও সেইভাবে উপস্থিত—প্রাণভয়ে পলায়ন ।
দেখলুম এই পলায়ন ভিন্ন সেই ভীষণ রাক্ষসের হাত থেকে নিস্তার
পাবার অন্য কোনও উপায় নেই ।

শকুনি । যা ব’লেছ বৎস বিকর্ণ, আজ পর্য্যন্ত পৃথিবীতে আত্মরক্ষার
যত অস্ত্র আবিষ্কৃত হ’য়েছে, এই পলায়ন-অস্ত্রের তুল্য আর কোনটাই

নয়। তা—তা—হাঁ, দেখ বৎস বিকর্ণ, তোমাকে একটি কাজ ক'রতে হবে।

বিকর্ণ। বল মামা!

শকুনি। তুমি তোমার ভায়েদের মধ্যে সবার চেয়ে ধাত্মিক কিনা, তাই তোমাকে ব'লছি।

বিকর্ণ। বল।

শকুনি। উত্তম, তুমি একটু দূরে দাঁড়িয়ে প্রহরীর কাণ্ডা কর তো, আমি একবার নিশ্চিত হ'য়ে গভীর চিন্তা-মাগনে নিমগ্ন হই। তারপর তোমাকে ব'লছি।

বিকর্ণ। সেটা শিবিরে গিয়ে হও মামা। এখানে মগ্ন হ'লে সে হৃদান্ত রাক্ষস চুলের মুঠি ধ'রে তোমাকে ভাসিয়ে তুলবে। শুনলুম, সে তোমাকে অন্বেষণ ক'রছে।

শকুনি। সত্য? বিকর্ণ, একথাটাতে কি মিথ্যার কিঞ্চিৎ সংযোগ নেই?

বিকর্ণ। এ জীবন-সঙ্কটে মিথ্যা বলবার প্রয়োজন কি মামা!— শুনলুম, সে ব'লেছে, তুমি আর কর্ণ—এই দুইজন হ'তেই পাণ্ডবদের খত হৃদিশা। সুতরাং তোমাদের দুইজনকে বধ না করে সে যুদ্ধ হ'তে নিরস্ত হ'চ্ছে না।

শকুনি। তবেই ত গোলটা একটু বিশেষ চক্রাকায়েই বাধালে— সেই অসভ্য বর্কর অর্দ্ধ-রাক্ষস। তবে, বৎস! আগে কাকে?

বিকর্ণ। আগে তুমি, তারপর কর্ণ।

শকুনি। তাহ'লে আত্মরক্ষার অস্ত্রটা একটু দ্রুত ভাবেই প্রয়োগ ক'রতে হ'ল দেখছি।

বিকর্ণ। অত দ্রুত নয় মাতুল, অত দ্রুত নয়। আত্মরক্ষার এত আগ্রহ যে, আমাকে চোখের নিমেষেই ছুঁলে গেলে!

শকুনি । আরে এসো, তুমিও এসো । আমি প্রৌঢ়, তুমি যুবা ।
তার উপর আমি চিন্তাসাগরে ভাসমান । সত্যই যদি সে আমাকে
আগে হত্যা করবার প্রতিজ্ঞা ক'রে থাকে বিকর্ণ ?

বিকর্ণ । এতট যদি মৃত্যু-ভয়, তবে বাপের সেই ক'খানা হাড়ে এ
ভেল্কি লাগিয়ে দিয়েছিলে কেন মামা ?

শকুনি । হ'য়েছে—হ'য়েছে । দীর্ঘজীবী বিকর্ণ—দীর্ঘজীবী হও ! ওরে
ও কৌরব-কুল । নির্ভয়—নির্ভয় । কি স্মরণ করালি রেবিকর্ণ, কি ব'ললি।

বিকর্ণ । হঠাৎ এ বিপরীত উচ্ছ্বাস কি হেতু মামা ?

শকুনি । বাপের এই ক'খানা হাড়কে একেবারেই ভুলে গিয়েছিলুম
রে বিকর্ণ । চিন্তাসাগরে ভাসমান হ'য়েও এটাকে মনে আনতে
পারছিলুম না । শীঘ্র চল বৎস, দেখিয়ে দেবে আমাকে কোথায় কর্ণ ।
আবার এরই সাহায্যে ভারত-যুদ্ধ জয় । ঘটোৎকচকে তার বধ করতে
হবে না । সে যুধিষ্ঠিরকে বন্দী ক'রে দিক । আবার তার সঙ্গে ছ'-তিন-
নয় । অমনি যুদ্ধ-জয়—নির্ভয় নির্ভয়—আবার পাণ্ডবের দারো বৎসর ।
চ'লে এসো বিকর্ণ, চ'লে এসো ।

বিকর্ণ । এত দেখে জন্মিল না জ্ঞান ? হে মাতুল, এখনো এমন
মত্ত তুমি ?

শকুনি । উপদেশ রেখে ভক্তবিটেল-ভাগিনেয়, চ'লে এস-
চ'লে এস ।

চতুর্থ কৃশা

কুরুক্ষেত্র—অপরাংশ

যুধিষ্ঠির ও অর্জুন

অর্জুন । নিরুৎসাহ মত, রণে ভঙ্গ দিয়া
এই পথে কোথায়, কি হেতু মহারাজ ?
যুধি । রণে ভঙ্গ সত্য মনুষ্য । তোমারেই
করিতেছি অশ্রয়ণ । সমর অঙ্গনে
রাধাসুত প্রবেশ করিয়া একেবারে
দলিতেছে সমস্ত আমাৰ সৈন্য । ভ্রাতঃ
কিছুদূর অগ্রে গিয়া স্বচক্ষে দেখিয়া
এস, মধ্য পল্লবী কৰ্ণ, আজিকার
ভীম রজনীতে প্রথর ভাস্কর মত
দীপ্ত-মূৰ্ত্তি, দাঁড়ায়েছে আপনার তেজে ।
কখনো এরূপ মূৰ্ত্তি দেখি নাই তার ।
এত যে তাহার শক্তি, আনিতে পারিনি
কল্পনায় । ধৃষ্টদ্যুম্ন পরাজিত, ছাড়ি'
রণস্থল পলায়িত । সোমক পাঞ্চাল—
তোমার আত্মীয়গণ, বিদ্রাবিত হ'য়ে
কৰ্ণ-শরে, অনাথের মত করিতেছে
আৰ্ত্তনাদ । সত্য ভ্রাতঃ, অনাথের মত-
যেন এ ভগতে তারা আশ্রয় বিহীন ।
কখন যে করে কৰ্ণ শরের সন্ধান,
কখন নিষ্ফেপ—উদ্ধা-রাশি মত, তার

শরজাল, কখন যে কোথা হ'তে আসে,
 মৈত্র্যধ্বংস করি', আবার কোথায় যায়,
 কেহই বুঝিতে নাহি পারে । তাই আমি
 তোমারে বলিতে আসিয়াছি : কালোচিত
 কার্য্য ক'রে স্থির, সত্বর যাহাতে মরে
 রাধার নন্দন, শীঘ্র কর সম্পাদন ।

অর্জুন । কেশবে জিজ্ঞাসি', এখনি উত্তর আমি
 দিব মহারাজ । ততক্ষণ ফিরে যান
 রণস্থলে । সংগ্রামে নায়ক-শূন্য সেনা
 কার্য্যশূন্য জডসম—মরিবে নিষ্ঠুর
 ভাবে শত্রু-শরে । বিজয়ের মুখে হবে
 বিধ্বস্ত পাণ্ডব ।

যুধি । তোমার আশ্বাস-বাক্যে ফিরিলাম ভ্রাতঃ । প্রশ্নান

কৃষ্ণের প্রবেশ

অর্জুন । কেশব—কেশব ।—

কৃষ্ণ । সখা, দেখেছি—বুঝেছি । বুঝে,
 ছুটিয়া এসেছি নির্ভয় করিতে ধর্ম্মরাজে ।

নকুল ও সহদেবের প্রবেশ

যাও ভাই,
 তোমরা দু'জনে করিয়া জীবন পণ
 পৃষ্ঠরক্ষা করিবে রাজ্য ।

নকুল । (জনান্তিকে) সহদেব ! 'করিয়া জীবন পণ ?'

সহ । শুনিয়াছি ভাই

বুঝেছি, সকল যুদ্ধ আজি : নকুল ও সহদেবের প্রশ্নান

কৃষ্ণ । এইবারে সখা,
সর্বভাবে নিশ্চিত হইলু আমি ।

ভীমের প্রবেশ

দাদা বৃকোদর । রাক্ষস সে অলায়ুধ--
বধিয়া এসেছে তারে ?

ভীম । আমি বধি নাই বাসুদেব ।
বধিয়াছে তারে ঘটোৎকচ--
বধিয়া--সে রাক্ষসের হস্তে মৃত্যু হ'তে
আমারে করেছে রক্ষা ।

কৃষ্ণ । এক কথা দাদা,
তুমি কিংবা তোমার যন্তান । শক্তি তার
উদ্ভূত ত তোমা হতে । যাক, এইবারে
নিবেদন--বড়ই কি ক্লান্ত তুমি ?

ভীম । সব ক্লান্ত গেছে চলে,
তোমাতে দেখিয়া বাসুদেব ।

কৃষ্ণ । তবে মোর অনুরোধ -- গিয়াছে বালক
দুটি রাজার পশ্চাতে । সে সবার ভার,
দিতেছি মধ্যম দাদা আপনার পবে ।

ভীম । চলিলাম বাসুদেব ।

প্রস্থান

অর্জুন । এক জনাঙ্গিনী, কি করিলে ?
আমার যে কাপিতেছে প্রাণ । কর্ণ সঙ্গে
প্রতিদ্বন্দ্বী হ'তে পাঠাইলে ধর্মরাজে !

কৃষ্ণ । শুধু ধর্মরাজ কই সখা ?
তার সঙ্গে আর তিন ভ্রাতা ।

অর্জুন । বাসুদেব,

কখনো তোমার কার্যে করিনি সন্দেহ ।
তোমার ইচ্ছায় সখা, কার্য্য করি আমি ।
কৃষ্ণ । জানি আমি সখা । তুমিও শুনিয়া রাখ,
আজ তুমি একদিকে---আর পত্নী, পুত্র,
সমস্ত বান্ধব অণু দিকে---তুলাদণ্ডে
পরিমাণে, হে বিজয়, তুমি গুরুতর ।

সাত্যাকির প্রবেশ

সাত্যাকি । হে আর্ঘ্য, অদ্ভুত সংগ্রাম লীলা আজি ।
স্বচক্ষে দেখিয়া, উভয়ে সংবাদ দিতে
আসিতেছি আমি । কর্ণের অদ্ভুত যুদ্ধ—
কোথা হ'তে কেমনে আসিছে শররাজি,
ধারায় ধারায়—জলপ্রপাতের মত—
চলে যেন, বিদ্যুতের বেগে, ভাসাইয়া
পাণ্ডব-বাহিনী শ্রোত-মুখে । মথ্যে তার
পাডয়াছে বর্মরাজ ।

অর্জুন । কেশব—কেশব ।

কৃষ্ণ । অপেক্ষা—অপেক্ষা । হে সাত্যাকি, আঞ্জা নহে—
এ আমার গনবোধ । একদিন ছিল
দুর্য্যোধন, নব সখা প্রাণ হ'তে প্রিয়—
তোমার সে বালোর সখারে, বাণপুষ্প
উপহারে, তোমায়ে করিতে হবে আজি
এমন তর্পণ, যেন কোন মতে বাজা
শূর্য্যোদয় পূর্বে নাহি পারে স্তম্ভপুত্রে
সাহায্য করিতে । যাও, মুহূর্ত্ত সময়
না করি' অপেক্ষা হেথা, চ'লে যাও ।—

সাত্যকি । যথা আজ্ঞা । তবে চলিতে চলিতে পড়ে

গেল মনে প্রভু, স্থপুত্র আজি
ধনঞ্জয়ে কেবল করিছে অন্বেষণ ।

কৃষ্ণ । সে ব্যবস্থা শীঘ্রই করিব প্রিয়তম ।

যে রথের সারথ্য ল'য়েছি আমি,
শীঘ্রই সাত্যকি, সখার সে কপিধ্বজ
দেখা'বে স্বমুক্তি ওই বীরের সম্মুখে ।

সাত্যকির প্রশ্নান

অর্জুন । দেখাবে কেন, বাসুদেব

এখনি দেখাও । কর্ণে বধ করি'
ধর্মবাজে নিশ্চিত্ত করিয়া দিই আমি ।

কৃষ্ণ । ব্যাকুল হ'য়ো না সখা, সত্বর পূরাব

আমি সে ইচ্ছা তোমার ।—এসো বৎস
ঘটোৎকচ ।

ঘটোৎকচের প্রবেশ

ব্যাকুল দৃষ্টিতে আছি আমি

দাঁড়াইয়া তোমায় দেখার প্রতীক্ষায় ।

ঘটোৎক । (প্রণাম) আজ্ঞা করুন—দাস উপস্থিত । কোরব বেটাদেব
একদিক খেয়ে এসেছি । হ-অ-অ ।

কৃষ্ণ । দেখেছি বৎস ।

ঘটোৎক । আলায়ুধ বেটাকে মেরে বাবাকে রক্ষা ক'রেছি । হ-অ-
অ । সময়ে উপস্থিত না হ'লে বাবাকে বেটা মেরে ফেলেছিল ।

কৃষ্ণ । তাও শুনেছি ।

ঘটোৎক । হ-অ-অ ! তাও শুনেছেন ? এরই মধ্যে আপনাকে কে
শোনালো প্রভু ?

কৃষ্ণ । তোমার পিতাই শুনিয়েছেন বৎস ।

অর্জুন । পূর্ব হ'তেই তুমি প্রিয় আছ, তোমার পিতার জীবন রক্ষা ক'রে তুমি আমাদের প্রাণের বস্তু হ'লে বৎস ।

ঘটোৎ । হ-অ-অ । এইবারে শকুনি বেটাকে খুঁজে বেড়াচ্ছি । সেই বেটা হ'তেই বাবাদের যত কষ্ট ভোগ ক'রতে হ'য়েছে ।

কৃষ্ণ । শুধু শকুনি ? আর কৰ্ণ ?

ঘটোৎ । ঠিক ঠিক ! তা হ'লে শকুনিকে মেরে আবার কৰ্ণকে মারতে হবে । হ-অ-অ ।

কৃষ্ণ । না বৎস, আগে - নাশ ক'রতে হবে কৰ্ণকে । তোমার পিতৃ-পিতৃব্যদের দুর্দশার সেই হ'চ্ছে প্রধান কারণ ।

ঘটোৎ । বটে, বটে ।

কৃষ্ণ । শকুনিকে বধ ক'রতে তোমার মত বীরের প্রয়োজন হবে না । কৰ্ণকে যুদ্ধে আহ্বান করাই তোমার মত বীরের কর্তব্য । যদি তাকে বধ করতে পার, তা হ'লে তুমি জগতে শ্রেষ্ঠ বীর ব'লে গণ্য হবে ।

ঘটোৎ । বটে বটে ! তাহ'লে আগেই কৰ্ণ । হ-অ-অ ।

কৃষ্ণ । সর্বাগ্রেই কৰ্ণ । কৰ্ণ বিপুল তেজে আমাদের সৈন্য আক্রমণ ক'রেছে । যত শীঘ্র পার তার গতিরোধ কর । ঘটোৎকচ, আমি যা ব'লছি, তা শোন । এই যুদ্ধে তোমারই বিক্রম প্রকাশের উপযুক্ত সময় এসেছে ।

ঘটোৎকচ অর্জুনের মুখের দিকে চাহিল

অর্জুন । আমার মতের আর প্রতীক্ষা করিতে হবে না বৎস । সমুদয় পাণ্ডব-সৈন্য মধ্যে তুমি, সাত্যকি, আর ভীমসেন—এই তিন জনই আমার মতে এখন সর্ব-প্রধান । তাঁরা দুই জনেই আবদ্ধ ! তা হ'লে, যখন বাসুদেবের ইচ্ছা, তখন তুমিই এই রজনীতে কৰ্ণের সঙ্গে ধৈর্য যুদ্ধে প্রবৃত্ত হও ।

ঘটোৎ । কর্ণ-কর্ণ-কর্ণ । হ-অ-অ । শুনুন—আপনারা সন্তানের
 নিবেদন । আপনাদের বংশে জন্মেছি, তবু যখন শত্রুরা আমাকে রাক্ষস
 ভিন্ন বলে না, তখন আজকার যুদ্ধে রাক্ষসের মতই ব্যবহার ক'রবো ।
 যে বীর তাকেও মারব, যে ভয়ে হাত জোড় ক'রবে তাকেও মারব ।
 কাউকেও ছেড়ে দেবো না । আর কর্ণের সঙ্গে গমন যুদ্ধ ক'রবো যে,
 চিরকাল বড় বড় অক্ষরে আপনাদের পুঁথিতে আমার এই ঘটোৎকচ
 নামটি লেখা থাকবে । হ-অ-অ ।

প্রস্থান

অর্জুন । করিলে কি বাসুদেব ?

কৃষ্ণ । কর্তব্য বুঝেছি যাহা, করিয়াছি সখা
 এ ভারত-যুদ্ধে গৌরব করিতে লাভ
 সকলেরি আছে সম অধিকার সখা ।

অর্জুন । তারপর—আগি ?

কৃষ্ণ । আছে গুরুতর কাৰ্য্য তব । ভুলেছ কি
 মতিমান্ সেই দিন, রাজা দুৰ্য্যোধন—
 যে দিন তোমার সঙ্গে বরিতে আমারে
 বণযজ্ঞ, গিয়াছিল দ্বারকায় ?
 তুমি বরিয়া লইলে সারথিরে ।
 কুরুরাজ লইল আমার নারায়ণী
 সেনা । তারা আমারি শক্তিতে শক্তিমান—
 তুমি ভিন্ন অবধ্য অস্ত্রের ।

অর্জুন । চল, বুঝিয়াছি বাসুদেব ।

পঞ্চম দৃশ্য

কুরুক্ষেত্র—অপর পার্শ্ব

কর্ণ, সম্মুখে নতমস্তক উগরিষ্ঠ যুধিষ্ঠির, নকুল ও সহদেব—

দূরে নতমস্তকে একান্তে উপবিষ্ট ভীম

কর্ণ ।

সাথক ধারণ মোর শর-শরাসন,

যার ফলে চারিভ্রাতা সম্মুখে আমার ।

লজ্জা কি, লজ্জা কি সহদেব ? রণশাস্ত্রে

এখনো নিতান্ত অজ্ঞ তুমি । হে নকুল,

তুমি বা কি হেতু নতশির ?—মাথা তুলি’

দেখ মোরে । হে প্রচণ্ড অভিমানী, যদি

প্রকাশে জাগেহে লজ্জা আমারে করিতে

নমস্কার, কর মনে মনে । আর, কর

সেই সঙ্গে সূদৃঢ় ম’ল্ল, ওই তব

অল্ল বিচ্যা ল’য়ে, আর কভু দাড়াবে না

মম সম স্প্রবীণ যোদ্ধার সম্মুখে ।

হীন আভিজাত্য-গৰ্ব, কখন প্রকৃত

কার্যে কোন কালে সাহায্য করে না, এই

জ্ঞান ল’য়ে জ্যেষ্ঠের ধারিয়া কর, যাও,

হে বালক, শিবিরে ফিরিয়া । চ’লে যাও,

যুধিষ্ঠির, তোমারে দিলাম অব্যাহতি ।

আনন্দ হইত পূর্ণ, যদি ধনঞ্জয়

সাহস করিত আজি তোমাদের মত

করিতে আমার সঙ্গে দৈরথ-সংগ্রাম ।

আত্মপ্ৰাণকারী ভীক, আমার নির্দয়

হস্তে নিধনের ভয়ে রোধিতে আমার
 গতি, তোমাদের করেছে প্রেরণ। আর
 নিজে, যুদ্ধ-ছল করি', পলাইয়া গেছে
 এ বিশাল কুরুক্ষেত্রে, কোন্ দূর দেশে।
 চ'লে যাও ধর্মরাজ। যদি ইচ্ছা হয়, এই
 হীন সূতপুত্রে করি' নমস্কার, দিযে
 যাও তারে, বিজয়ার প্রাপ্য অধিকার।

নমস্কার করিয়া যুদ্ধাঙ্গিরের প্রস্থান, নমস্কার না করিয়া

নকুল প্রস্থান করিতোছিল

অশিষ্টে নকুল !

নকুল। আমি নাহি ধর্মরাজ। যাক প্রাণ, হীন
 সূতপুত্রের সম্মুখে শির না করিব নত।

কর্ণ। (হাস্য) যাও, তোমার প্রণাম,
 আমার নিকটে মূল্যহীন।

নকুলের প্রস্থান

তুমি কি করিবে মহদেব ?

মহ। নিজে ধর্মরাজ প্রণাম করিলা যারে,
 হ'ক সে অধম শূদ্র—সূত—আমি তাঁরে
 করি' প্রণাম। (প্রণাম)

কর্ণ। (শশব্যস্তে) যাও ভাই, শীঘ্র যাও—
 তুলে লও ধর্মরাজে নিজ-রথে। ভগ্নরথ,
 নিরস্ত্র তোমার জ্যেষ্ঠ। যদি দেখে রাজা
 দুর্ব্যোধন, তখন করিবে বন্দী—যাও !
 রাজ্যলোভে সংগ্রামের এত যে ক'রেছ
 আয়োজন, সমস্তই পণ্ড হবে।

মহদেবের প্রস্থান

আর ভূমি ?

—কি করবে বৃথা গর্ভী বৃকোদর ?
 মনে আছে ? যে দিন প্রথম, তোমাদের
 রঙ্গস্থলে করিয়া প্রবেশ, ক্রীড়াযুদ্ধে,—
 ধৃতরাষ্ট্র, ভীষ্ম, দ্রোণ, কৃপের সম্মুখে—
 করিয়া ছলাম আমি অর্জুনে আহ্বান ।
 পাইয়া আমার পরিচয়, দুর্ব্বাকা
 ব'লেছিলে মোরে— “ওরে হীন সূতপুত্র,
 অঙ্গ ধরা কাষ্য তোর নয়— অঙ্গ ফলে
 বল্গা ধর হাতে”—মনে আছে ? বুঝেছ কি
 এইবার, সেই হীন সূতপুত্র কত
 শক্তিপর ? বুঝেছ কি মহাশক্তিশালী
 ভীমসেন, তোমারে যে দলিত করিয়া
 জড়মত নিশ্চেষ্ট করিতে পারে, তার
 হস্তে বল্গা কিংবা অঙ্গ পায় শোভা ?
 বল ধর কর ।

ভীম । যে কথা ব'লোছ, হীন সূত,
 মৃত্যু-ভয়ে করিব কি তার প্রত্যাহার ?
 হীন হ'তে আরো হীন তুই । যুদ্ধে করি'
 অধন্য আশ্রয়, আমারে স্তম্ভন বাণে
 নিশ্চেষ্ট করিলি ।

কর্ণ । ধর্ম্ম কি অধন্য যুদ্ধ,
 ধর্ম্মবুদ্ধি যুদ্ধিষ্ঠিরে করিও জিজ্ঞাসা ।
 সুলবুদ্ধি উদর-পর্ব্বশ্ব বৃকোদর,
 তুমি কি বুঝবে ? শরমুখে করিয়াছি

স্নেহের আরোপ । হতভাগ্য বুঝলে না,
জীবন পরশ তার শিথিল করিয়া
অঙ্গ তব, করিয়াছে নিশ্চেষ্ট তোমারে ?

ভীমের গলদেশে ধনু প্রবেশ করাইয়া আ যণ

অশিষ্ট ক্ষত্রিয়, উঠে যাও : হীন প্রাণ
লইয়া তোমার, কিছুমাত্র গর্ব নাহি
মোর । যাও, তোমারেও দিচ্ছি অব্যাহতি ।

ভীম !

এ হ'তে অধিক নয় মৃত্যুর যন্ত্রণা !
দেবে, হীন সূত, মৃত্যু দে—মৃত্যু দে মোরে ।

কর্ণ !

তা হ'তে অধিক দিব যন্ত্রণা তোমায় !
হে দান্তিক ক্ষত্রিয়-নন্দন —এই নাও—

ভীমের গণ্ডে চুম্বন করিলেন

তাইত, তাইত ভীমসেন । বজ্রসম
করেছ কঠোর দেহ, কিন্তু গণ্ড
তব এত সুকোমল ! যাও এইবার ।
আভিজাত্য-গর্বে তব দিলাম আক্ষেপ-
চিহ্ন ! ষতদিন জীবিত রহিবে, রেখো
জলস্ত স্মৃতিতে তলে ।

নতমস্তকে ভীমের প্রস্থান

মা, মা । কোথা আছ ?
একবার দেখা দিয়ে প্রফুল্ল কর মা
মোরে ! মর্ষভেদী বাণ, ঘন বরষার
ধারামত, ছুঁড়েছি আকাশে । তারা ফিরে
আসি,' তোমার এ মাতৃহারা সন্তানের
মুক্ত মর্ষে করিছে পীড়ন । তুমি ছাড়া

আর যে মা, পারিবে না কেহ, নিবাইতে
সে অনল-জ্বালা । আসিতে কি পারিবে না ?

কৃষ্ণী-মূর্তির আনির্ভাব

না—না—তুমি কেন । তোমাতে চাহি না আমি
দেখিতে—নিয়তিরূপা—ওগো চ'লে যাও ।
চাহিয়া দেখিতে কৃতজ্ঞতা, পথরোধ
ক'রে তাঁর—যাঁহার বাৎসল্যে পুষ্ট আমি—
দাঁড়ায়ো না—দাঁড়ায়ো না—ওগো—মাতা !

মূর্তির অন্তর্দ্বন্দ্ব

মাতা ? মাতা—মৃত্যু-মূর্তি—সে আমার মাতা ?

দুঃশাসনের প্রবেশ

দুঃশা । অঙ্গরাজ !

কর্ণ । এই যে সম্মুখে তব ভ্রাতঃ ।

দুঃশা । আসিতেছে ঘটোৎকচ বধিতে আমারে ।

কর্ণ । ভুলে গিয়েছিলুম আমি—বধিতে এসেছি

ঘটোৎকচে, ভুলে গিয়েছিলুম দুঃশাসন ।

উভয়ের প্রশ্ন

শকুনি ও দুঃশাসনের প্রবেশ

শকুনি । ওই যায়—ওই যায়—যাও দুঃশাসন,

ওই—ওই দেখিছ না ? ওই চ'লে যায়

যুধিষ্ঠির ? রথ-শূন্য—অস্ত্র-শূন্য । হেন

ওভযোগ—আর কি কখন পাবে ? যাও, যাও ।—

দুঃশা । সত্য হে মাতুল, এমন সুযোগ

আর ত কখন আসিবে না !

- শকুনি । যাও যাও বৃথাবাক্যে বিলম্ব ক'র না ।
সহদেব-রথে যদি একবার করে
আরোহণ, আর তারে পাইবে না ।
- দুর্যো । কিন্তু হে মাতুল—
- শকুনি । বল বল—শীঘ্র বল ।
- দুর্যো । বেঁধে যদি আনি তারে,
তারপর কি করিব ?
- শকুনি । এনে দিবে আমার নিকটে ।
আবার করিব—মূর্খ ভাগিনেয়,
বুঝিছ না—আবার করিব পাশা-ক্রীড়া ।
- দুর্যো । বুঝিয়াছি, আবার পাঠাবে তারে বনে ।
- শকুনি । দুর্যোধন, আবার যত্নপি
তারে পাই, যাবৎ-জীবন দেশান্তর ।
- দুর্যো । অপেক্ষা—অপেক্ষা—হে মাতুল, জেনো স্থির,
বন্দী করি' আনিয়াছি যুধিষ্ঠিরে ।
- শকুনি । ধর্মরাজ (ই)
বটে তুমি যুধিষ্ঠির । একটি বারের
তরে, দুর্যোধন-মুখ হ'তে, বহির্গত
হ'ল না ত তোমার নিধন-কথা । যাক,
যদি হয় পূর্ণকাম দুর্যোধন—যদি
ধর্মরাজ, সে তোমারে বাধিয়া আনিতে
পারে, এ ভারত-যুদ্ধে, সর্কাজয়ী হব
আমি । আবার খেলিব পাশা—রাজা,
আবার পাঠাবো তোমা' বনে ।
(নেপথ্যে চাহিয়া) ওকি হ'ল ?

ও কে আসে দুর্ঘোষনে নিরুদ্ধ করিতে ।
 ওরে পাশা, বৃথা আশা, হ'ল না পাণ্ডব
 পরাজয় । দূর ছাই—দশ-ছয় ষোল ।
 তবে সব গেল—ষোল কলা পূর্ণ হ'ল ।
 পিতৃ-অস্থি, এতদিন পরে তোরে
 গেল প্রয়োজন । চল্ এইবারে তোরে
 নিক্ষেপ করিয়া আসি হিরণ্যতী জলে ।

প্রস্থান

খুদ্ধ করিতে করিতে দুর্ঘোষন ও সাত্যকির প্রবেশ

সাত্যকি । এতক্ষণ পরে বুঝিতে পারিলে সখা,
 এমন স্থলভ ন'ন রাজ্য যুধিষ্ঠির ?
 নিরস্ত্র দেখিয়া তাঁরে, প্রমত্ত-উল্লাসে
 ছুটেছিলে তাঁহারে করিতে বন্দী ! কই,
 সে মহাপুরুষ কোথা আর, কোথা তুমি ?
 বুঝ নাই হতভাগ্য, অলক্ষ্যে তাঁহার—
 কতশত অশুচর, ধর্মের নির্দেশে,
 তাঁহার জীবন রক্ষা করে ?

দুর্ঘোষ । হে সখে সাত্যকি, ধিক্
 ক্ষাত্র-ধর্ম, ক্ষাত্র-পরাক্রমে । “কদিন
 ছিলে যে আমার তুমি প্রাণ হ'তে প্রিয় ।
 আমিও ছিলাম বুঝি তাই—

সাত্যকি । বুঝি কেন, তাই ছিলে সখা—
 প্রাণ হ'তে প্রিয়তম ।

দুর্ঘোষ । লোভে, মোহে আজি সেই
 তোমাতে আমাতে এ বৈরিতা ।

সাত্যকি । বিচিত্র ! কিন্তু সখা সত্য যদি
তোমাতে বলিতে হয়, বৈরিতা পশেছে
শুধু বাণে—নহে মনে ।

হুৰ্য্যো । যাই হ'ক শুনি'
মানন্দে বিদায়-মুখে দিতে ছ তোমাতে
শর-পুষ্প উপহার ।

শর নিক্ষেপ

সাত্যকি । আমিও দিতেছি লহ—প্রতিদান ।

শর নিক্ষেপ

—দৃশ্যান্তর—

মৃত ঘটোৎকচ—পার্শ্বে কর্ণ

কর্ণ । চ'লে গেলি এক-বিঘাতিনৌ ? এক ক্ষুদ্র
নগণ্য, বর্ষর রথী—তারে বধ ক'রে
বধের রহস্য ক'রে গেলি ? স্বপ্নে দেখা,
আলোকের মত, বন্ধ চোখে দিয়ে দেখা,
যুক্ত চোখে আধারে মিলালি ? দিয়েছিলি
কি আশ্বাস, শৈল-বিদারণ-শক্তিধরী,
ক'রে গেলি কি নিরাশ, বল্মীকের পিণ্ড
চূর্ণ করি' । এই জীর্ণ-স্তূপ অন্তরালে,
দেখে যেন সে শৈল মহান—মুখে হাসি—
বুঝেছে সে আজ নিরাপদ । মহাশত্রু
আমি তার, অতি তুচ্ছ তৃণ উৎপাটিতে,

ক'রেছি এ বজ্রবাহু কৃত । চোখে আসে
 জল ! কেন আসে ? আসে কি বিবাদে ? না না,
 কখনো যা আসে নাই, কি হেতু আসিবে
 তাহা আজি ? উল্লাস—উল্লাস ! ওই শৈল-
 অস্তরালে, ওই যে অপূর্ব ছুটি আঁধি—
 ওই যে কারুণ্যপূর্ণ—ভাসায়ে তুলেছে
 অন্ধকারে, যুগ বুগাস্তের আত্মীয়তা—
 কত কথা বিশ্রুত আলাপে—মধু-ভরা
 সম্পর্কের কত ইতিহাস—ওই বটে ।
 কাঁদানো পরশ নিয়ে—ওই বটে—আসিয়াছে
 বিকল করিতে মোরে ! উল্লাস—উল্লাস । প্রস্থান

দুঃশাসন প্রভৃতির প্রবেশ

দুঃশা । ম'রেছে—ম'রেছে—ম'রেছে ।

সকলে । (উল্লাস করিতে করিতে) ধন্য বীর অঙ্গরাজ ।

দুঃশা । চল, তাঁকে আজ কাঁধে ক'রে আমাদের নৃত্য ক'রতে
 হবে । ঘটোংকচ মরেছে ।

সকলে । ঠিক—ঠিক ! চল, নৃত্য ক'রতে হবে—তাঁকে কাঁধে
 ক'রে, চল—চল ।

দুঃশা । মামা—মামা, ম'রেছে—ম'রেছে ।

শকুনি । আগে আমাকে কাঁধে ক'রে নৃত্য করু বেটারা । মেয়েছে
 কে ? রাগে আমি বাপের গোহাড় ক'খানা জলাঞ্জলি দিয়ে এলুম—
 মাথায় হাত দিয়ে পাকা একটি দণ্ড এই রাক্ষসটার বধোপায় চিন্তা
 ক'রলুম—ওকি আর বাঁচতে পারে !

সকলে । তবে মামাকেও কাঁধে করু—

শকুনি । আরে না—না—রহস্য ক'রছিলুম—রহস্য । নে—নে, এখন
ছুটে চল—সৈন্য মধ্যে সংবাদ দে—রাজাকে সংবাদ দে । ওরে, এত
উল্লাস—মনে হচ্ছে নিজেরই ঘেন্না আঁগাকে কাঁধে ক'রেছি ।

সকলের প্রস্থান । নেপথ্যে উল্লাস

অর্জুনের প্রবেশ, পশ্চাতে কৃষ্ণ

অর্জুন । এ কিরূপ বাসুদেব ? কি হেতু কৌরব
সহসা করিল এই প্রমত্ত উল্লাস ?
একি—একি—হে কেশব একি সর্দনাশ !
ঘটোৎকচ নিহত সমরে !
(সোল্লাসে) সত্য কথা ? মরিয়াছে ঘটোৎকচ ?
ওই যে সম্মুখে তব, সখা !
কি হ'ল কেশব—কি দুর্দৈব
ঘেরিল পাণ্ডবে ! কাল গেল অভিমন্যু,
আজ ঘটোৎকচ । অসহ্য, কৃষ্ণ,
শোকের উপরে শোক উন্নত করিল
মোরে । কে বধিল মহাবীরে বল কৃষ্ণ,
অভিমন্যু-বধে বধিয়াছি যেই মত
জয়দ্রথ—ঘটোৎকচ-বধে, সেইমত
বধ করি দুরাআরে !

কৃষ্ণ । অপেক্ষা—অপেক্ষা প্রিয় সখা—
সর্কাগ্রে আনন্দ করি, পরে
বলিব তোমাকে, কে বধেছে ঘটোৎকচে ।

শঙ্খধ্বনি

অর্জুন । (সবিশ্বয়ে) ওকি কর !

- কৃষ্ণ । এই যে দেখ না, করিতেছি শঙ্খধ্বনি ।
কি দেখিছ বিস্মিত নয়নে ধনঞ্জয় !
উল্লাসে চরণ রহে না রহে না স্থির—
অপেক্ষা—প্রাণের সখা, ক্ষণেক নাচিয়া
লই আমি ।
- অর্জুন । বাসুদেব, নিশ্চয় প্রমত্ত আজ তুমি ।
- কৃষ্ণ । প্রমত্ত—প্রমত্ত—আনন্দের
প্রমত্ত উচ্ছ্বাস সখা, প্রমত্ত ক'রেছে
মোরে । ঘটোৎকচ মরিয়াছে । বধিয়াছে
তারে কর্ণ । নিদ্রাগৃহ এত কাল গেছে
মোর নিশা । আজ আমি নিশ্চিত্ত ঘুমাব ।
- অর্জুন । জনাৰ্দ্দিন, তব কাষ্যে কারয়া সন্দেহ
হইয়াছি অপরাধী আমি । তবু সখা,
বল মোরে—বড় কোতূহল—পুত্রবধ
দেখে, কি কারণে উল্লাস তোমার ?
- কৃষ্ণ । আজ নিজ প্রাণ
দিয়ে কর্ণ-শরে ক'রে গেছে
হিড়িম্বানন্দন তোমার জীবন রক্ষা ।
- অর্জুন । আমার জীবন রক্ষা !
- কৃষ্ণ । তাই কেন সখা—তোমার—আমার ।
অঙ্গরাজ যে ভীষণ অস্ত্রবলে ছিল
বলীয়ান, সে অস্ত্রের প্রহার সহিতে,
ত্রিজগতে নাহি ছিল নাতি ছিল শক্তিমান ।
সে যদি করিত ইচ্ছা বধিতে আমারে,
হঠত আমার মৃত্যু—বধিতে তোমারে,

হইত তোমার মৃত্যু । গাণ্ডীব দূরের
কথা, রক্ষিতে নারিত স্মদর্শন ।

অর্জুন । এত বড় বীর কর্ণ ?

কৃষ্ণ । ছিল, আর নহে—

এইবারে বধ্য সে তোমার ।

এত বড় বীর পূর্বে আসেনি ধরায় ।

সহজাত কবচ-কুণ্ডল-ধারী—ছিল

নররূপে সে অমর । কেবল—কেবল—

দানে দাতৃশিরোমাণ নিঃস্ব করিয়াছে

আপনারে । তথাপি—তথাপি—একমাত্র

বধ্য সে তোমার । তাও সখা, যোগ্য কালে—

যখন তখন নয় । চল, বলিতে বলিতে

ইতিহাস, শিবিরে ফিরিয়া, অবশিষ্টে

রাত্রিকাল নিশ্চিন্ত বিশ্রাম লই সখা ।

চতুর্থ অঙ্ক

প্রথম দৃশ্য

পাণ্ডব-শিবির

যুধিষ্ঠির ও দ্রৌপদী

(যুধিষ্ঠির শয্যায় শয়ান, দ্রৌপদীর পদসেবা)

যুধি । হ'ল না পাঞ্চালী । শুধু লাভ—মর্ষস্থলে
আঘাতের উপর আঘাত । কাল গেল
অভিমত্যা, আজ ঘটোৎকচ । দুই পার্শ্ব
হ'তে মোর, দুইটি পঙ্কর গেল খসি,
আর যে মস্কক আমি তুলিতে পারি না
যাজ্ঞসেনী ।

দ্রৌপদী । মস্ককথা বলি মহারাজ,
অভিমত্যা-মৃত্যু-কথা শুনে, দুই করে
বক্ষ ধ'রে, ছুটে গিয়েছিলাম আমি, দিতে
সাহসনা স্তম্ভা ভগিনারে । ঘটোৎকচ
নিহত শূন্য মনে হ'ল ঠিক যেন
হারিয়েছি গর্ভস্থ সন্তানে মহারাজ ।
দৈতবনে সেবা তার—ক্রান্ত মৃতপ্রায়
দেখে—আমাবে বহন—করিতে আমার
তুষ্টি, রাশি রাশি উপায়ন আনয়ন—
জীবন থাকিতে তুলিতে যে পারি না হে
মহারাজ ! কোনো মাতা গর্ভস্থ সন্তান

হ'তে সেবার করে না প্রত্যাশা। সেই

অল্পম শক্তিধর সন্তান আমার—

আমারে ফেলিয়া গেছে চ'লে।

দাঁড়াইলেন

যুধি। উঠিলে যে যাজ্ঞসেনী ?

দ্রৌপদী। আসিছেন ধনঞ্জয়—সঙ্গে বাসুদেব।

যুধি। পার্শ্ব-কক্ষে লগুগে বিশ্রাম।

দ্রৌপদীর প্রস্থান

অর্জুন ও কৃষ্ণের প্রবেশ

এস দেবকী পুত্র, এস ধনঞ্জয়। তোমাদের মঙ্গল ত ? বড় আনন্দ, বড় আনন্দ কেশব, বড় আনন্দ ধনঞ্জয়, তোমাদের দেখে। তোমরা অক্ষত শরীরে ফিরে এসেছ। ধনঞ্জয়, কর্ণকে কি বধ ক'রেছ ? বল—বল ভাই, নিরুত্তর থেকে না। বল বাসুদেব। আমি কর্ণ সংহারের ইতিহাস শোনবার জন্য ব্যাকুল হ'বে তোমাদের প্রতীক্ষা ক'রছি। বল—বল, মৌন থেকে না।

অর্জুন। স্মৃতপুত্রের সঙ্গে কি আপনার সাক্ষাৎ হ'য়েছিল ?

যুধি। সাক্ষাৎ ? জীবনে যা কখন হয়নি, কর্ণের সম্মুখে পড়ে আজ আমার তাই হ'য়েছে। ভীষ্ম, দ্রোণ, কৃপ যা আমার ক'রতে পারেন নি, কর্ণ আমার তাই ক'রেছে। আমার রথধ্বজ ছিন্ন ক'রেছে, পাঞ্চি সারথি অশ্ব—সমস্ত হত্যা ক'রেছে। আর—আর বলতে কষ্ট হচ্ছে ধনঞ্জয়, আমাকে ধ'রে আমার প্রতি এমন পুরুষ বাক্য প্রয়োগ ক'রেছে যে, রণাঙ্গনে আমার মৃত্যু হয়নি ব'লে আমি আক্ষেপ ক'রছি। শুধু আমি নয় ধনঞ্জয়—আমি, ভীষ্ম, নকুল, সহদেব—

অর্জুন। চার জনকেই পরাস্ত ক'রেছে ?

যুধি। পরাস্ত কেন ধনঞ্জয়, বন্দা। তারাও যে ষার শিবিয়ে শুয়ে, আমারই মত মৃত্যুর অধিক যত্ননা ভোগ ক'রছে।

কৃষ্ণ । শুনে কিন্তু আশ্চর্য্য হ'চ্ছি মহারাজ, আপনাদের আয়ত্তে পেয়ে কর্ণ আপনাদের বধ ক'রলে না কেন ?

যুধি । কেন ক'রলে না বাসুদেব ? যেদিন ক্রীড়াযুদ্ধে অর্জুনের প্রতিদ্বন্দ্বী হ'তে প্রথম তাকে রঙ্গস্থলে প্রবেশ ক'রতে দেখেছিলুম, সেইদিন থেকেই তার ভয়ে আমি অস্থির ভাবে জীবন অতিবাহিত ক'রাছি । তার ভয়ে ত্রয়োদশ বৎসর আমি নিদ্রিত বা স্থখী হ'তে পারিনি । বিনিদ্রিত অবস্থাতেই আমি তার স্বপ্ন দেখেছি । তার ভয়ে ভীত হ'য়ে আমি যেনে যেতুম, সেই স্থানেই দেখতে পেতুম, সে যেন আমার অগ্রে চ'লেছে । তাকে দেখলেই মনে হ'ত, এত বড় ধনুর্ধর আব পৃথিবীতে আসে নাই ।

কৃষ্ণ । আপনার অনুমানে ভ্রম ছিল না মহারাজ ।

যুধি । ছিল না—ছিল না, না বাসুদেব ? কিন্তু দুর্যোধনের সেই নিতান্ত মিত্র সূতপুত্র আমাদের আয়ত্তে পেয়ে বিনাশ ক'রলে না কেন ?

কৃষ্ণ । তাতে কি আপনি দুঃখিত ?

যুধি । দুঃখিত ? বল কি কৃষ্ণ ! সূতপুত্রের কৃপায় প্রদত্ত জীবন বহন ক'রছি—এর অপেক্ষা দুঃখ কি আর হ'তে পারে ? অসহ, বাসুদেব, জীবন অসহ হ'য়ে পড়েছে ! কখন তার প্রতি আমার বিদ্বেষ ছিল না, কিন্তু আজ হ'য়েছে । তার মৃত্যুর ইতিহাস না শুনে আর আমি শাস্তি পাব না । বল ধনঞ্জয়, বিলম্ব ক'র না, কেমন করে তুমি তাকে বধ ক'রলে । শুনলুম, রণক্ষেত্রে তোমাকেই কেবল সে অন্বেষণ ক'রে বেড়াচ্ছিল । তোমাকে পাবার জন্ত সে প্রদর্শককে হস্তী, অশ্ব, গো, সুবর্ণময় রথ পুরস্কার দেবার কথা ঘোষণা ক'রেছিল । আমাকে শুনিয়ে তোমার প্রতিও সে পরুষ বাক্য প্রয়োগ ক'রেছে । এইবারে বিশ্রাম নিতে নিতে আমাকে বল, সে সর্ব-যুদ্ধ-বিশারদ ধনুর্ধরদিগের অগ্রগণ্য মহারথকে কেমন করে তুমি বিনাশ ক'রলে ।

অর্জুন । এখনো পর্য্যন্ত তাকে বিনাশ করতে পারিনি মহারাজ ।
যুধি । কি বললে গাণ্ডীবী ?

অর্জুন । এখনো পর্য্যন্ত তাকে বিনাশ করবার সময় পাইনি ।
আমি সংশ্লুকদের সঙ্গে যুদ্ধে নিযুক্ত ছিলাম ।

যুধি । তবে কি নিমিত্ত তুমি আমাকে দেখতে এলে ?

অর্জুন । শুনলুম, কর্ণের অদ্ভুত পরাক্রমে আমাদের বহু সৈন্য আজ বিনাশ
হ'য়েছে । আমাদের কোনও যোদ্ধা তার সম্মুখে দাঁড়িয়ে থাকতে পারে নি !
শুনলুম আপনিও তার বাণে জর্জরিত হ'য়ে তাকে পরিত্যাগ করে শিবিরে
ফিরে এসেছেন । তাই, যুদ্ধে ক্ষান্তি দিয়ে আপনাকে দেখতে এসেছি ।

যুধি । তোমাকে ধিক্ ধনঞ্জয় । দৈতবনে তুমি আমার কাছে সত্য
ক'রে বলেছিলে না. “আমি একাকীই কর্ণকে বধ ক'রব ।”

অর্জুন । এখনো ত সত্যব্রত হইনি মহারাজ । কর্ণ কর্তৃক পরাজিত
হ'য়ে ত আমি আপনার সঙ্গে সাফাৎ ক'রতে আসিনি ।

যুধি । নিশ্চয় পরাজিত । মৃত্যু-ভয়ে এখন রণক্ষেত্রে আজ তার
সম্মুখে তুমি উপস্থিত হ'তে পারিনি, তখন তুমি পরাজিত নও ত কি ?
তার সঙ্গে যুদ্ধে যদি তুমি সমকক্ষ নও জানতে, তখন সে কথা পূর্বে
বলনি কেন ? আমি কর্ণ-বধের স্বতন্ত্র ব্যবস্থা ক'রতুম ।

অর্জুন । সমকক্ষ নই, এরই মধ্যে আপনি জানলেন কেমন ক'রে ?
আজ রাত্রি-প্রভাতে আমি তার সঙ্গে যুদ্ধ ক'রুন স্থির ক'রেছি । আপনি
আসুন, রণস্থলে আমাদের উভয়ের যুদ্ধ সন্দর্শন করুন । সূতপুত্রকে যদি
আমি বিনাশ না ক'রতে পারি, তা'হলে মিথ্যা অঙ্গীকারকারীদের ষে
হীন গতি, তাই আমার লাভ হবে ।

যুধি । এখনো সেই অসারগর্ভ মূল্যহীন বাক্য-বিগ্ৰাস ! ধিক্,
ধিক্—শত ধিক্ তোমাকে । আৰ্য্য কুস্তীর গর্ভে জন্মগ্রহণ করা তোমার
নিতান্ত অন্তায় হ'য়েছে ।

অর্জুন । কি হেতু আপনি আজ এরূপ উত্তেজিত মহারাজ ? আমি
যে বুঝতে পারছি না !

যুধি । উত্তেজনা ? কর্ণ সমস্ত রণক্ষেত্রে তোমাকে অব্বেষণ ক'রে
ঘুরে বেড়াচ্ছে, আর তুমি আমাকে দেখবার ছল ক'রে, তার ভয়ে সমর-
ক্ষেত্র হ'তে পালিয়ে এলে ! আবার বলছ, কি হেতু আমি উত্তেজিত ?
যুদ্ধ ত্যাগ ক'রে পলায়ন অপেক্ষা, পঞ্চমমাসে গর্ভে বিনষ্ট হওয়া কি স্বা-
কুম্ভার গর্ভে জন্মগ্রহণ না করাই তোমার উচিত ছিল ! যাও, যদি বুঝে
থাক—কর্ণকে বধ ক'রতে তুমি অপারগ, তাহ'লে তোমার অপেক্ষা
স্থনিপুণ অন্য কোনও বীরকে গাণ্ডীব প্রদান কর ।

অর্জুন । (শিহরিল) কেশব—কেশব !

যুধি । তোমার গাণ্ডীবকে দিক, তোমার বাহুবলকে দিক, তোমার
ওই অগ্নিদেব-প্রদত্ত কপিধ্বজ রথকেও দিক ।

যুধিষ্ঠিরের প্রশ্ন

কৃষ্ণ । ধর্মরাজ—ধর্মরাজ—

কৃষ্ণের প্রশ্ন

অর্জুন ক্রণেক নিস্তরু রহিয়া প্রশ্ন করিলেন । অস্ত হস্তে পুনঃ প্রবিষ্ট হইলেন ।

দ্রৌপদী প্রবেশ করিয়া পশ্চাৎ হইতে তাঁর অস্ত্র ধারণ করিলেন

অর্জুন । কব পরিত্যাগ, নহিলে মর্যাদা যাবে ।

দ্রৌপদী । বাসুদেব—বাসুদেব !

কৃষ্ণের পুনঃ প্রবেশ

কৃষ্ণ । কি কি সখী ?

যাও কৃষ্ণ, তৃপ্ত কর ধর্মরাজে তুমি ।

দ্রৌপদীর প্রশ্ন

একি সখা ধনঞ্জয়, এই অসময়ে

খড়্গ কেন করিলে গ্রহণ ? প্রতিদ্বন্দ্বী

এখন তোমার এখানে ত কেহ নাই !

একি, ঘন ঘন দীর্ঘশ্বাস, বহ্নিকণা

বিচ্ছুরিত রক্ত দৃষ্টি হ'তে ! ধর্মরাজ-
তিরস্কারে, হে মানদ, মনে কি তোমার
সত্যই উঠেছে জেগে তীব্র অভিমান ?

অর্জুন । হে কেশব, জান তুমি আমার উপাংশ
ব্রত—যে মোরে বলিবে, তাজিয়া গাণ্ডীব
অন্য হস্তে দিতে, বিনাশ করিব তারে !

কৃষ্ণ । চলিয়াছ তাহ ইষ্ট জ্যেষ্ঠেরে নাশিতে !

অর্জুন । সত্য হ'তে ব্রহ্ম হ'ব ?

কৃষ্ণ । ধিক্ ধিক্ সখা,
ধিকার তোমাতে শতবার । দেখিয়া তোমাতে
এতাদৃশ রোষ-পরবশ, মনে হয়,
যথাকালে জ্ঞানবৃদ্ধ-নিকট হইতে
পাও নাই কভু উপদেশ । সত্য বটে
ধর্মভীরু তুমি, কিন্তু ধর্মের প্রকৃত
তত্ত্ব নহে অবগত । ধর্মনাশ-ভয়ে
করিতে ছুটিয়াছিলে, ধর্ম-বিগহিত
হেন কার্য্য ধনঞ্জয়, পৃথিবীতে—
একমাত্র তুমি যার হইতে উপমা !

অর্জুন । হে সর্বতত্ত্বের দ্রষ্টা, এখনো ত আমি
বুঝিতে পারিছু কিনা তব উপদেশ !
আমাতে কি সত্যব্রহ্ম হ'তে বল তুমি ?

কৃষ্ণ । তা কেন বলিব ? তবে কিনা ধনঞ্জয়,
সত্য-তত্ত্ব বড়ই দুজ্ঞেয় । এ জগতে
অনেক অসত্য নিত্য সত্য যুক্তি ধরি'
মানবে করিছে প্রতারণিত । আত্মজ্ঞান

বিনা, কেহ না করিতে পারে হে পাণ্ডব—
 সত্যের নির্গম। মিথ্যা যদি সত্য মূর্তি
 ধরে, সেখানে করিতে হয়, মিথ্যা দিয়া
 মিথ্যার বিনাশ। গাণ্ডীব-ধারণ সঙ্গে
 সত্য ক'রেছিলে যেই দিন, বল দেখি
 সত্যাশ্রয়ী, স্বপ্নেও কি ভেবেছিলে তুমি
 এ নিষ্ঠুর বাক্য—ধর্মরাজ-মুখ হ'তে
 হইবে বাহির? স্মরণ করহ বীর।
 যদি না ভাবিয়া থাক, মিথ্যা হয়েছিল
 ভাই প্রতিজ্ঞা তোমার। যদি ভেবে থাক,
 এখনি বধহ ধর্মরাজে।

অর্জুন। বাসুদেব, বাসুদেব,
 পাণ্ডবের পিতা মাতা তুমি, আমাদের
 গাত ও আশ্রয়। এইবারে রক্ষা কর
 ধর্মরাজে, আমারে, তোমারে—জানো যদি
 আমার মরণ সঙ্গে, তোমারো এ
 চাক্র দেহ লয়। যাও সখা, বুঝিয়াছি—
 মিথ্যা ব্রত গ্রহণ করিয়াছিহু আমি।
 প্রতিজ্ঞার কালে, সত্য, উঠে নাই মনে,
 তাই কেন, কোন কালে ভ্রমেও জাগেনি
 মনে, এ নিষ্ঠুর তীব্র বাক্য ধর্মরাজ-
 মুখ হ'তে হইবে বাহির।

কৃষ্ণ। কখনো যা করনি জীবনে, তাই কর—
 ধর্মরাজে কর অপমান। অশ্রদ্ধার
 বাক্যের প্রয়োগে মৃতকল্প ক'রে দাও

তাঁরে । দেহ নাশে ক্ষত্রিয়ের মৃত্যু নহে,
মৃত্যু অপমানে । ওই আনিয়াছেন তিনি,
কর্ণ-কৃত অপমান, অসহ হয়েছে
তাঁর, দেখিছ না—এখনও শাস্তি-চিহ্ন
ফুটে নাই মুখে ? প্রথমে উতাক্ত কর
বাক্য-বাণে, তারপর দুইজনে মিলি’
চরণ ধারণ । তোমার প্রতিজ্ঞা তাতে
রক্ষা হবে সখা ।

ক্রোপদীসহ যুধিষ্ঠিরের প্রবেশ

ক্রোপদী । অনর্থক আপনার

দুঃখ মহারাজ ! না করিয়া তিরস্কার
তৃতীয় পাণ্ডবে, আদেশ করুন তাঁরে ।
বলুন রাজন “যতক্ষণ কর্ণে তুমি
করিতে নারিবে ধরাশায়ী, ততক্ষণ
এ শিবিরে দেখিতে আমারে আসিও না ।
আর, যতপি অশক্ত হও তুমি,
ওমুখ আমারে আর দেখায়ো না ।”

অর্জুন ।

আমি- আমি
কেন আসিব না যাজ্ঞসেনী ! সূতপুত্রে
বধ, ইচ্ছা মে আমার । ওই দুর্বলতা-ভরা
নারী-বুদ্ধি রাজার আদেশ অশ্রদ্ধেয়
বুঝিতেছি আজি । হে দুর্বল-প্রকৃতিক,
যত অনর্থের মূল তুমি । তোমা হ’তে
ক্রোপদী-লাঞ্ছনা, তোমা হ’তে রাজ্য-নাশ—

এ মহা ভারত-যুদ্ধ, এই সব গুরুজন,
 এই সব আত্মীয়-বিনাশ—একমাত্র
 তুমিই কারণ তার। না দেখে নিজের দোষ,
 রণক্ষেত্র হ'তে পলাইয়া, দ্রোপদীর
 শযায় বসিয়া—নিল জেজর মত তুমি
 আমারে করিলে তিরস্কার! দিক তোমা—
 অত্যন্ত নিষ্ঠুর তুমি, তোমার নিকটে
 অবস্থানে, আমরা কেহই নহি স্থখী।

দ্রোপদী। একি কথা শুনি—কার মুখে! কৃষ্ণ-সখা

ধনঞ্জয় তুমি। আর তুমি? সত্য কি
 দাঁড়ায়ে সম্মুখে মোর দেবকী-নন্দন?

একজন করে গুরু-অপমান, অগ্র

জন সে দুর্ভাক্য স্মিতমুখে দাঁড়াইয়া

শুনে!

অবনত মস্তকে ভূপতিত হইলেন

যুধি।

সংস্কা হ'য়ো না প্রিয়তমে। সত্য

বলিয়াছে ধনঞ্জয়। সত্য—সত্য, যত

অনর্থের মূল আমি। তে অর্জুন, এক

বর্ণ মিথ্যা নাই উক্তিতে তোমার। সত্য,

অত্যন্ত অসৎকার্য্য করিয়াছি আমি।

একমাত্র আমি, তোমাদের সকলের

দুঃখের কারণ। নিতান্ত ব্যসনাসক্ত,

আমি মূঢ়, ভীক, অলস ও কাপুরুষ।

আমাদের কুলনাশে আমিই কারণ!

অতএব ওই ধড়ো এখনি আমার

কর মস্তক ছেদন। কিম্বা যাই চ'লে

বনে । কি হেতু তোমরা আর থাকিবে হে
অধীন আমার ? সুখী হও তুমি । রাজা
হ'ক ভীমসেন ; কিন্তু ভ্রাতঃ, আর তুমি
তীব্র বাক্য ব'ল না আগারে । সহ আমি
করিতে নারিব আর ।

প্রহানোগত

দ্রৌপদী

কোথা যান মহারাজ ? বনে ?
আমি সঙ্গে যাব প্রভু—সঙ্গে লও,—
দাসীয়ে তোমার সঙ্গে লও । এই সব
ধর্মবেত্তা মহাত্মার কাছে, আমিও যে
থাকিতে অশক্ত মহারাজ !

প্রহানোগত

কৃষ্ণ ।

আর কেন প্রাণগীন মত দাঁড়াইয়া
সখা, এসো,—দুইজনে দুইটি চরণ
ধরি' আনি ফিরাইয়া মহাত্মায় ।

উভয় কর্তৃক বুদ্ধিষ্ঠিরের পদধারণ

ফিরিয়া আসুন মহারাজ ।

অর্জুন ।

আসুন ফিরিয়া মহারাজ !
হে ইষ্ট, রক্ষিতে ধর্ম, দুর্বাক্য ব'লেছি
আপনারে । দাস প্রতি প্রসন্ন হইয়া
করুন—করুন তারে ক্ষমা ।

যুধি

বাসুদেব, ওঠো !
ধনঞ্জয় ওঠো ! প্রসন্ন হ'য়েছি আমি ।

কৃষ্ণ ।

আমারি ইচ্ছায় মহারাজ, সখা
তীব্র বাক্য প্রয়োগ ক'রেছে আপনারে ।
অবিদিত নহে আপনার, গাণ্ডীবীর
সে উপাংশু ব্রত, যে বলিবে তারে

গাণ্ডার অস্ত্রের হস্তে করিতে প্রদান,
তখানি সে তাহারে নাধিবে ।

যুধি ।

এতক্ষণে

বুঝিয়াছি প্রিয়তম, কর্ণ-অপমানে
সমস্তই বিস্মৃত হইয়াছিহু আমি ।
উঠ প্রিয়, উঠ প্রাণাধিক, সত্যই যে
বধা আমি । কৃপা করি, কেশব আমার
করিয়াছে, তাই এই মৃত্যুর বিধান ।

কৃষ্ণ ।

করিয়া গুরুর অপমান, অল্পতাপে
আত্মহত্যা ইচ্ছা যদি জাগে মনে, মথা,
নিজের প্রশংসা কর রাজার সম্মুখে ।
গুরুজন-অপমান মৃত্যুর সমান ।
সেই মত স্বগুণ-কীর্তন—আত্মহত্যা
হ'তে ভিন্ন নহে । করিয়াছ গুরু-বধ,
এইবার আত্মহত্যা কর ধনঞ্জয় ।

অর্জুন ।

কেশব আদেশে বলি, করুন শ্রবণ—
মহারাজ, এক পিনাকী শঙ্কর ভিন্ন
মম তুল্য ধনুর্ধর কেহ নাহি আর ।

যুধি ।

বলিতে হবে না আর প্রিয় । বলিতেছি,
কেশব-সম্মুখে, নিষ্পাপ—নিষ্পাপ তুমি ।

কৃষ্ণ ।

উভয়েই শ্রীচরণে অপরাধী মোরা—
প্রসন্ন হইয়া, হে আর্ষ্য, করুন ক্ষমা ।

যুধিষ্ঠিরের উভয়কে আনিঙ্গন ও মস্তক আর্জাণ

অর্জুন ।

এবারে অল্পমতি চাহি মহারাজ,
নিশা-শেষে কর্ণ-বধে করিব প্রয়াণ ।

প্রতিজ্ঞা আমার—রণে—কর্ণকে না করি'
নিপাতিত, কবচ না করিব মোচন
দেহ হ'তে ।

কৃষ্ণ । আমারো প্রতিজ্ঞা মহারাজ,
পৃথিবী করিবে অণু কর্ণ-রক্ত পান ।

যুধি । আয়ু-বৃদ্ধি অরাতি-বিনাশ, শোক-ক্ষয়—
হ'ক জয় লাভ । দ্রৌপদী ও যুধিষ্ঠিরের প্রস্থান

অর্জুন । আর কেন বাসুদেব ?
আবার প্রস্তুত কর রথ ।

কৃষ্ণ । অগ্রসর হও না সখা ।

অর্জুনের প্রস্থান, বাসুদেব প্রস্থানোচ্চত, পশ্চাৎ হইতে দ্রৌপদী প্রবেশ করিয়া

কক্ষের হস্ত ধবিলেন

দ্রৌপদী । বাসুদেব !

কৃষ্ণ । বল, প্রিয়সখী ।

দ্রৌপদী । এ কি দৃশ্য দেখিলাম আজি ! এখনো যে
বিস্ময়ে আতকে অবসন্ন হৃদিস্থল ।
দেখি নাই কখন ত হেন যুধিষ্ঠির,
স্বপ্নেও দেখিতে সারস নাই, হেন
ধনঞ্জয় । এও কি তোমার কোন লীলা ?

কৃষ্ণ । জিজ্ঞাসিলে যদি, তবে শুন । আজ যারে
বধিতে হইবে রণস্থলে, তার তুল্য
ধনুর্ধর আসেনি ধরায় । শুধু তাই
কেন, শুধু ধনুর্ধর কেন সখী, কর্ণ
ব্রহ্মনিষ্ঠ, সত্যবাদী, তপস্বী-প্রধান,
শক্রের (ও) উপরে দয়াবান ।

দ্রৌপদী । এতাদৃশ সূতপুত্র ?

কৃষ্ণ । এতাদৃশ কর্ণ । ইহা হ'তে
আরো সখি আশ্চর্যের কথা, একমাত্র
আমি ভিন্ন, —অবশ্য আমারে যদি তুমি
মনে-মুখে বল অস্তুর্যামী—

দ্রৌপদী । অস্তুর্যামী তুমি নারায়ণ !

কৃষ্ণ । আমি ভিন্ন এ জগতে
আর কেহ নাই, বাহির দেখিয়া তার
অস্তর বুঝিতে পারে । দৃষ্টি অন্ধ-কারী
জ্যোতিষ্ক-প্রধান সবিতার বক্ষস্থলে
কেয়ুর-কুণ্ডল বাণ, শঙ্খ চক্রধারী
লুকায়িত মহাপুরুষের মত, ওই
অপূর্ব পুরুষ, সকলের দৃষ্টি 'পরে
ভ্রমিতেছে আপনারে লুকাইয়া । আজি,
রণস্থলে সেই মহাবীরের সংহার ।
একমাত্র বধ্য কর্ণ অর্জুনের বাণে—
তাঁও যদি সখা গোর কায়ে, বাক্যে, মনে,
সত্যের আশ্রয় করে । কণামাত্র মিথ্যা
যদি লুকায়িত থাকিত অস্তরে তার,
গাণ্ডীবের শত আকর্ষণে, কৃষ্ণে, ওই
মহাপুরুষের অঙ্গ হইত না ক্ষত ।
ধর্মরাজ-আচরণে, তোমারি মতন
সখি, মাঝে মাঝে সখার হৃদয়মাঝে
জাগিত বিদ্রোহ, কিন্তু প্রকাশ করিতে
কোনকালে সাহস আসেনি তার । আজ

জ্যেষ্ঠের কুপায়, মুক্ত পার্থ সেই পাপ
হ'তে। তার ফলে, আজ—কি তোমায়ে বলি
যাক্সসেনী—(সমাধিস্থ হইলেন)

দ্রৌপদী। ও-ক—ও-কি ! জনার্দন, হীন নারী,—

এ সংক্ষোভ বৃষ্টিতে না পারি—শুনিবাব
নয় যদি শুনিতে না চাই।

কোথা গেলে তুমি ? ফিরে এসো—ফিরে এসো !

চরণে ছুলিছে বসুন্ধরা—কাঁপে তারা,

কাঁপে তীর জ্যোতিষ্ক মণ্ডলী—ছুটে বায়ু

মত্ত ঝঙ্কামত—আকাশ ছুলিছে ওই—

ফিরে এসো নারায়ণ।—এ বিশ্ব জগত

যেন লুকাইছে নিজের উদরে। এই ভীম

বিশালতা মাঝে, আমি একা—হে গোবিন্দ,

ফিরে এসো—ফিরে এসো। স্তব্ধ গম্ভীরতা

ল'য়ে আসিতেছে আমারে ঘেরিতে মৃত্যু।

ফিরে এসো সখা, ফিরে এসো আপনাতে।

কৃষ্ণ। (মুদ্রিতচক্ষে) এসেছি, এসেছি আমি। এই যে সম্মুখে—

মাথা তোলো, খোল চক্ষু—হে অভিমানিনী !

দ্রৌপদী। আমাকে নয় ত সঙ্ঘোধন ! ক'বা তুমি

ওগো ভাগ্যবন্তী ? কোথা তব ঘর ? কোন্

অজ্ঞাত প্রদেশ হ'তে, পরম-পুরুষে

তুমি, এমন করিলে আকর্ষণ ? আমি

পার্শ্বে দাঁড়াইয়া, পলক-বিহীন চোখে

খুঁজিয়া না পাই তাঁরে। এত ভালবাসা—

তবু আমি বিনিক্ষিপ্তা সহস্র সহস্র ক্রোশ দূরে !

কৃষ্ণ । কিছুই না চাও ? হে মানদে,
 তবে কেন এ আগ্রহে আমারে করিলে
 আকর্ষণ ? যা চাহিবে—আজ,
 যে প্রার্থনা উঠিবে তোমার মনে ।—বল !
 পারিলে না ? তবে লহ মোর নমস্কার ।
 নমস্কার ! জান না কি নমস্কা আমার
 তুমি ? তবে ? আবার নমস্কার ।—(নেপথ্যে শঙ্খধ্বনি)
 (বৃথিত হইয়া) ওই ওঠে শঙ্খধ্বনি সখি—ডাকে সখা
 ব্যাকুল আস্থানে । আর কথা কহিব না,
 চলিলাম কর্ণবধে ; বলিবার যদি
 কিছু থাকে, কর্ণের জীবন শেষ করি’
 নির্জনে বসিয়া তোমারে শুনার সখি ।
 এখন চঞ্চল আমি—বিদায়, বিদায় ।

প্রস্থান

দ্রৌপদী । আর কথা শুনিতে সাহস কোথা মোর ?
 কর্ণ-বধ-পূর্বে সখা, আমাকেও বধি’
 গেলে তুমি । মৃত আজ ধর্মরাজ, মৃত
 ধনঞ্জয়—সেই সঙ্গে মরিল পাঞ্চালী ।
 স্বয়ম্বর সভাস্থলে—তোমারি সম্মুখে
 ওই পুরুষ-প্রধানে হীন সূত ব’লে
 করিয়াছি অপমান আমি । বুঝিয়াছি
 কোথা গিয়েছিলে কৃষ্ণ । ওগো ভাগ্যবতী
 সূত-কন্যা, ওগো নরশ্রেষ্ঠের ঘরগী,
 প্রণিপাত করি আমি তোমার উদ্দেশে ।

দ্বিতীয় দৃশ্য

কর্ণ-শিবির

বৃষকেতু

গীত

আমার নয়ন জলে ভাসছে দু'টি রাজ্য পা।

আমার দেখা দেখি আমি

পরের দেখা দেখাবো না।

দেখ'চ আমি ওই যে নাচে

যাচ্ছে দূরে, আসছে কাছে—

সোনার ছবি ভাঙ্গে পাছে

নয়ন জল আর মূচবো না।

পাগল আমার বলুক লোকে কারো কথা শুনবো না।

প্রস্থান

পদ্মাবতীর প্রবেশ

পদ্মা ! বলে কিনা—“মাথা তোল হে অভিমানিনী।”
কি হেতু তুলিব মাথা ? কেন না হইবে
অভিমান ? শ্রেষ্ঠরথী, গরিষ্ঠ তাপস,
সত্য্যশ্রয়ী, দাতার অগ্রণী—তাঁই কেন ?
নাইবা হইল স্বামী তপস্বী-প্রধান,
নাইবা হইল শ্রেষ্ঠদাতা—নরদেহে,
হে মায়া-মানুস্কপী, স্বামী যে আমার
মানব-সম্পর্কে সদা নমস্ৰ তোমার !
জ্ঞানমূর্তি, হে বিধিজ্ঞ, হে পাণ্ডব-সখা,
এ কথা কি তোমারে বুঝাতে হবে ? তুমি—
সেই তুমি ওগো—নিত্য স্বরূপে প্রকাশ,

দিলে কিনা তব জ্যেষ্ঠে—গরিষ্ঠ পাণ্ডবে
 এতকাল সম্পর্ক-গোপন উপহার !
 ক'রেছিহু সত্য—সত্য অভিমান । কেন ?
 ধর্মরাজ, ভীমার্জুন না জানুক তারা,
 তুমিত' জানিতে প্রেমময় । ওই সত্য—
 স্বামীরে আমার যতপি বলিতে ছিল
 বাধা, আমারে বলিতে কি দোষ ছিল হে
 বাসুদেব ! আমিতো—তুমিতো জানো, সদা
 সর্বক্ষণ তোমার মিলনাকাঙ্ক্ষী দীনা
 ভ্রাতৃজায়া । 'কি চাই মানদে ।' কি চাহিব ?
 হে কপট, সত্যই কি ভেবেছিলে তুমি,
 তোমার নিকটে ভিক্ষা মেগে লব আমি
 দেবরের পরাজয় ?

বৃষকেতুর প্রবেশ

আয় বৃষকেতু,
 আয় কাছে, আরো কাছে, বক্ষের ভিতরে
 প্রাণাধিক । কি হেতু বিষণ্ণ ওরে শিশু ?
 বৃষ । মা, মা ! প্রতিশ্রুতি দিয়ে গেলো, কই, কোথা
 তোমারে মা দেখা দিতে এলো বাসুদেব ?
 পদ্মা । বাসুদেব-বাক্য মিথ্যা কভু হয় না রে ।
 দেখিতে কি ব্যাকুল হইলি বৃষকেতু ?
 বৃষ । ব্যাকুল হ'য়েছি মাতা । হ'তেছে সঙ্কল
 যুদ্ধ । দূর হ'তে শুনিলাম আমি, পিতা
 এমন করিছেন বণ, পাণ্ডব-কটকে

উঠিয়াছে আৰ্ত্তনাদ—“বাসুদেব ! রক্ষা
কর তোমার পাণ্ডবে !”

পদ্মা । বলুক—বলুক—তারা,
শোন্ বৃষকেতু, বলি তোর কানে কানে ।
দেবতা না শুনে—আরো কাছে—ওরে
আরো কাছে— তুইও বলরে শির উর্ধ্বে
চেয়ে, যুক্তকরে “বাসুদেব ! রক্ষা কর
তোমার পাণ্ডবে !”

বৃষ । উন্মাদিনী হ'লে মাতা ।

পদ্মা । না রে বৎস, পাণ্ডব-গৃহিণী আমি, কেন
হব উন্মাদিনী ? পাণ্ডবের সখা কৃষ্ণ—
সে যে সখা তোর, সখা মোর, সখা তোর
মহাত্মা পিতার !

বৃষ । একি বল—একি বল—
প্রবল আতঙ্কে কাঁপে হৃদয় আমার—

পদ্মা । বৃষকেতু ! এসেছিল ।

বৃষ । কে মা—বাসুদেব ?

পদ্মা । কুহকী—কুহকী—এসেছিল বৃষকেতু,
বেঁধে গেল ঘনিষ্ঠ বন্ধনে ।

বৃষ । ওকি—ওকি—কোলাহল—মাতা—

পদ্মা । উঠুক—উঠুক বৎস ।
উঠুক সে প্রবল গর্জনে—শোন্—শোন্
ওরে প্রাণাধিক । পাণ্ডবের স্তম্ভ তুমি ।
ভয় কি—ভয় কি ।—পাণ্ডব-উল্লাস-সঙ্গে
উল্লাসে উঠুক নেচে হৃদয় তোমার ।

ওরে বৎস, পিতা তব ত্রি-জগত মাঝে
 যেখানে যা ছিল তার, সমস্ত করিয়া
 গেছে দান। অবশিষ্ট একমাত্র তুমি।
 আমি তোরে আগে হ'তে করিয়াছি কৃষ্ণে
 সমর্পণ। উঠুক উঠুক ধ্বনি। কার
 জয়—কার পরাজয়? আয়, দেখে আসি—
 মৃত্যু যেথা জীবনে করিছে আলিঙ্গন।

তৃতীয় দৃশ্য

রণস্থল

গগনগে পৃষ্ঠে দিয়া উপবিষ্ট কর্ণ

কর্ণ। কেন মরিল না, কেন মরিল না, কেন
 মরিল না ধনঞ্জয়? মিথ্যা কি আমার
 শিক্ষা? মিথ্যা কি ঋষির বাক্য? মৃত্যু নিজে
 পরশিতে ধনঞ্জয়ে হ'ল কি শঙ্কিত?
 না—না—ওকি দৃশ্য—অদ্ভুত—অচিন্ত্য।
 আর ত মানব বলা চলে না তোমায়
 বাসুদেব। দেবের (ও) যা' সাধা বহিভূত,
 ওই নমনীয় দেহে ধ'রে কি বিশ্বের
 ভার, হে কৃষ্ণ, করিলে তুমি কপিধ্বজে
 ভূতলে প্রোথিত! নহে জীবন-মরণ-

সন্ধিক্ষণে, কে রক্ষা করিল ধনঞ্জয়ে ?
 তুমি—নিফল করিয়া—তুমি, হে কেশব :
 আমার সন্ধান মৃত্যু-বাণ। স্পর্শে যার—
 দেবেলু লুটাতে ভূমি ভলে, বায়ুস্পর্শে
 মরিত মানব—সেই বাসুকী-প্রদত্তা
 শক্তি—জ্বালাময়ী নাগের নিশ্বাসে—গেলো
 ভৈরব ছুঁকারে শূণ্ডে ছুটে, ফিরে এলো
 শুদ্ধ মাত্র কিরীটির কিরীট কাটিয়া !
 প্রয়োগে বিভ্রম নয়, শৈলেলু-হৃদয়
 মত লক্ষ্য মোর স্থির, সোদর-মমতা
 পারে নাই করাঙ্গুলি করিতে কম্পিত !
 মহাশক্তি—নাগদত্ত—রামমন্ত্র-বলে
 নিয়তি-প্রেরণামত চির জাগরিত—
 তথাপি না মরিল অর্জুন। পরিবর্তে
 মরিলাম আমি। কে আমি? কিরূপ আমি !
 মৃত্যু ও আমার মধ্যে ছিল কি অলজ্য
 ব্যবধান !—কোন্ ছিদ্রপথে প্রবেশিয়া
 আমারে করিল মৃত্যু গ্রাস ?—জন্ম—জন্ম।
 অচ্ছিন্ন আত্মের মধ্যে লুকায়িত কৌট-
 ক্রমত—জন্ম—জন্ম ! এক বালিকার
 ভুল—মত্ত কোতুহল এক দেবতার,
 কিশোরীর কোতুহলে নিল্লজ্জ লালসা !
 জন্ম—জন্ম—একমাত্র রক্তপথ ছিল
 ওইখানে ! তাই আজ ওরে ও মরণ !
 মগ্ন-রথে পৃষ্ঠ দিয়া, সমস্ত ভুলিয়া

ব'সে আছি । ওরে ও মরণ—বিস্মরণে
 জন্ম তোরা ! তুই এলি—জন্মের লাঞ্ছনা-
 স্বত্তি মুছাতে নারিলি ! চারিদিকে শূন্য—
 মধ্যে আমি । আমার অন্তরে প্রবেশিয়া
 ব্যঙ্গ করে বিরাত শূন্যতা ! বাসুদেব !
 পার কিহে তুমি এই মর্শ্বহীন, ঘন,
 স্তব্ধ শূন্যে বিদলিতে ? পার কি করিতে
 পূর্ণ তারে ? যদি পার—

কৃষ্ণের প্রবেশ

কে তুমি ? এসেছ—এসেছ জনার্দন ?
 কৃষ্ণ । জনার্দন নহি আমি ভাই—
 আমি কুস্তী-ভ্রাতা বাসুদেব-সুত কৃষ্ণ ।
 কর্ণ । সন্দে ?
 কৃষ্ণ । কেহ নাই ।
 কর্ণ । তব সখা ধনঞ্জয় ?
 কৃষ্ণ । আমি আসিতে দিইনি তারে ।
 কর্ণ । কেন কৃষ্ণ ?
 কৃষ্ণ । সর্বশ্রেষ্ঠ রথীর এ পতন লাঞ্ছনা—
 এখানে আসিয়া দেখা হ'ত কি উচিত
 শাস্তা ?
 কর্ণ । তুমি ত এসেছ কৃষ্ণ !
 কৃষ্ণ । আমি—আমি—কাদিতে এসেছি !
 কর্ণ । কেন কৃষ্ণ, মগ্ন-রথ
 বীর উপাধান, ভূমিতল—সর্বশ্রেষ্ঠ

শয্যাঙ্গ শয়ান, ভুলুগ্ঠিত দেহ ল'য়ে
 অমরু আত্মীয় চারিধারে—এত বড়
 আনন্দের দীর্ঘ রাত্রি সম্মুখে আমার—
 এ অপূর্ব শুভক্ষণে আসিলে কেশব
 ভ্রাতারে কপট অশ্রু দিতে উপহার !

কৃষ্ণ । বীরত্বের, অভিমানী কর্ণের মরণ
 দেখিতে, ফেলিতে চক্ষুজল, আসি নাই
 ভ্রাতঃ ! পৃথিবীর দৈন্ত্য দেখে ঝরিতেছে
 আঁখি । আজি দাতাকর্ণ চ'লে যায় নিঃস্ব
 ক'রে তারে ।

কর্ণ । কি বলিয়া করিব তোমারে
 সম্বোধন ।—ভগবান ?

কৃষ্ণ । তব স্নেহাকাজী ভ্রাতা ।

কর্ণ । তুমি ভগবান ।

কৃষ্ণ । ওকি কথা ভাই ।
 মানুষ কি হয় ভগবান ?

কর্ণ । ভগবান হয় ভগবান ।
 কিন্তু ভাই, ভগবান ইচ্ছা যদি করে, (অধরে হস্তদান)
 এই মত—প্রাণাধিক, ঠিক এই মত
 মূর্ত্তি ধরে । এই মত নবীন নীরদ বর্ণ,
 এই মত চির-চঞ্চলতা মাঝে স্থির
 নীরজ-আয়ত দু'টি আঁখি—কিন্তু কই,
 কোথা বনমালা বনমালী ?

কৃষ্ণ । প্রেমস্পর্শ দাও ভাই বুকে,
 হ'ক মুগুমালা বনমালা ।

কর্ণ ।

(আলিঙ্গন) এই লহ

ভাই স্পর্শ—এ ইচ্ছা তোমার । অষ্টাদশ
অক্ষৌহিনী সম্মুখে আমার, মাথা দিয়া
পড়িয়াছে ধর্মের দুয়ারে, কুরুক্ষেত্র
এক পুষ্পোদ্যান—প্রফুল্ল কুমুমমালা
তোমাতে করুক আলিঙ্গন ।

কৃষ্ণ ।

ভাই--ভাই ।

কর্ণ ।

কেন কৃষ্ণ ? কোথা তুমি ? মহাসা উঠিলে
কি কারণ ?

.. কৃষ্ণ ।

আসিছেন রুদ্রমূর্তি লয়ে ভীমসেন ।

কর্ণ ।

আসিতেছে ? বুঝিয়াছি কেন

আসিতেছে । যতপি জীবিত দেখে মোরে,
অজ্ঞান নিষ্ঠুর বাক্য অজস্র শুনাবে ।

শুনা কি কর্তব্য কৃষ্ণ ?

কৃষ্ণ ।

না আর্ষ্য না ভাই, কদাচ কর্তব্য নয় !

সে যে মাত্র জানে আপনারে,

হীন হৃত—রাধার নন্দন—দুর্যোধন

হ'তে তুমি যে অধিক শত্রু তার !

কর্ণ ।

দাঁও ভাই কর-পদ, শীঘ্র দাঁও—

হৃষীকেশ ! এতকাল প্রাণ-বুদ্ধি-ধর্ম

অধিকারে, যা' ক'রেছি, যা' বলেছি, যাহা

কিছু ক'রেছি স্মরণ, সমস্ত, সমস্ত—

আমার সমস্ত ল'য়ে, আমাকে তোমার

করে দিলাম সঁপিষা ।

কৃষ্ণ ।

দাঁও ভাই দাঁও—

আদিত্যমণ্ডল হ'তে তোমাতে হারায়ে
অপূর্ণ ছিলাম সখা । হে চির-গোপন !
অন্তরে তোমাতে পেয়ে আজি, পরিপূর্ণ—
পরিপূর্ণ আমি ।

কর্ণের সমাধি, ভীমের প্রবেশ

ভীম । কই কৃষ্ণ, কোথা কৃষ্ণ ?
কৃষ্ণ । এই যে সম্মুখে আপনার ।
ভীম । বটে, বটে—সত্যই ত এই যে সম্মুখে তুমি ।
কৃষ্ণ, অত্যন্ত উল্লাসে ঘটেছে দৃষ্টির হানি ।
শীন-রাধা-পুত্র আজ পড়েছে সমরে ।
দেখাও দেখাও কৃষ্ণ, যদি দেখে থাকে,
কোথা সেই নীচাঙ্গার ভুলুগিত দেহ ।
কৃষ্ণ । মরেছে যখন “শীন স্মৃত”, দেহ দেখে
তার, লাভ কি কৌন্তেয় আপনার ?
ভীম । আছে—
আছে লাভ । জান না, জান না ভাই তুমি,
সে ছুরায়া করেছে আমার কি লাঞ্ছনা ।
আকস্মিয়া—গলে দিয়া ধনুকের ছিলা,
গণ্ডে মোর ক'রেছে চূষন । অপবিত্র
ওষ্ঠের পরশ মাথায় দিয়াছে সেখা
অসংখ্য বৃশ্চিক-জালা । এখনো সে জলে ।
দুঃশাসন-বক্ষ-রক্ত দিয়াছি প্রলেপ,
তবু, কৃষ্ণ, উগ্র তাপে এখনো সে জলে ।
দেখাও দেখাও কৃষ্ণ, বিষ দিয়া করি

বিষক্ষয়—সে ছুরাত্মার রক্ত দিয়া

মুছে লই জালা ।

কৃষ্ণ ।

ওই যে সম্মুখে ভ্রাতঃ—মগ্ন-চক্র রথে

গৃষ্ঠ দিয়া, স্মৃতিচ্যুত শবরাজি

আসন করিয়া, উর্দ্ধনেত্রে, সমাধিতে

মগ্ন ওই—ওই যে ওই যে মহাযোগী ।

ভীম ।

একি কৃষ্ণ, জল ভারাক্রান্ত

কেন আঁখি ! কি আশ্চর্য্য ! কার শোকে ? ওই

পাণ্ডবের চিরশত্রু রাধার নন্দন

কাতর কি করিল তোমাতে ।

সহদেবের প্রবেশ

সহ ।

দাদা, দাদা ! সত্বর শিবিরে এস ফিরে ।

ভীম ।

কেন—কেন সহদেব ?

সহ ।

ঘটিয়াছে দুর্কোথা ঘটনা—

কর্ণের নিধন-বার্তা শুনি মূর্ছাগতা—

ভূপতিতা মাতা ! কোন মতে ফিরিছে না

জ্ঞান ! ভাসিছে পাঞ্চালী নগনের জলে,

হেঁটমুণ্ডে ধর্ম্মরাজ ব'সে পদতলে,

পার্শ্বে তাঁর দাঁড়াইয়া শুরু ধনঞ্জয় ।

নকুলের প্রবেশ

ভীম ।

নকুল—নকুল ! মৃত্যু কি জীবিতা মাতা ?

নকুল ।

হ'লে মৃত্যু হ'তেন জীবিতা । জীবনের

সঙ্গে গাঁথিয়া মরণ জেগেছে জননী ।

আসিছেন ধর্ম্মরাজ, পাঠা'লেন মোরে

পূর্বে তার সাবধান করিতে তোমায়ে ।
হে আৰ্য্য, রাজার আজ্ঞা—কোন মতে খেন
অশ্রদ্ধার বাণী বহির্গত নাহি হয় কর্ণের উদ্দেশে ।

ভীম । কি রহস্য বাসুদেব ?

যুধিষ্ঠির ও অশ্রুতের বৈশিষ্ট্য, যুধিষ্ঠির কর্ণের পদতলে বসিলেন

যুধি । হে অগ্রজ, হে রাজর্ষি, হে শ্রেষ্ঠ পাণ্ডব,
পঞ্চানন পঞ্চদাস তব পদতলে,
একবার নিয় কর আঁখি ।

ভীম । কে অগ্রজ, কে অগ্রজ ?
পাণ্ডব-অগ্রজ—রাধাসুত !

কর্ণ । কোন্তেয় কোন্তেয়, রুকোদন ! দাও শ্রদ্ধা—
কর প্রণিপাত পদতলে !

পদতলে কর্ণের পদতলে বসিলেন, কর্ণ বৃথিত হইলেন

কর্ণ । সারা বিশ্ব পশ্চাতে রাখিয়া, একবার
দাঁড়াও সম্মুখে ভীমসেন । একবার
স্নিগ্ধ নেত্র চাহ মোর পানে । মনে কর
দৃঢ় ধারণায়, এ জগতে আছ মাত্র
তুমি আর আমি । ধরাত্যাগ-মুখে, ইচ্ছা
শূন্যতে তোমায়ে এক বিচিত্র কাহিনী ।
কাহিনী বিচিত্র—কাহিনী বিষাদ-পূর্ণ ।
সেই বিষন্নতা কেবল কোন্তেয়-ভোগ্য ।
অবশ্যই রাখিয়াছ জলন্ত স্মরণে
সেই দিন—যে দিন আমার সঙ্গে যুদ্ধে,
হে অতুল-বার্য্য-অভিমানী, হ'য়েছিল

মর্শ্ছেদী দুর্দশা তোমার ! মর্শ্ছেদী—
 মনে হয় যন্ত্রণায় তার, তুমি মৃত্যুদাতা
 দেবতার কাছে বারংবার ক'রেছিলে
 মরণ কামনা ! মর্শ্ছেদী সে দুর্দশা—
 ভগ্ন-রথ, ভগ্ন-ধনু হতাস্ব-সারথি,
 হস্তচ্যুত, চূর্ণীকৃত, দূর-ক্ষিপ্ত গদা—
 মগ্ন-ঐথি আলোখ্য-নিশ্চল—সর্বশক্তি
 রুদ্ধ দেব-গৃহে—অস্তিত্ব-প্রকাশ-শক্তি
 ছিল মাত্র মুক্ত দীর্ঘ নিশ্বাসের পথে ।
 সে নিশ্বাস মৃত্যুদাতা দেবতার কাছে
 কেবল চেয়েছে মৃত্যু । তথাপি জানিতে
 তুমি, তোমার জীবন—শুধু কি তোমার ?—
 থাকুক সে কথা—ওই তোমার জীবন
 এই বজ্র-মুষ্টি মধ্যে ছিল অবস্থিত ।
 নিশ্চয় জানিতে তুমি সামান্য পেষণে—
 পিপীলিকা-বিনাশ-ইঞ্জিত মত মতি
 ক্ষীণ অঙ্গুলি প্রহারে আকাজক্ষিত মৃত্যু
 আসি' নিঃশব্দে করিত তোমা' গ্রাস । কিন্তু
 বৃকোদর, মৃত্যু আসিল না । হে প্রচণ্ড
 রাধেয়-বিদ্বেষী, মরণের পরিবর্তে
 পড়িল তোমার গণ্ডে নিয়তি-রহস্য
 আবরিয়া, দেবতা মানবে লুকাইয়া—
 পড়িল তোমার গণ্ডে পিপাসা-রচিত
 এক স্নেহের প্রহার । রাধেয়-বিদ্বেষে
 নষ্ট-বুদ্ধি বৃকোদর, মধুর মাধুর্যা

তার বুঝিতে অক্ষম হ'লে তুমি । তীব্র
 রাধেয়-বিদ্বেষ ফুৎকারে—ফুৎকারে
 সে অমৃতে, সে মর্ষ-মথিত স্নেহরসে—
 সেই অধর-পরশে করিল বন্ধুণী-
 ভরা বিষে পরিণত । শুনতে পাওব,
 এইবার সে অপর-স্পর্শ হাতহাস ।
 এক কুমারীর এক মুহূর্তের ভ্রমে
 ক'রোছিল এক শিশু ধরণী আশ্রয় ।
 নিষ্ঠুর সমাজ-ভয়ে, জননী তাহার
 পারিল না তুলিতে তাহারে গাঞ্জে দিল
 বিসর্জন । বুঝি সে তটিনী, ভীমসেন,
 জন্ম ল'য়েছিল তার নয়নের জলে ।
 সেই জল-স্রোতে ভাসিয়া চলিল শিশু ।
 তীরে দাঁড়াইয়া ওই অভাগিনী মাতা,
 ভেসে যায় সম্মুখে তাহার নবোদিত
 মাতার মমতা—‘কোথা আছ কে ,দেবতা
 রক্ষা কর সন্তানে আমার.’—ভীমসেন,
 মুগ্ধা জননীর সেই তীব্র কাতরতা
 আশীর্বাদ রূপ ধ'রে বালকে করিল
 মৃত্যুঞ্জয়ী ! ভেসে ভেসে চলিল সে, ভেসে
 ভেসে উঠিল সে আর এক জননীর
 অনন্ত বাৎসল্য-ভরা কোলে । হ'য়েছিল
 সে অজ্ঞেয়, হ'য়েছিল সে অমর সম ।
 কিন্তু ভাই, কর্মপথে চলিতে চলিতে
 অকস্মাৎ দেখিল সে, জীবন-মরণ

যুদ্ধে প্রতিদ্বন্দ্বী হইয়াছে, তীক্ষ্ণ বাণ
 ধরিয়াছে— বিদৌর্গ করিতে বক্ষ মত্ত-
 প্রতিজ্ঞায়— তাহার অন্তঃ সহোদর !
 মনুষ্যত্ব তথাপি করিল উত্তেজনা,
 অভিমান ভ্রাতৃত্ববে করিল প্রেরণা ।
 কিন্তু তাই, অমরত্বে করিয়া আশ্রয়
 যতবার তুলিতে গেছে সে মৃত্যুশয়,
 অমান তাহারে দিতে বাধা -- ওই ওই -
 আবার আকাশে প্রিয়তম— ওই মেহ
 দরবিগলিত আঁখি, শ্রী-তা-কৃষ্ণিনী,
 ভিক্ষার অঞ্জলি-ধরা, যেন কত চৌধ্য-
 অপবাধ-কৃপা, আমার কোমাবাময়া
 মাতা । ওহ—ওহ তার মাতৃ-আরিভাবে
 অমরত্ব বিলাসেছি, অন্তর্ভুক্ত সমস্তে
 লুকায়েছি, এ অন্তরে বিঘ্নাত ঢেলোছ
 ভারে ভার । তার ফলে ক্ষুধার্ত মেদিনী
 গ্রন্থ-বন্ধে পৃষ্ঠ দিয়া, সমস্ত সঁপিরা—
 কই ? বাসুদেব—বাসুদেব,
 একবার সম্মুখে দাঁড়াও নর ।
 সম্মুখে দাঁড়াও নারায়ণ !

ধবলিকা

২০৩১১, কণ্ডওয়ালিস স্ট্রীট, কলিকাতা হইতে গুরুদাস চট্টোপাধ্যায় এণ্ড সন্স-এর পক্ষে

শ্রীকুমারেশ ভট্টাচার্য্য কর্তৃক প্রকাশিত ও শৈলেন প্রেস, ৪, সিমলা স্ট্রীট কলিকাতা

হইতে শ্রীতীর্থপদ রাণা কর্তৃক মুদ্রিত ।

